

**ASO LULU, 19 IUNI 2019**

*Na nofoia e le Fofoga Fetalai le Nofoa i le itula e 9:15 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoaofaitulafono.

Ia, malo faafetai le lagimama ma le soifua manuia ua mafai ona tatou feiloai i pue o manu ae le o pue o mala i lenei taeao fou e faaauau le tatou galuega. E faatalofa atu foi i lau Afioga i le Palemia faapea le Kapeneta ma sui usufono mamalu uma o le Palemene, ae a le tapuaiga a Ofisa Sili o Pulega o Matagaluega ma Faalapotopotoga a le Malo. Malo le soifua manuia i lenei taeao.

**TUUINA ATU O LIPOTI A KOMITI FAA-PALEMENE**

*Na tolaulauina e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.52(5).*

1. P.P.2019/2020 Nu.77, Lipoti a le Komiti o Tupe Maua ma Tupe Totogi i le P.P.2018/2019 Nu.151, Lipoti Faaletausaga a le Pulega o Faailoga ma Tusi Pasi Taulaloa mo le Tausaga Faaletupe 2017/2018.
2. P.P.2019/2020 Nu.78, Lipoti a le Komiti o Tupe Maua ma Tupe Totogi i le P.P.2018/2019 Nu.163, Lipoti Faaletausaga a le Iuni Lakapi a Samoa mo le Tausaga Faaletupe 2017.
3. P.P.2019/2020 Nu.80, Lipoti a le Komiti o le Vaega tau le Tamaoaiga i le P.P.2018/2019 Nu.135, Lipoti Faaletausaga a le Faalapotopotoga o Eleele a Samoa mo le Tausaga Faaletupe 2017/2018.
4. P.P.2019/2020 Nu.81, Lipoti a le Komiti o le Vaega o Atinae Eeseese i le P.P.2018/2019 Nu.58, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga Faaletupe 2016/2017.
5. P.P.2019/2020 Nu.82, Lipoti a le Komiti o le Vaega o Atinae Eeseese i le P.P.2018/2019 Nu.117, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2017/2018.

*19 IUNI 2019*

**TULAFONO TAU FAAOFI O LE FAATATAUINA O TUPE FAAOPOOPO (NU.2) 2018/2019 & TULAFONO TAU FAAOFI O LE FAATATAUINA O TUPE 2019/2020 – felafolafoaiga i luga o le faitauga faalua**

**FOFOGA FETALAI:** E tolopo le Galuega a le Fono Aoaio i le aso ananafi ua maea ona saunoa le sui usufono mo Gagaiforma Nu.3. Ia, o le avanoa foi lenei mo se isi sui usufono e tulai mai e saunoa e tusa ai o le tatou galuega.

Tulai mai le sui usufono mo Vaimauga Sasae, tulai mai lau Afioga i le sui usufono mamalu.

**Afioga SULAMANAIA FETAIAI TAUILIILI TUIVASA (Vaimauga Sasae):** Ou te masalo o se agaga faagaetia ia te au le tofiaina o au ou te vaisoaina le gasu o le taeao mai lava le Siufanua i Saua ina ua tatou fesilafai i le taeao lenei, i le agalelei ma le agaalofa o le Atua po ua tatou fesilafai foi i magafetausoifua.

Ae o lou tulai i lenei taeao ou te tulai ma lou agaga faaaloalo ou te tautala foi ma le fefe ma le gatete, e pei o le upu i le to sua ma le to le sua i laufanua o Fiamē ma Salevalasi. E mafua i se a ona ou fefe ma ou gatete? Leaga o lea ua paia ma ua mamalu le Maota nei, o le maota i Tiafau nei o le malae ole faautugatagi a Samoa. Fai mai o Lalotea o le malae e faaututagi ai Tumua, a o le malae lenei o Tiafau e faaututagi ai Samoa. O le ala lea o lou fefe ma lou gatete. E mafua i se a? O le tofa lea e i totonu o le Maota lenei, o le faaututaga i tupu ma tamalii o le atunuu na tofofi mai, e omai e tautua le atunuu lenei. O le ala lena ua ou fiafia ai i lenei taeao, ua ou lauga mua ai i lenei aso, leaga o eleele tau Tuisamau lenei, o ou eleele nei, sa ou le lauga ananafi ona ou te faaaloalo i le sui usufono fou lea, a o eleele nei o ou eleele ou te tapule ai, o lea foi ua ou mitamita i lenei taeao ina ua mamalu le taeao lenei leaga o lea ua tatou aiga fesilafai ma ua tatou faletalatala e ala i le tou afifio mai ma talaaao mai. O le mea lea sa fai i gauta i le malae taalo lea, e leai, o le tatou Fono lena sa fai i le eleele o Faleata, o le malae sao lenei o le malae o le faautugatagi a Samoa.

Ona i ai lea o le manatu, a o le i oo se matou faamatlaaga i le Tulafono Tau Faaofi po o le faasoasoina po o le lufilufiina o le tamaoaiga o le atunuu, e muamua ona matou ofo alofa atu lenei itumalo i le afio o lau Afioga i le Palemia. Se a lafalafa a Tuna o oe o le Malietoa, o oe o le Tuiatua, o oe o le Tuiaana. E ui a ina le afio mai le Afioga i le Sui Palemia, leaga o le itumalo lenei e ava tele i le itupa lea o tina, o le ala foi lena e mitamita ai lenei itumalo ma lagolago pea le Afioga i le Sui Palemia, po o le Afioga i le Sao Faapito po o le Afioga foi i le Sao Papa, le Sao Falenaoti, leaga o lea e tuualalo i lau Afiogai le Palemia. O le ala lea o lo o see ai pea le sa o Samoa. Ona e a? O lo o i ai se tina o lo o faatinoaga le agaga o le tina o Maria, e faufautua i lana tama. E le o oe la o Iesu, a o lea e faufautua ia Maria le itupa o tina, lea e manaia ai le sa o Samoa.

E faatalofa foi i a outou Afioga i Minisita aemaise foi o le afifio o Minisita Lagolago. Liliu mai foi i lenei talaga atoa, faatalofa atu lenei itumalo i paia i tupu ma tamalii o tupu ma tamalii o alii ma faipule o le Palemene o Ssamoa, ae silisili ona faatalofa atu i lau Afioga i le Fofoga Fetalai aemaise le Sui Fofoga Fetalai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ona o le a? o lea lava e faatino le tautua. A tatou vaai i si o tatou atunuu i le 57 o tausaga lea o lo o i ai i le taimi lenei, o lea lava e talavou le atunuu. Ae a mea ua tutupu, le tamaoaiga ma mea ua tutupu i lenei vaitau? Leai ua matua ona o le a? O le faatautaiga o le tatou atunuu. O le upu a le atunuu e le mafai e mea nei o tufanua, se i tulou, ona tautua. Na o ai? Na o tupu lava. O outou o tupu, o outou o tamalii. O le ala lena e tuufesili ai tagata, o le a le mea e ala ai ona o e faaututagi i le malae i Tiafau ae a isi malae? Ona o le tofa lea, o le faautaga lea, o matai Samoa e omai e soalaupule, o i e ola ai le pagota. O ai lava e aumai, a malele loa le Maota lenei, ua uma mea uma, o le faasinomaga lea o le atunuu.

Ona matou faapea lea, e le tuua foi le tapuaiga a Lana Afioga Mamalu O Le Ao o le Malo o Samoa, lau Afioga Tuimalealiifano faapea foi lana Masiofo le teine tau Vaimauga le Afioga ia Maposua, e faapea foi le tapuaiga a le Sui o le Fono a Sui Tofia ma lana Masiofo, faapea foi le Afioga i le Faamasino faaolioli aemaise le paia i alii ma tamaitai faamasino o lo o tua i ai le atunuu, o lo o ave i ai le faatuatuga i le fai mea tonu ma le fai mea sili. Faamalo i lea foi ituvai o lo tatou atunuu.

E le mafai foi ona faagaloina le lauga a lenei itumalo le tapuaiga mamalu a alii ma e o lo o auauna i le Atua i le aufaigaluega paia a le Atua i so o se fatafaitaulaga, ma e o lo o ofoina le latou soifua e tulivae, anapopogi ma tatalo aua se manuia o Samoa ma ona tagata. Malo tatalo, malo foi le tapuaiga o faiva o le atunuu.

Ae le mafai lava ona faagaloina le tapuaiga mamalu a si ou itumalo Vaimauga Ssasae po o le paia foi aua Aiga e lua ma le nofo a tula mai lava i Fusi ma Fanuatanu, o Lalotea, Niniva ma Punialavaa, aemaise o Fatutolo ma Pilioua o lea e manuia le tou sui usufono ona o a outou tatalo ma la outou tapuaiga.

Ia tapuai maia se i fai se sao aua le lufilufiina o le tamaoaiga o le atunuu ua opea nei i le Maota.

E muamua ona ou faafetai i lau Afioga i le Minisita o Tupe aemaise foi lau Matagaluega, i le Ofisa Sili ma le Pulega. E le faigofie lenei mea o le tapenaina o le Tala o le Tupe ona e a? E alu le taimi, alu masina, e le mafai foi ona outou momoe ma tofafa i le tau matimatiina ma le aamiina foi o Matagaluega a le Malo e o atu e fai i ai ni fesili aua le tamaoaiga o le atunuu.

I le matau a lenei sui usufono mo Vaimauga Sasae ina ua tulai mai lenei Faigamalo, sa ou vaai lava i le faasoaa a le Minisita ma le Matagaluega, ua mafai ona, se i tulou lava le upu, sesele a tatou tupe alu, ona o le a? Ona o le alofa i le atunuu. O lea la sa sau pei sa tatou tigaina i le Nofoaiga muamua, sau le lona lua, sau lea ua i ai nei tatou i lenei taeao, e ui lava o lea e fesilisili le sui usufono o le Vaimauga po o fea e aumai ai le mea e faaatoa ai le mea lea e ova ai le tupe alu i lo tupe mama.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ae ou te talitonu lava lou sui usufono, o le atunuu lenei a uma ona faatino se fuafuaga ona tuu lea i luma o le fatafaitaulaga, ona tuu lea i luma o le Atua na te faasoa mai mea i lea taimi i lea taimi e ala i le faasoa limalelei o le tatou atunuu. Faamalo i lau Afioga i le Minisita.

Na pau lava si vaega e avatu ai nai tuualalo a lenei itumalo i le Tala Faatatau Faaopoopo 2018/2019 ma le Tala Autu o le Tupe ua i ai nei, ia o nai tuualalo lava i lau Afioga i le Minisita ma le Matagaluega, vaai foi i nisi o vaega o lea e le i pasia le tatou tupe a o lea ua vaai ua i ai tulaga e faamatuu atu ai le auaunaga i lalo o le Matagaluega o Leoleo. O lea foi e le i aumaia le tulaga aloaia i le pasiaina o lea foi fuafuaga o le a toe faamatuu atu le pasiaina o a tatou taavaleafi i lalo o le Matagaluega o Leoleo, ia sa faapena se fesili a lenei itumalo, sa faapea lava au ma lenei itumalo na o le tuuina atu o vaega foi na e i luga o le aualatele e vaaia le traffic i Malu o le Malo, a o lea ua toe avatu ai ma le pasiaina o tatou taavale. O le lagona lena. O lou popolega, pei o lea o le a tatou vaai i le tulaga lea, ae se i tatou vaai i le seleni foi lea e maua mai i le LTA, pei o lea o le a toe sau i lalo o le Matagaluega o Leoleo, a o le Matagaluega lenei o Felauaiga, o lo o tele le faatuatuga o le atunuuí

**FOFOGA FETALAI:** Malie le sui usufono ua tulai mai le faauilavea a le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, e taua lava le vaega lea ua oo i ai le saunoaga a le sui usufono, faamalo foi ua ia lagaina le mataupu lenei, ona o Tulafono lava ia tau fuafuaina o tupe a le Malo, o fea lava le Matagaluega e saili tupe ma maua ai tupe, e tasi lava le auala e faaiu i ai, e ave uma lava i o i le Matagaluega o Tupe. E i ai foi vaegatupe o lea e tusia i lalo o tupe maua i lau foi Matagaluega i le vaega lea o passport, visa, aemaise foi tatou tupe ia e auala mai i le tatou Va i Fafo, i le tulaga foi lea o le faaoga o le tatou domain name. O fea lava le Matagaluega e sau ai tupe ia, e tasi lava le mea e alu i ai, e alu lava i o i le Matagaluega o Tupe, ona vaevae mai ai lea, o le tupe alu i i, tupe alu i i, o le tupe alu i i. O le mafuaaga, o lea tatou te o i mea malamalama, transparency ma le accountability, full accountability ina ia malamalama uma ai lava mea uma. A fai se faiga faapena e maua ae lava tupe a le Matagaluega ia fai latou, e le mafai ona taoto i se tulaga maopoopo ma iloa lelei mea ia e faaalu ai, ona aumai loa lea i le Ofisa o Tupe, aumai lufilufi e aumai iinei i le Palemene. O lona uiga la, e aoao uma a tupe a Matagaluega, ave lea i o i le Matagaluega o Tupe faasoa mai e latou, tuu loa i totonu o le tusi lea tatou te talanoaina o le Budget, o le mea lena e faigofie ai ona iloa le mea e sau i totonu, iloa le mea e alu i fafo. Ae a nunu loa le toau i mea faapena, sao loa ma mea faaletonu.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Na ona ou faapena atu aua e le mafai ona iloa atu mea e ono fai i tua ona alofia ai lea o le sau o oe i ala o mea, sau i totonu o le Palemene e oo i ai outou finagalo ma lufilufi atu ai i vaega eseese o le atunuu.

Lau Afioga i le Fofoga Fetalai, o lou fiafia lena ua laga mai e le sui usufono ona e malamalama ai vaega eseese ia, ma o le mea lena sa aumai foi e le vaega ia o le LTA. E faapefea la matou tupe ia matou te tua i ai? O le tali, e leai ni mea tou te tua i ai faalilolilo, e malamama uma mea uma, e tasi lava le auala e agai i ai mea uma ma faasoaso mai ai i ina. Ia lau Afioga, i lou faamoemoe ua manino si na mea, ae ou te faafetai i le sui usufono ua na laga, o lea ua mafai ona maua le avanoa e faamalamalama atu.

**FOFOGA FETALAI:** O lea ua matau atu o lo o tulai mai le Minisita o le LTA, sina faaopoopoga?

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese):** Faafetai i lau Afioga i le Fofoga Fetalai mo le avanoa, na ona toe fia faaopoopo i le saunoaga a le Afioga i le Palemia. Ou te manatu o le isi mataupu lea e ono lagalaga mai i saunoaga a nisi foi sui usufono e le i saunoa i le Maota. O lea mataupu lau Afioga, o lea ua taatia i lumamea nei le teuteuga o le Tulafono, e aofia ai la ma vaega ia e lagalaga mai foi i le lipoti a le Komiti o Tupe Maua ma Tupe Totogi a le Palemene. Ou te manatu la e tatau ona avatu se faamatalaga i popolega ia, aua ou te manatu o popolega lava lea i le mea lea e pei ona fesiligia i tupe ia a le Pulega o le LTA, ia o lena ua saunoa atu le Afioga I le Palemia, e alu uma lava i le taga a le Malo tupe ia. A o le fuafuaga la lea ua taatia mai nei, ia transparent le faaogaina o tupe lea e faaoga e le Pulega, aemaise lava la le fesoasoani i tupe maua a le LTA e fesoasoani i le faiga o a tatou auala, a o lea e manino lava i amendments o le a alu uma lava i le Matagaluega o Tupe, tupe maua lea sa le maua e le Pulega ona o lea o le a alu mo le laiseneina o taavale ma le laiseneina o avetaavale, o le a ao uma lava la e le Ofisa o Leoleo, e alu uma a i le Treasury tupe ia o le a aoina e le Matagaluega o Leoleo. E pei o le tulaga lena, a o isi popolega ia faapea o le a maua le tau faaopoopo ona o le a saili foi i ni fale foi nei e pasia ai taavale. A o le fuafuaga lea e i ai, e toe faaoga uma lava e leoleo fale la e i ai i Upolu ma Savaii o lo o i lalo o le vaaiga a le LTA. E leai se tupe faaopoopo i le tulaga lea.

Ma isi vaega ia e popole ai le Komiti o Tupe Maua ma Tupe Totogi, o le faigata o feoaiga o mea o conflict of interest e masalo e mafua mai i le aafiaga o tagata faigaluega, o lea ua tapena uma lava le tulaga lea. E pei la o le tulaga foi lele ona o le fuafuaga foi a le Matagaluega o Leoleo e toe o atu nisi e fia auauna i le Matagaluega, e auai i trainings foi nei ina ia agavaa ai ma toe maua le agavaa e mafai ai ona auauna e aveai ai ma sui o le Malo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua**

Ia o lea e le i talanoaina le tatou Tulafono lea Teuteu, ae ou te talitonu e address uma ai lava tulaga ia, ae na ona faapupula atu o mataupu ia, aua ou te iloa e toe lagalaga mai i nisi saunoaga. O lea foi ua saunoa manino le Afioga i le Palemia mo le tapenaga foi o lo o tuuina mai i le tatou Tulafono Teuteu lea, e aafia ai la le faamatuu atu o isi matafaioi lea sa i lalo o le LTA i le Matagaluega lea o Leoleo.

Atonu o se faamatalaga lea e fesoasoani atu ai i le mataupu lea. Ma lou faaaloalo lava. Faafetai.

**FOFOGA FETALAI:** Ia, ua manino auofala e tusa ai o mataupu sa laga e sui usufono mamalu.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, e malamalama lelei le sui usufono lenei, sa ou faapea foi e tulai mai le Minisita e lagolagoina lea vaega ina iaí aua o le LTA, pei o le isi vaegatupe lea sa tua i ai latou aemaise lava o le Minisita lea i mea tau auala lea e masani ona lauga atu ai matou ae fai mai e le lava le tupe, a o lea la ua sau le paketi leaí

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le taua o le itu lea, ina ia silafia ai e le o nofonofu le Minisita o Galuega, o lea e taumafai e faatino uma finagalo ia e faaalua, o le ala foi lea e taua ai, aua e taoto mai loa tatou auala, ona faatulaga lea e le latou Matagaluega le faagasologa o galuega, le priority. Manatua foi la a faataoto loa priorities e faatulaga le faasologa o galuega, e le nofonofu le Minisita, e o ma lana Matagaluega ona o lea tilotilo lelei lava i auala, aua e moni o lea tou te aumaia o outou o faipule o itumalo le tulaga o auala, ae manatua foi, e tele auala sa faatino i isi Paeaiga muamua atu. E o la le Matagaluega e vaavaai ona faatulaga loa lea e latou le faasologa, ona omai loa lea ave le latou fautuaga i le Matagaluega o Tupe ina ia atoatoa, e tatau foi la i le Matagaluega o Tupe ma le Minisita, ona silasila totoa i mea ia, aua o le latou matafaioi lenei e faatulaga ai e tatau foi ona o latou e vaai. E pei la ona ou tau fesilisili atu ai i le aso ananafi i le sui usufono mo Falealili i auala ia, ona o le aumaiga o auala ia ananafi e matua tau mai ai i i le tele o le faataua. A o le tele la o le faataua o auala, e tatau foi ona matou tilotilo i ai, aua e aumai outou finagalo ae le o pogisa la le Kapeneta e faatino, e matua o lelei lava tilotilo i ai i le tulaga o auala ona faataoto loa lea. E leai lava la se mea e popole ai aua afai lava e silasila le Minisita o Tupe ma i latou o lo o lagolagoina le galuega i le taua o le mea nei, o lona uiga e sau lava i ina e tele foi le vaegatupe e faataoto mai e fai ai fuafuaga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Manatua o le keke a tatou lea e faasoa, e le femeiai le keke e tumau lava le keke. A faasoa la le keke lena, e tele loa le fasihekeke a le isi laitiiti le fasihekeke a le isi, ae o lea e taua uma a mea ia, o mea e tatau ona fai falemai, e tatau ona fai faleaoga, e tatau ona fai le a ma le a ma le a.

A o le tulaga la lena, e faatoa maua le ata atoa o mea e fai, ma le tupe e tatau ona alu ina ua aumai uma tupe i totonu i i, ona lufilufi atu ai lea ma latou aumaia le fautuaga i le Kapeneta, aumai foi le fautuaga i le tatou Palemene nei e auala i la outou Komiti o Tupe. A o tatou i ai la i le Komiti o Tupe ma isi Komiti, o le taua ia o le mea lenei lau Afioga i le Fofoga Fetalai, e valaau Matagaluega e omai e fai a latou molimau. E i ai foi la ma isi e valaau i isi mataupu eseese po o mataupu e aafia ai le atunuu, e valaau e le Komiti. O le process lena o lea e faaigoaina o le consultation i lalo o le good governance principles. Ia manatua foi o good governance principles, o auala ia e limataitaiina ai Malo, faigamalo lelei. Muamua, o Tulafono ia manino mea uma. Lua, o Tulafono ina ia aua ne i i ai se tulaga foi lea e i ai ni tulaga e le manino ai po o ai na faatinoina lea galuega a o ai foi na faatinoina lea galuega, pe sa lelei foi ona faatino ma tapena mai lipoti. O le ala lena e taua ai le omai o Matagaluega lenei ina ia latou silafia, ia update uma lipoti, aua e leai se aoga e aumai ai se lipoti e tuai mai ae aumai ua tolu i le fa tausaga ua tea. E tatau lava ona uma le tausaga ma aumai le lipoti e silafia ai e outou le mea la ua i ai le galuega ma le tulaga o le faagasologa. O le tiute la lena o Komiti, valaau i latou nei e omai ma isi foi sui o le atunuu. O latou la ia e omai, ua i ai lo latou talitonuga i luga o le amanaia o Tulafono a le Maota lea e limataitaiina ai galuega a latou. O a Tulafono? O Tulafono o le confidentiality, o a mataupu latou te avatua ia te outou, o la e i ai lo latou silafia. Manatua o Ofisa Sili o Pulega o Matagaluega o laua, e malamalama lelei i galuega o lo o latou faia, malamalama lelei i Tulafono e limataitaiina ai latou galuega ma molimau e aumai i luma. O la e nofo talitonu o mataupu uma latou te avatua e confidential, o lona uiga e tou te tausia lelei i le tulaga o le faamaoni, e tou te faaogaina ina ia aumai ai lipoti ma fautuaga i le Palemene, aua e manaomia e le Palemene lenei a outou Lipoti ina ia sao atoatoa. Ae afai la o lea e saofai ai le sui usufono na te faalataina le tulaga o le liki i fafo o mea, a o lea e avatu e fesoasoani ia te outou, lea e lipoti atu ai ia latou o le aufaigaluega, e iloa loa e latou o lea e saofai ai le faipule le faatuatuaina, le faipule e nofo ma faamama i fafo a latou fautuaga, e leai ma se CEO, leai ma se Ofisa Sili o Pulega e toe avatua ia te outou le mea moni, na o mea pepelo, mea pepelo, mea pepelo mea e avatu ia te outou. Aisea? Aua foi o la ua o latou te iloa o lea e saofai ai i totonu Iuta le faalata e faasalalau mea ia e tatau ona aumai i se tulaga faalilolilo e mafai ai ona faapea le isi Ofisa Sili o Pulega o Matagaluega, o le faaletonu lea e mafua ai le mea lea, o le Minisita e faaletonu, o le Ofisa Sili o Pulega la e i o, o lea e i ai le avetaavale o lea na te faaogaina le taavale i tulaga faaletonu.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E le mafai ona toe avatua e se Ofisa Sili o Pulega po o se tagata mai fafo se lipoti amiotonu ia te outou aua o lea e iloa o lea e solomua mai i le Komiti le le amiotonu. O le mea lena e oa ai a outou lipoti, o le tausisi ia tatou Tulafono, o a mea e avatu ia te outou, e avatu ia outou i le tulaga e lafo atu e tou te faaaogaina, e aumai i totonu o le Palemene lena i le tulaga o le amiotonu, ma ia aua ne i mama se lipoti i fafo. Lau Afioga i le Fofoga Fetalai, o le fesoasoani atu lena, e taua tele mataupu ia, ua oo foi i ai ma leo i lea vaega, ona e i ai pea tulaga o lea e oo mai ai fautuaga a outou ia te au mai aso ua tuanai. E fiu e valaau le isi CEO e le sau, ae tuli mai le vaega foi lea i lalo. O le isi lena auala e le fia o mai ai ni CEOs, ona e iloa e fia o mai e aumai faamatalaga, e taua mo la outou faatofalaiga. Ae o le faalavelave o lea e saofai ai ma isi i totonu i i, e o faasalalau a latou molimau ona ono aafia ai lea i le Tulafono. Lau Afioga i le Fofoga Fetalai, o le tulaga lena ina ia faataua foi e a outou Komiti ia lipoti e o mai molimai ma avatu. E le gata o le afaigaluega a le Malo ao tagata lautele. E le iloa foi pe tasi lena auala e le fia ai a tatou Komiti e valaau tagata lautele e o mai e fai a latou molimau, ae le o mai, ona o le tulaga lena, latou te iloa lelei. A faaali so latou taofi, e i ai a le e alu foi faasalalau, aemaise pe a totogi tupe e ni nusipepa. Manuia la tatou Fonotaga.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai....e na o sina mea lava e faamalamalama. Leaga e agai tonu mai lava ia te au le saunoaga lea. Lau Afioga i le Fofoga Fetalai, o lo o manino lava le Tulafono a le Tulafono Tumau a le Maota. O le taimi lava e o mai ai i i.....o le a le mea e ala ai ona laga faamatalaga, tasi lea fautuaga.....i le Palemia ma lana faigamalo, aua le nanaina, aua le faapogisaina le atunuu. E tatau ona malamalama le atunuu i mea ia.

**FOFOGA FETALAI:** Alala mai i lalo le sui usufono.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e toe pau lava lea o le tulaga.....o le mea e fia faasao..... Lau Afioga o le mea e fai faasao, ou te le i taua se igoa o se sui. Ae o lea ou te manatu nei, o ia lava na alu ma faasalalau o ia lea, na sui lana Komiti ua nofo ma faamama mea i fafo. O ia lava na nofo ma faasalalau. E le o se isi.

**FOFOGA FETALAI:** O le saunoaga a le Palemia, e faamalamalama galuega ia ma le afifio ma le tala mai o aao o Ofisa Sili o Matagaluega ma Faalapotopotoga a le Malo, i Komiti eseese, ia malupuipua a latou fautuaga ma a latou lipoti e tuuina mai i le Komiti. E le faakagego ia tulaga ma e le tiu talaloa foi i le tulaga o le malupuipua. O a tatou Tulafono na.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E le mafai ona mama i tua i le tulaga o fautuaga ma molimau e tuuina mai e Ofisa Sili o Pulega o Matagaluega ma Faalapotopotoga a le Malo, pe a amia e le Komiti. E aoga e le faapitoa manu i le Komiti o Tupe, a o Komiti uma a le Palemene, ia tausisia le tulaga lena o le malupuipua. O molimau ma lipoti e tuuina mai e Ofisa Sili o Pulega o Matagaluega ma so o se Samoa e sau e aumai se molimau i la outou.....i se Tulafono Tau Faaofi, po o le a lava o lo o feagai ma le Komiti a le Palemene. E aoga le saunoaga e faalauaitele le tulaga lea. E le mo na o le Komiti o Tupe ae aoga mo Komiti uma a le Palemene. O le sui usufono foi o lo o saunoa nei o le Vaimauga, ua afu le soifua o tautua i le Malo, o lo o manino. E po o fea lava e agai i ai e tasi lava le faamalua. E tele lava magavai ae tasi lava le mata o le vai ma le faamalua, o le Malo, o le Matagaluega o Tupe.

Tulai mai lau Afioga e faaauau le saunoaga.

**Afioga SULAMANAIA FETAIAI TAUILILI TUIVASA:** E i ai lou atalii ua valaau i ai le Atua, na tagatavaleina foi e nisi foi le taupulea. A uma Fonotaga nei a le tatou Malo, ona ou alu atu lea i lou atalii, fai mai si ou atalii ia te au, "dad na pa se pomu", ou fai atu, ioe na pa le pomu. E lauga loa lou tama pa le pomu. A lea ua pa le pomu i le Palemia ma le sui o le Itu Agai.

Lau Afioga i le Fofoga Fetalai, o le Tala o le Tupe lea e aumai, o lo o matauina ai foi i totonu, le tele o avanoa o Matagaluega a le Malo e le o faatumuina. O le tele ia, o ai e tuuaia? O le mea lea na i ai na faifai mai tagata i le tatou Faigamalo, ona o faiga faavae. A faapea o le PSC, o le a le mea e le faavavevave ai ona faasalalau avanoa. Po o Ofisa Sili o Pulega, o isi Matagaluega po o le Ofisa o Aoga e selau limasefulu. Oka, a o lea e fia manaomia e o tatou tagata tupe maua e faatino ai auaunaga. O le ala lea a outou Afioga i Minisita aemaise foi o Ofisa Sili o Pulega o Matagaluega a le Malo, faavavevave le auaunaga. O le mea lena o lea e inaina ai le taitai lea. E tumu ai foi le atunuu e o i ai, ona o le a? E le o faatino foi la outou pitolaau o outou o Minisita. O lea seiloga lava e o tagata i luga i le Palemia faatoa.....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea e fia faasao...

**FOFOGA FETALAI:** Malie lau sui usufono mo Vaimauga. Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E le o se mataupu fou le mataupu lenei, sa laga foi ia tatou Fonotaga talu ai, ia le mataupu lea o le faasalalau o avanoa e le faatumua.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le tulaga lea e i ai lo tatou Malo, o lo o tupu pea tupu pea ia galuega a fai. E i ai foi isi faaopoopoga o tagata faigaluega i le tausaga lenei, e faapena foi i le tausaga fou. E tupu pea, ma e manaomia ai ni tagata faigaluega. Ae o le a agai i ai lau upu mulimuli, ae na o se fesoasoani atu.

E i ai i latou e talosaga i avanoa, e le faapea e leai ni tagata e talosaga. Ae o le faatulagaga o avanoa nei, e i ai ma tiute manaomia ma tomai manaomia. Aemaise lava la i tulaga maualuluga ia ua oo i ai. E le mafai ona soona tuua i ai ni tagata faaletonu. O le ala lena e i ai taimi e faasalalau ai, ae ua le iloa pe toalima ea pe toaono, ia avanoa o Ofisa Sili, e leai lava ma nisi na o le taitoatasi na tusi talosaga i ai. Ae i ai le mafuaaga, o le mafuaaga o la lava e iloa e isi, e mafua ona le talosaga ona e le qualify o le latou lava lena manatu e le agavaa. O le tulaga lena, e alu i luga o agavaa, o le poto masani, agavaa i le faatinoga o galuega, faapena ma pasi sa aoga ai. E i ai le isi avanoa o le avanoa o le isi Faatonusili, e feoloolo lava tagata sa talosaga. Ae avatu i le Kapeneta ou tilotilo atu i ai, e i ai ma le isi tagata faatoa faauu faatoa foi mai, e le i i ai se poto masani i le faatinoga o galuega. O le mafuaaga lena, e le mafai ona soona tuuina i totonu, i latou o lea e valaau. O e foi e filifili e le tatou PSC e faia talanoaga o avanoa nei, e le o ni tagata faaletonu. Ona aumai foi lea i le Kapeneta, aua e masani lava pe toatolu pe toafa, e faia le faatalanoaga. Ona aumai lea i totonu o le Kapeneta, manatua la e toatolu la e fai le faatalanoaga ae toa sefulutolu lea e saofafai atu i totonu o le Kapeneta, o isi foi tagata sa taitaia foi ia Matagaluega ma isi Faalapotopotoga e pei o Pisinisi ma mea faapena. E le o ni tagata faaletonu lea e saofafai atu i totonu o le Kapeneta.

O le tele lava la pe a ma le 90% o fautuaga e aumai i lalo e aumai lava talia. E i ai la le 10% e ono malamalama lelei i ai le Kapeneta i se mataupu, po o ni mataupu e le i oo i ai ni suesuega a le panel, ona sui ai lea i ina e le Kapeneta ia faaiuga. Ae o le eseese o le tasi ma le lua ma le tolu, e manifi lava, ways are play difference. E tai pei o le manifi o le tafi lea e sele ai le ava se i tulou, o le matua manifi lava. E soo se isi lava o i latou, e mafai ona faatinoina le galuega ae taumafai lava le Kapeneta ina ia silasila totoa, vaai totoa i le fautuaga lea e aumai ma agavaa o i latou o lea e aumai. Lau Afioga i le Fofoga Fetalai, o le tulaga lena, e i ai isi e matua lelei le tulaga o pasi, lelei ma maualuga le agavaa, ae i ai lava ni nai mea faaletonu. E faaletonu le commonsense lea sa taua i le aso ananafi. Pe i ai nai ona ila, e le i oo i ai le faatofalaiga a le Komiti ae o lea e silafia lelei e le Kapeneta. Lau Afioga i le Fofoga Fetalai, e pei o le tulaga lena, e le o se lape la i le Malo, ao le tulaga o tagata o lea e i ai e le talafegai ma galuega o lo o faatino. Masalo po o le isi lua tausaga tolu tausaga, ona talosaga mai lea, ona maua loa lea o le tulaga lea. E i ai le isi, o la e faamasino nei, ae na ma talanoa i le taaloga o le ta polo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Fai mai lea o le saunoaga a le sui, "se e faafitu ea pe faavalu ona ou talosaga, o au ua ou manatu ai po o le mea, o i ai se faiga faale lelei, na ou talosaga i le Ofisa Sili o lea Matagaluega. Ae o lea ua piki au, ou te Ofisa Sili o Pulega i le Matagaluega lea, ua ou tilotilo atu, e sao lelei le Komiti lea na faufautua, o lea ua ou iloa e au o lea faatoa ou agavaa".

Lau Afioga i le Fofoga Fetalai, o le tulaga lena e le faigofie lenei mea o filifiliga. Sa laga muamua foi, ae tele lava mau mataupu. Se ta te musu.....masalo pe atoa le vaiaso o talatalanoa atu i mau lavelave eseese e aafia ai faaiuga e tatau ona silasila totoa i ai le PSC, o le panel po o le Komiti lea latou te faatalanoaina, faapena ma le Kapeneta pe a oo mai. Ona faatoa fai ai lea o le faaiuga. E i ai le isi tofiga a le isi faalapotopotoga tele lea e i ai nei, e faafa lelei ona aumai le fautuaga ma toe fiki i tua, ona aumai le fautuaga ae o lea e iloa lelei e le Kapeneta, le faaletonu lea na aumai toe fiki i tua. E faafa lelei ona fai, faatoa sau ai loa lea tilotilo atu le Kapeneta, o le tagata tonu lea o lea e manaomia e le Kapeneta. Lau Afioga i le Fofoga Fetalai, o la la ua galue ai nei, o le matua lelei lava.

Lau Afioga i le Fofoga Fetalai, o le tulaga lena, o le filifiliga e le faigofie.

**FOFOGA FETALAI:** Malo. O lena ua.....ona o lea e tulai mai le.....sei tuu atu muamua le avanoa i le Minisita.

**Susuga Hon Papaliitele Niko Lee Hang:** Faafetai mo le avanoa lau Afioga. E na ona fia malamalama lava i le saunoaga a le sui mamalu. O lea e matau atu ua amata ona ote mai ia matou nei o Minisita. E le o malamalama la lou Minisita po o le a tonu lava....o lea ua saunoa le Afioga i le Palemia, masalo la o le tulaga lea o tagata faigaluega. Ae o lea e pei o lea e faasaga mai le ote ia matou. O lea la ou te fia malamalama. A faapea o lea o le a amata ona pomu mai matou i au pomu, ae se i faasao mai lau saunoaga ia i matou. O lea foi e fesiligia e nai Minisita ia po o ai tonu ia e faasaga i ai lau lauga, faamolemole faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ua tulai mai le Minisita, o mataupu uma lava e fitoitonu i lea Minisita ma lea Minisita. Ia te au lava ia o la e faatino i le atoatoa. E i ai foi taimi e mai lava i le amataga talu ona ou tulai mai e avea ai ma Minisita, fai ai ma fai fetuunaiga foi a le Afioga i le Tootooalii, mai i lea taimi i lea taimi. E faapena aga o.....e le pitoa la ia Samoa, e faapena foi i atunuu i fafo. O isi fetuunaiga o le tofi e fai toetiiti lava oo i le taimi e fai ai faigapalota. Ae ou te faafetai i le Afioga i le Tootooalii, i na faiga na fai i na ona aso, ua tele ai lou avanoa e faalautele ai lou malamalama i lea Matagaluega ma lea Matagaluega ma lea Matagaluega sa fetuunai ai tofi ma ou galue ai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le taimi na tofia ai au i le tausaga i le 1991 e avea ma Minisita mo Turisi, faatoa ou malamalama ai foi lea i mea faaturisi. Na ona tofi lava o au ou alu ai lea i Fiti i le fono faaturisi. Ou te alu atu ua taufua mai ia Tutuila, ua fai soo lava le tala lea, oi ia Fiti, ona ou fesili lea po o a ia mea? Ae fai mai o le latou festival.

Ia na ou foi mai lava fai mai oi lea oi lea na o le faaaoga faaaoga nei Malo e i ai foi le festival a Hawaii, Tahiti e faaaoga ai fugalaau eseese. Ia ona ou foi mai loa laia lea, fautuaina le Kapeneta ina ia filifili se tatou fugalaau e iloa ai Samoa, lea na filifili ai le teuila. Ia outou manatua foi o Niu Sila o le latou fugalaau e iloa ai Niu Sila e le o se fugalaau ae o le siusiu o le olioli, o le lau olioli. Lea la e tou te vaai a oo i le taimi e taaalo ai le All Blacks e o mai e tou te vaai atu e tu mai i le pito o le ofu ia le ata o le laulaau o le olioli.

O isi atunuu e faaaoga le aute, o isi atunuu e faaaoga le mosooi. O tatou la na tatou filifilia le teuila ma le mosooi. Ia ona uma ane lea, tatou ua lafoaiina lau mataupu i totonu ae ato i tua e Tofilau ma le Kapeneta ia le mosooi ona e le umi ae vaai atu ua mamae. E moomia e tatou ia se fugalaau e umi ona lelei. Ia ona tatou lafoaia lea ae faalogo atu ua apo e Tutuila faataitai mai foi Tutuila latou ma le faigamalo, ua fai foi ma faataitai mai foi latou.

Ia o nai mea la na sa fai ma ou sao, semeamanu e oo mai nei e leai se Teuila. Ia ae ua ou alu atu kopi mai i Fiti, ia o le lalolagi lenei mo mea o le lalolagi e fekopiai. Tatou te o atu kopi mai mea lelei mai lea atunuu ma aumai fai ai le tatou Malo. Ia o le tulaga lena lau Afioga i le Fofoga Fetalai, ina ia manino ai ia lea vaega i le tau faamalamalamaina o mataupu i le fesuaiga o tofi, lea la ua faigofie ia te au ona ou malamalama i lea mea ma lea mea ona o fesuaiga o tofi. O le isi lea vaega o le fesuaiga o tofi, e faalautele ai le malamalama, o le upu foi lea, variety is the spice of life. Ae o le eseese o mea fou e te faafeagai ma oe, ia o le suamalie lena i le soifua.

Lau Afioga i le Fofoga Fetalai, ia o le faamatalaga lena te i foi ua toe sau ai se manatu ae o le mafuaaga lena ea ala ai ona ave lau faatuatuaga i Minisita. Po o le a lo outou vaai mai foi, leai o uiga na o faatinoga o galuega a le Malo. A i ai le Minisita e alu i fafo, ia ona ou tauavea lea o tofi. E mafua ona ou faia le mea lena, ina ia ou malamalama ai, i le mamafa o le avega lea e tauave e le Minisita, fesoasoani ai lea ia te au e fetuunai ia tofi, ia faamama isi tofiga ia ua mamafatu, i le isi Minisita ae tau faasoasoa mai i isi Minisita.

Lau Afioga i le Fofoga Fetalai e pei o mea na o lea ou te tau matau atu e le o malamalama i ai ia outou, i faiga faa-Kapeneta o lo o faatino ai. E le o ni faiga fou o la foi e fai e le tele o atunuu o le lalolagi.

**FOFOGA FETALAI:** Ia se i tulai mai le sui usufono o Palauli le Falefa.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai, o le fesili a le sui usufono mamalu o lo o saunoa nei, i mea o avanoa, avanoa e le faatumuina. O Matagaluega sa taua ia le Matagaluega o Aoga, o le Matagaluega o Aoga, e 150 avanoa o Faiaoga. O le faigata ia ona faatumu, e na o le 2 pe 3 avanoa o le administration, a o avanoa foi na, e a foi lea, e pei o mea lea ua ou tau.... leaga e tasi lea vaega taua o le faatalanoaina o le auiliiliga o le Tala Autu o Tupe i le taimi e faatumu ai ia avanoa.

Ma o le staffing table lea sa aumai faatasi ma le Tala o Tupe, e 4 po o le 5 vaiaso a o le i faia ia le faatalanoaga o ia avanoa. O le faamatalaga a Ofisa Sili o Pulega o Matagaluega, o le tele o avanoa ia, ua faatumuina. O le isi Matagaluega e tele avanoa o lo o i ai, o le Matagaluega o le Soifua Maloloina. Ae o le faamatalaga foi a Ofisa Sili, o lo o i ai avanoa ona o le tuufaatasiga. O lona uiga, e i ai ia galuega e ono felaasai, o lo o fai le review, ia faatasi ai ma i latou o lo o aoga i le NUS e faatumuina le tele o avanoa ia.

A o le lautele lava o avanoa i isi Matagaluega o lo o faagasolo le faatumuina lau Afioga i le Fofoga o le Fono. E i ai foi isi Matagaluega ua amata ona vaavaai e toe faatulaga a latou galuega, po o toe moomia ia galuega pe leai o le faasaoina o tupe ma lou faaaloalo lava.

**FOFOGA FETALAI:** Ia malo.

**Afioga Hon Loau Sola Keneti Sio (Minisita o Aoga, Taaloga ma Aganuu):** Lau Afioga i le Fofoga Fetalai....

**FOFOGA FETALAI:** Ia se i tulai mai le Minisita mo Aoga.

**Afioga Hon Loau Sola Keneti Sio:** Ia na ou tulai atu lava e faamalamalama atili o lena ua saunoa atu mai ia le Sui Taitaifono o le Komiti o Tupe. Ia masalo o le auga lea, o lea e taua le fuainumera e 150, ia e pei o se fuainumera tele, ae o le auga atoa lena. A tou matau foi o lea e pisapisao foi ia lo tatou atunuu i le tulaga lea e faapea o le lelava o faiaoga, shortage of teachers, ia o avanoa la lea, ae o le Primary School. A matau i le Primary School e 8 vasega, ia o le isi Primary School i le taimi nei o la e 4 faiaoga, o lona uiga e na o le 4 faiaoga ae 8 vasega. O lena la e avanoa le 4, o lo o tilotilo foi la i ai ina ia mafai ona faatumu le tulaga lea.

O le isi mea o a tatou faiaoga foi ia e iu mai i uta i le NUS, e tele ina fai ia latou faauuga ia Aperila. Ia ua uma le Tala o le Tupe e tatau foi la ona tuu i totonu o le Paketi ina ia faapena ona i ai ia le tupe lena e faalagolago i le tologiina o faiaoga ia. E pei o le agaga lena, ae faafetai i le Afioga i le Sui Taitaifono o le Komiti o Tupe i le faamalamalamaga atili o le tulaga e pei ona taua e le sui usufono, ma le agaga faaaloalo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai, se e i ai lava nai vaega foi lea e fesoasoani atili i le mataupu lea. Faafetai ua laga mai e le sui usufono, po o le a lava le tulaga o lo o laga mai ai, a o le taua o le faatupu manatu.

E i ai le isi tagata Sinia o le isi Matagaluega e uma loa lava lana tiute, ona leai lea o sana mea e fai. Ia lea la na faatonu atu lea, a uma loa lau galuega lea e faatino e oe, ona e sau loa lea e te alu e faaoga lou avanoa lea i le isi 5 pe 6 itula o le aso e te fesoasoani ai e faatino isi galuega e te agavaa e fai. E fai atu i ai i le Ofisa Sinia lea, ae tee le Ofisa Sinia lea, leai ou te alu lava e fai ia lau galuega lea na tuu mai ia te au e fai.

O le faamatalaga lea e tau fesoasoani atu, tasi lea auala e mafua ai ona tau taofiofi atu, e le PSC ia Matagaluega. I le tupu ae lava o le manatu ona faapea lea ua moomia le mea lea e fai e manaomia ia ni tagata se toafa. O la e i ai le avanoa i le PSC e toe fautua ai i le Ofisa Sili o Pulega o le Matagaluega, e taumafai e tilotilo outou i tiute o Officials ia e i ai nei e tufa i ai na avanoa, nai lo o le tau faasalalau, ae o la e i ai avanoa o isi e le o faapea o galulue i le 8 itula o le aso. E le o faapea o pisi i le 8 itula o le aso.

Ae lau Afioga i le Fofoga Fetalai o le tulaga lena e tele lava le fact lea e i totonu o Matagaluega e tatau ona silasila totoa i ai ma o i ina e iloa ai le Ofisa Sili e ala. O le tilotilo a vaai atu i le tulaga o la e i ai isi e tatau ona faaoga, o mai i i e faaoga. Ma o le mea foi lena e masani ou talanoa ai i le Minisita mo Falemai, e pei lelei foi ona fai ma savalivali ane ma le Pule, savalivali ane e te vaavaai i le outpatient, ona e i ai taimi e oo ai i le toa 50 toa 100 tagata lea e fia o e vaai le fomai. Ae afai la e nao le tasi le fomai la e i ai, a o fea isi mau fomai, e tatau ona vaai atu loa e toatele tagata, 2, 3, 4 fomai e o ane e lagolago.

Ia o le ala foi lena o lea sa fai ai le polokalame lea a le falemai e tau avatu ia fomai i tua, e fesoasoani i le tulaga lea. Ae o atu foi fomai i tua, ia o isi e tea le taimi e tatau ona o atu ai ae faatoa o atu. Ia e le umi na galue, ae fai latou malologa fai mai e tatau lava ona malolo. O lona uiga ua alu le aso atoa pisi foi ia latou galuega i tua, ia ona o atu foi laia, ona faapena ona faifaiaga foi i le faatinoga o a latou foi galuega i totonu ae o lea ua maua mai le avanoa e faaoga ai ia o latou tagata.

Lau Afioga i le Fofoga Fetalai, e tele lava ia nai mau faafitauli ia e tulai mai, o lea e tau faasoa i ai e Minisita ma Ofisa Sili o Pulega o Matagaluega ia resources ia o lo o i ai i totonu, ina ia faaoga tatau. Ae taua lava ia le tou aumaia, ia o le isi lea independent source e malamalama ai foi le Minisita ma faatalatalanoa ai pea ma lana Matagaluega.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo faafetai, ia e faalagolago lava i le tofamamao, e fetuutuunai i le tulaga o lo o i ai, e le avea foi le naunau e faatumu avanoa, ia ae o le tulaga lena e pei ona saunoa faamalamalama le Afioga i le Palemia. Ia ae tulai mai le sui usufono o Vaimauga.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai ona o le taua o lenei taeao ma le lauga a lenei itumalo. E manatu le sui usufono, ia e pei o le tama lea o Elia ma Elisaia, sa taumulimuli lava le tama lea o Elisaia ia Elia i faamanuiaga, ia e le o po se lilo, o lea na faamanuia i ai ae le i alu Elia i luga sa aumai i ai ia faamanuiaga. E pei o le ala lena e meemea ai lenei itumalo ona o lea e tau matau atu o le tele o le taimi... le aanoa o le faauuga o lenei itumalo.

O lea e matau atu pei ua.... ae o le faanoanoaga, o lea e lauga atu i o i le Palemia a lea e toe tali mai lea itu. Leai, taatia pea, o le lauga a le Vaimauga o le mea tele. O lea e vaai i le lautele, fautuaga ae le o vaai o lea sa faataitai ai i le Matagaluega a Loau, o le Matagaluega. Ae lauga le Vaimauga o le mea tele lea e fai atu ai, o le aotelega o le Tala o le Tupe.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga i le Fofoga Fetalai...

**FOFOGA FETALAI:** Se i onosai le sui usufono, tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Masalo ua galo i le sui usufono o saunoa nei, o le afioga i le sui usufono lea sa saunoa, o le matua lauia lava o lauia. A foi e tolu nofoaiga o Minisita, Minisita tonu lava i mea ia tupe, Matagaluega mo Galuega ma le Siosiomaga, Matagaluega tetele ia a le Malo sa Minisita ai le Afioga i le sui usufono, lea sa tau fesoasoani mai, lea foi la e i totonu o le Komiti, o lea e tele lona sao i lena foi Komiti. I le tulaga la e pei ua ou vaai atu ua e tau faagaulemalie i i, o le mea lea e tatau ona e faia, e tatau ona e faafetai i le sui usufono, o lea ua tulai atu, e le o se sui usufono e faaletonu, o le matua toeaina lava o toeaina lea na tali atu ia te oe. E fesoasoani atu ia te oe, o oe o lona uso a sui usufono o le Itu Agai o le tatou vaega. Ia e tatau ona e faafetai i ai ae le tatau ona e sai.

**FOFOGA FETALAI:** Se i tulai mai le sui usufono o Vaimauga, o le lapataiga foi a le nofoa le sui usufono mamalu, se fai fuafua ia le feaveai o ou aao ua tali lavea ia fofoga o sui usufono o Siumu ma le sui usufono o Nuu Tu Taulaga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga SULAMANAIA FETAIAI TAUILILI TUIVASA:** Ia leaga foi e pule lava au o ou eleele ia ou te lauga ai. Lau Afioga i le Fofoga Fetalai e manaia le saunoaga a le Taitai, e faatatau i le tamaoaiga ia ma le sosia sa faaeaea ai foi i le sui usufono nei. Ae o le faalavelave e manaia le amataga ae leaga ia le faaiuga, o lea sa faalogo, ia o le fesili a le Minisita lea o Felauaiga, e lagona le...

**FOFOGA FETALAI:** Ia, se i toe tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o le tala foi lea ia Iosefa, na fai lana miti, na faaali i ai e le Atua e alu i luga, ae sauni e le Atua ina ia matua alu i lalo. O lona uiga, a vaai faaletagata, o la e sauni oe e le Atua mo mea tetele i le lumanai. Ma lou faaloalo lava.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o le saunoaga a le Minisita lea o Felauaiga, po o ai le Minisita lea, o lau Afioga lea e faatatau i ai, leaga sa e saunoa i le Maota lenei, e faapea le tele o le lisi a le Itumalo lenei o le a e kolosia. O le ala lena o lea e matau atu lenei itumalo e leai ma se mea ua faatinoina mai lena taimi e oo mai i le taimi lenei.

**FOFOGA FETALAI:** Se i tulai mai le Minisita mo Galuega, Felauaiga ma Atinae Eseeese.

**Susuga Hon Papaliitele Niko Lee Hang:** Lau Afioga o se mea e fia faasao, leaga o lea e faalogo atu e pei o le aotelega o le ote a le Afioga i le sui usufono mamalu. O la e fia malamalama ina ia mafai ona tali atu lava le Minisita lea e te faasea mai i ai, o la e manino ua e saunoa mai o au. Ia o lea lava e fai tapenaga o lou auala e te tatalo mai i ai, a o lea o ua vaai atu nei o lea o le a ave sao lava i le Kapeneta pe priority lou auala ona faatino lea, ae leaga o lea ua i ai foi le suiga i le faiga o auala, ae o lea o le a tuu pea i lalo o lau lisi, ona o lea ua e tuuaia au i au galuega, a o lea lava e tapena atu le galuega mo lou Itumalo. O lea ou te fuafua o le Tala o le Tupe lea e faatino ai a ua le lava lou onosai. A o lea faafetai o au lea e te saunoa sao mai i ai, taatia la isi afioga i Minisita e le o latou, ae faafetai o lea ua manino le mata o le vai. Ma lou faaloalo lava.

**Afioga SULAMANAIA FETAIAI TAUILILI TUIVASA:** Pei lava la ona avatu manatu i lau Afioga, sa tatau ona e lagolagoina, aua le aveesea le Matagaluega o le LTA lea e maua ai lau tupe lea ua toe foi mai i leoleo, ina ia tele ai le mea i lau taga e faatino ai. Ae ui i lea, ona o lea ua tele le matou talanoa ma faauilavea i le Tala o le Tupe ae le i oo sau tala i si ou itumalo i galuega atiae.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Ia, faauma mai loa le saunoaga a le sui usufono toe lua ou minute.

**Afioga SULAMANAIA FETAIAI TAUILIILI TUIVASA:** Sole e leai. Lau Afioga i le Fofoga Fetalai, e tele a mea sa ta fia talanoa i ai e pei o le saunoaga a le Afioga i le Palemia...

**Susuga Hon Papaliitele Niko Lee Hang:** Na o si mea lava lea faamolemole lau Afioga se i faasao pea le tuuaiga a le sui usufono mamalu, ou te le o auai i ai i le mea lea, ona o lou foi talitonuga lena ona o tupe ia o le a le maua e fesoasoani pe a uma le paketi e fai ai la auala ia e talosaga mai ai a outou Afioga, ae le faia e au se faaiuga o le mataupu, o la ua teuteu le Tulafono tuuina mai i le Palemene mo sana iloiloga foi pe a aulia le aso e talanoa ai, a o le naunautaiga lava lena. Ae peitai, o tupe lava ia o tupe e tasi e alu uma a i le Matagaluega o Tupe, faasoa mai e faatino ai galuega ia e masani ona faatino e le LTA. E leai a la se mea tatou te popole ai. A alu alu foi ua uma mai tupe o le paketi ua le maua se tupe a le LTA, o lea e maua le avanoa, e ave sao lava la i le Minisita o Tupe le talosaga ma faatupe pe a faapea e tatau ona faatino galuega ia. Ma lou faaaloalo lava lau Afioga.

**FOFOGA FETALAI:** Faafetai. Ia faaiu mai loa le saunoaga a le sui usufono mamalu mo Vaimauga Sasae.

**Afioga SULAMANAIA FETAIAI TAUILIILI TUIVASA:** Se ou te ofo Pulemagafa i lau faaiuga, ae ui i lea, pei lava ona ou fai atu e tumu le sui usufono lenei i le faaaloalo. O le tulaga i le tatou faigamalo, e pei lava o lea ua saunoa le Afioga i le Minisita, o lenei lava itumalo i ona auala galue o lo o mafai, aemaise foi o auala i le lotoifale lava ia, ua matua leaga faia lava. O lea e tuualalo atu ai e faaaloalo atu ai foi ia te oe aua o lea o le a e sau i le ta itumalo o le Vaimauga, ia se i alofa ane pe faatuai auala galue, a o auala ia i totonu lava o le lotoifale o nuu ia o Vailele, Fagalii, Letogo. Ia se i...

**FOFOGA FETALAI:** Ia se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, sa le tatau ona faalupea lau Afioga o Pulemagafa, o oe o le Fofoga Fetalai, o lea la ua aliali mai nei le mafuaaga, na lauga mai lava i le ta o le 9:00 lea la ua oo nei ina fai le tatou break o lea e lauga. O le a ea le vaiaso e faauma ai le lauga a...

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Ia ua silasila la i ai le sui usufono, ua maua taua talu ai oe. Ia, faamaea maia le saunoaga a le sui usufono.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai, e momoli atu le agaga faafetai ua tele foi atinae a leni itumalo sa fia talanoa i ai aemaise lava nai ou fanua, o lea lava e taliga se talosaga foi ma se ioega mai le Minisita o le Samoa Land, ina ia toe iloilo le tau o fanua o si o matou itumalo. Ae masalo ona o lea ua faalava le amoa, e tele lava mea sa ta fia talanoa i ai e pei o le saunoaga foi a le Palemia i tulaga i Ofisa Sili o Pulega o Matagaluega a le Malo, ia na ona tuualalo atu i a outou Afioga, se i alofagia faiga faaiuga ma faiga faavae o lo o aafia ai tamalii foi o si o tatou atunuu o lo o ave i ai le faatuatuaga. Ia o nisi o tamalii e oo mai i le taimi leni e le o maua ni iuga o faamasinoga, a o lea lava ua o i faaiuga a le tatou Palemene aemaise foi ole PSC i nisi o tamalii sa faauluulu i ai le Matagaluega. O le tatalo a leni sui usufono se i alofagia, e tatalo atu o tamalii o le atunuu e tua i ai tatou, e lima ma vae i ai le tatou Faigamalo. A o le popolega, ina ne i toe foi mai ni sue aafia ai le tatou faigamalo e ala i a outou faaiuga ma tou filifiliga fai. O tamalii o le atunuu e matuai tumu i le agavaa, e i ai le tamaoiaiga i aoaoga i fafo ua foi mai e tautua si o tatou Malo, ia ae o le lave lea, e pei e faapena se vaai. O lea foi na malele le Afioga i le Palemia i le faiga o faaiuga e filifili ai sui usufono, ae pei o au lea ou te i lalo o le level lea e close i Ofisa Sili o Pulega. O nisi e ala ona le apalai, fai mai e le favour i le Minisita i le la va ma le Minisita. E fiu lava la e apalai e le pikia e le Minisita. Se i silasila ane i lea tulaga. O tatou ia na o le lima lava tausaga, a o le atunuu o lo o omai e tautua, e tatau foi ona tatou amanaiaina le tautua a le atunuu. E i ai lava le Matagaluega e le mafai ona tuu i lalo sa ta faafetai...

**FOFOGA FETALAI:** Ia se i tulai mai leaga e matuia le saunoaga a le sui usufono. Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, na pau lava lea o le mea e ao ona ou faasaoina, a uma le faatalanoaga, ona aumai loa lea i le vaatele i totonu o le Kapeneta ona fai lea o le iuga a le Kapeneta. E fai foi si feooloo o faaiuga a le Kapeneta e le faia ai e le Kapeneta le mea lea e manao i ai le Minisita, ona ua silasila le Kapeneta i le malolosi o mau tusitusia na avatu i le lipoti o faatalanoaga, ato ai foi ma le silafia e Minisita o le Kapeneta le tulaga o lea tagata na talosaga ma lea tagata na talosaga ma lana ia foi tautua. Ia manatua foi o Samoa leni tatou te i ai, toetiiti lava leai se isi e le... e iloa uma a e tagata le toatele i totonu o le service ma le faamaoni o le tautua.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Fofoga Fetalai, o le fesoasoani atu lena leaga o lea e matuia le lafoga lea e aumai, e te fiu lava e manao, ae a musu lava le Minisita e tofi oe e le tofia oe. O le ala lena e ala ai ona aiaia e le Kapeneta e aumai i totonu o le vaatele e fai ai le faaiuga ina ia le faapito augafa i tua e le Minisita ma sao ai la mea ia e saunoa i ai le sui usufono.

**FOFOGA FETALAI:** Malo faafetai. Ia leaga e matuia le saunoaga a le sui usufono. Ia, ma ua faapena ona faamalamalama. Ia o lou lava lena finagalo, ae le o faapena se mea o tulai mai. O le mea la lea ou te faamalie atu i le sui usufono ua maea lou taimi.

**Afioga SULAMANAIA FETAIAI TAUILILI TUIVASA:** Faafetai o lea o le a faauma atu le matou... Faafetai Loau, e le mafai ona tuua i lalo foi lenei Nofoa e le i avatu se matou faafetai i le tulaga foi i lou tulai mai, e le o po se lilo ua pisi ai si o tatou atunuu i tatou taaloga. Ia o ou mama na i le tulaga foi o taligamalo ma ua ou vaai foi i le lagolago a le atunuu i le tulaga ua tulai mai ua oo lava i nuu i tua i le teuteuina o faleaoga ma mea uma, o i lea e aumai ai le lagolago a le atunuu i tatou taligamalo ma le tatou faigamalo lenei. Faamalo o le tulaga sa i ai o mea na sa faatino e alii ma faipule e ala i le Minisita, ae ua ou vaai i le mea lea, ua oo i nuu i tua e pei lava o la e ua o atu atunuu ia e omai i fafo i nuu i tua. Ia se i alofa ane ma tuu i ai nai seleni i nai aoga ia.

Ia, a o se lagona lava faagaetia ou te faafetai i le Ofisa Sili lea o Faiga Palota, o i lea pei ua amatamea ai le tatou Paeaiga lenei i le malupuipua o le faiga palota lea e ala i le Komesina o Faiga Palota. E momoli ai lata ita faafetai ona e fiu lava tatou e fau Tulafono ae a omai lava i latou e talepe Tulafono ma e tele tupe i le faatinoga o nei mea o faiga palota, e le malu a le tulaga i Tulafono ia. Ae ou te faafetai lava i le Komesina ma le Pulega o le Palota, o lea ua amatamea ai lea foi itumalo. Ia faafetai i le Atua, o lata ita faafetai lea.

A o lenei itula e momoli atu le faafetai i lau Afioga i le taitaiga o le Maota, o le a foi se gagana a lenei itumalo ua paopapa, ia foi mai, foi mai i lenei itumalo. Ae tatalo i le Atua e faafualoa lou soifua aua le taitaiga o le sa o le atunuu.

Lau Afioga i le Palemia ma lau Kapeneta, ia o outou mama na. O lea e tele sui usufono na faamanuia atu i lau Afioga i lau taaloga lea i le Pasefika lea e faia i i nei, a o le sui usufono lenei, ou te le tapuaia lau taaloga, ou te manao e te alu i fafo i le World Cup, fafo, e le o totonu o le lotoifale lenei, e te fana i fafo e alu atu ai ma le sui usufono o Vaimauga e uua lau fana au e alu ai. Ia manuia le Fonousu a le atunuu.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo faafetai. O oe na e saunoa mai ia te au, e le lelei le fana a le toeaina, a o lea foi ua e nofo. Ia, malo faafetai, malo saunoa. Ia tulai mai lau Afioga i le Sui Fofoga Fetalai. Malie le sui usufono mo Faasaleleaga Nu.1 Sisifo se i tuu atu muamua le avanoa i le Sui Fofoga Fetalai, e i ai foi ona tiute faale galuega, e manatu ai e tuu atu le faamuamua i le saunoaga a le Afioga i le Sui Fofoga Fetalai.

**Tofa NAFOITOA TALAIMANU KETI (Sui Fofoga Fetalai, Gagaemauga Nu.3):** Faafetai. Lau Afioga i le Fofoga Fetalai, faafetai ua maua se avanoa o lenei itumalo, lea ua suia lona igoa, o Gagaemauga Nu.3, ua taua nei o le Gagaemauga Nu.2. O le paia lava aua le afio o le Aiga Sa Peseta ma lo latou Maopu, le nofo a Usoalii i le Faleiva ma le mamalu ia Matautu, tainane foi lau fetalai i le Aitu Tagata ma Satoalepai, le fale Fagamalo e faapea foi le faamaluga o Malo.

O lenei taeao ou te manatu o lea ua logologo pualilo nai olo, ua maea foi ona e foa le papa nai le pululauie e pei o le fetalai i le Alataua, ua e fai foi ma sui o Arona aua le viiga o le Atua Tolu Tasi Paia, e afua, e tataua ona vivii le mea na fai i Le na ia faia ia. Ona i ai lea o le manatu, nona laia, aua ua logo le lagi ae tau o se pa e togi tau i le ave, i Lana faafofoga e tusa o moomooga o lenei taeao, ina ia sologa manuia ma see malu le faiva o le Fonousu a Samoa. Ou te talitonu foi ou te fia laei i lenei taeao i titi o manaia, ma ou seisei i manogi o le laumosooi se i oo lona sasala i taelega o tausala, ae paga lea, ua toia au i le titi o pagamalie. O lea e afua ai ona ou ta le liu ma ou faatulou i le paia maualuga o le Maota i lenei taeao, ee ia lau Afioga i le Nofoa lau Afioga i le Fofoga Fetalai, malo le soifua, malo le tauatai. Ou te faatalofa foi i le afio mai o lau Afioga i le Taitai o le Maota lau Afioga i le Palemia, le paia o le Aiga Kapeneta, Aiga Minisita, e faapea foi Minisita Lagolago. Malo le faatoa, malo le papale, malo le onosai. Ou te ofo alofa ma faatalofa foi i a outou Afioga i Taitaifono o Komiti Faapalemene, e faapea foi le mamalu maualuga o sui usufono mamalu uma o le Maota i lenei taeao. Malo onosai malo le tofa. E le mafai foi ona alu loa sa matou faamatalaga e ao ona afe aua ua maualuga lenei itu o le Maota. A lafalafa a Tuna ma Fata, o outou o tupu o le atunuu. O lea e le alu loa ai se faamatalaga a Matautu. Malo galulue. O le tele o taimi e tuuina ai outou a o outou o lima ma vae o le Malo. Malo le onosai. Matou te faatalofa atu, o outou mama na.

E faatalofa foi i le Failautusi o le Fono, ma le maualuga o le Ofisa o le Fono Aoao Faitulafono aua le tautuaina o le Maota i ana galuega fai. Malo le galulue, faamalo le onosai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Se i taumafai se lagona o lenei itumalo, ae a le Tala o le Tupe e pei ona tauaaoina i lenei taeao e afua mai i le aso ananafi. E i ai le manatu o lou sui a usufono pe a vaavaai i Tala o le Tupe, ua manino auofala, ua leai se mea o toe faanenefu i la matou vaai. E mafua i se a? Lea e afua ai ona aoga a tatou semina sa faatino i na vaiaso ua tea atu, lea sa saunoa manino ai le Ofisa Sili o Pulega o Tupe sa faatino i le Tusitala. O lau vaai la i le Tala o le Tupe i lenei taeao mai lava i le aso ananafi, le Tala Faatatau Autu o Tupe Maua ma Tupe Totogi a le Malo, ae faapea foi le Tala Faatatau Faaopoopo Lona Lua 2018/2019 ua matua manino ma taoto aulape o mea uma, le faasoia ma le lufilufi lima lelei lau Afioga i le Minisita. Ua faamalo fai o le faiva.

A vaavaai lenei itumalo i le tulaga o le faasoaina o seleni maua a le atunuu atoa ma ana atinae, faafetai. E le faigofie, aua o le atunuu e le uma le manao, e pei lava ona faafofoga i ai le Maota i le aso ananafi seia oo mai i lenei taeao, o lea lava e tagi itumalo. Aisea? E fia faalelei ia nofo filemu ma nofo fiafia tagata o le atunuu. A o lea ua ou tulai e fia momoli atu le faamalo. Na manino lava le saunoaga a le Ofisa Sili ma faamaioio maea uma, e tele foi fesili na tuuina i ai, ae na matua matagofie lona faamatalaina. O le ala lea o le faigofie o le Tala o le Tupe i lenei itumalo ma le vaavaai i ai. O le matou tulai, tau lava ina faitau ane ai le itumalo i se matou faamalo ma le faafetai i lau Afioga i le Minisita o Tupe le o lo o tu i matagiolo taulamua i le faatinoina o le faamoemoe lenei. O le mea lea, e matua lagolagoina i ona itu uma. O le Tala Faatatau Faaopoopo o le Tupe lona lua 2018/2019, e faapea foi la le tulaga o lo o taoto ai le Tala Faatatau Autu o Tupe Maua ma Tupe Totogi 2019/2020. E le toe tele i ai se matou faamatalaga, na o le momoli o le faamalo. Ua i ai le manatu o lenei itumalo, ua tatau foi ona vave ona pasia le tatou Tala o le Tupe ae se i faagaioioi galuega a le Malo o lo o faatalitali mai. O le ala lea o le faafaigofie o so matou manatu ina ia vave ona faagaioioi ma faatino manaoga o itumalo e pei ona fofogaina e sui usufono mamalu.

Ona ou oo mai lea i nai motugaafa ma le vaavaai i le tulaga lautele ma le tulaga e tatau ona avatu ai a matou fautuaga faa-sui usufono, lau Afioga i le Minisita o Faiga Palota, e le toe oo se matou faamatalaga i le tulaga o Tulafono, ua taoto e leai se mea e toe suia, ae na pau lava o lea, o lona faatinoga. I le faiga palota na se i mavae nei le by-election a Faasaleleaga Nu.2, lea sa i ai le lipoti o le taunuuga o le faamoemoe sa faatino. O le ala lea ua matou avatu ai se fautuaga, se i silasila ane i ai lau Afioga, aemaise lava i matou mai Salafai, matou mai Savaii. O lea ua atagia i le faiga palota faatoa maea atu nei le tulaga o le faigata aemaise ua utiuti vaa. O lea e taua ina ua fesiligia, o le tulaga foi lea ua oo i le taimi ua lalata le taimi e tapuni ai fale palota a o lea lava e tumutumu, o lea e fia maua se avanoa e o ai i Savaii e faatino le faamoemoe e pei ona i ai le tofa a le tatou atunuu.

**19 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le mea lea e tuutuu atu i ou tafatafa, se i silasila mamao, ou te talitonu o le Fonotaga lenei e tatau ona avatu ai fautuaga, aua a avatu i le tausaga o lumanai i le fonotaga o lumanai, ua tuai. Ae silasila mamao i ai i se tulaga e cater i ai mea uma lava ia, o le taumafai e ave tagata o lo o fia palota i Salafai. Ou te talitonu foi e aoga le fautuaga e faatalanoa ai e lau Afioga ma le Minisita o Felauaiga i luga o le sami. E talosagaina e lenei sui usufono ma lenei itumalo, se i toe silasila ane i se faiga e tatau ai ona ta ifo le 2 ua oo uma tagata i Savaii aua o le 3 i le 4 lena e tapuni ai fale palota. Na pau lava lea o si vala lea fia fesoasoani ai, aua afai o le lipoti e afe tagata e le i palota sa fia o, e le i palota i le faiga palota lea sa fai, o le silasila mamao a lenei itumalo. A faapefea la pe afai e 20 itumalo i Salafai atoa, e fia se numera o le a le palota? Ona tulai mai lea o se faafitauli ma le justify ai le autu ma le auga o le faamoemoe ia palota tagata uma. O le agaga lea o lea e tau avatu ai se fautuaga.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le a se finagalo o le sui usufono aua o lea e i ai le tatou aso malolo e mafai ona malaga ai ae le i faia, po ua lava le tasi o le aso malolo pe malolo i le vaiaso atoa ina ia faasolosolo ai i Savaii i latou e o o le a ta le logo?

**FOFOGA FETALAI:** Faafetai i lau Afioga i le Palemia.

**Tofa NAFOITOA TALAIMANU KETI:** Faafetai i lau Afioga i le Palemia. Manaia foi le saunoaga a lau Afioga e faatupu manatu pea. Ae i ai lava le lagona foi lele i le upu a le atunuu, e le ogatasi a foi i isi taimi le futia ma le umele. E ese foi le naunau atu i le tulaga o lo o taumafai ai le faamoemoe. E le o le talosaga ia tele aso malolo, o lena e i ina le tofa. A o le auga o le faamoemoe, o le a se faiga e silasila i ai lau Afioga i le Minisita ina ia mafai ona faatino le faamoemoe. O le auga, a faafofoga lau Afioga, o le auga ia palota tagata uma. O le faamoemoe maualuga lena o faiga filifiliga, ae o le agaga e tuu atu i tafatafa, afai la o le lipoti i le by-election e afe ma ona tupu tagata e le i palota, aua o tala ia, ua matou o atu ua taofia matou i le vaa. A o le faamoemoe e fia tuli pea, aua e i ai foi faalavelave i lea aso ma lea aso. E faapena lava le faamoemoe lea e i ai. A o lau talosaga, tuutuu atu i ou tafatafa o lea e tele le taimi aua na pau lava faipule e alu i ai mafaufau i le faamoemoe lea, o matou nei mai Salafai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le ala lea o le talanoa atu i lau Afioga a o lea e tele e fua i ai le tofa ma le faautautaga i le tulaga lea ina ia lava tapena i ai ia mafai ona... aua sa ave foi lau fautuaga, a o lona uiga, e le o tagata lea o le a tuu i ai le faaletonu, o tatou i le faatinoga o le o o tagata i Savaii e cast a latou palota. Ua le mafai ona o, o lea la e i ai le instant fine lea po o le faasalaga lea, lea la o le a tuu i ai. Ia tailo, o le agaga lena. O lou a lagona e le tetee i le faamoemoe o Tulafono ua uma ona pasia i le Maota lenei, a o le agaga e faatino ai, se i toe silasila i ai i se tulaga foi lenei ina ia aua ne i afaina foi tagata, aua o lea e i ai le faasalaga e \$100 ma tulaga faapena. Na ona tuu atu i ou tafatafa a o lena e i ina le tofa i lau Afioga i le Minisita, o lena e i ina. E le mauualalo foi i le vaai i ai a lenei itumalo, a o ou mama na. O le palota i le 2021, e moomia le achieve o le goal sa i ai le faamoemoe o le pasiga o le Tulafono, ia palota tagata uma. Ia o le agaga lena o lenei itumalo.

Ou oo mai i le Minisita mo le Soifua Maloloina, faafetai malo galue, e ui lava e le i leva, ia ae i ai le talitonuga ua loa lau tautua i le Malo, ua e silafia mea uma. Ua matou maua i le matou itumalo, ua maea le asiasiga i le matou falemai i uta i Vaipouli, ua tafafao foi taliga o tufuga uli ma ua i ai sina faamatalaga ua i ai se fuafuaga e faatino ina ia faapena ona tapunia. O lau tatalo ma le faaaloalo ma le agaga mauualalo, faamolemole lau Afioga ma le Komiti Faufautua, pe mafai ona faatuatuai lo outou faamoemoe se i fonoa fale Fagamalo ma Vaituutuu se i talanoaina ai ona momoli aloaia mai lea o se matou fautuaga. E taua tulaga e pei ona maua i sa matou faalogo i le faamoemoe ua taoto, e ui lava ina le i pasia ma tulaga faapena, a o le matou tatalo, faamolemole, faatuatuai sa outou fuafuaga. E ioe lo matou talitonuga i o matou tagata, ua fai foi si faigata ona agai i uta, e le o i ai ni gasegase o taofia ai toe leai se fomai. Ia ona o le tofa na ae i le matou sui usufono i le taimi ua sola, e le toe oo i ai sau tala. A o le faamatalaga i lenei taeao, faamolemole lau Afioga se i faatuatuai ane la outou fuafuaga, e matou te moomia le falemai, matou te moomia. Afai o se tulaga o fia ave i tai, ua talafeagai lea, ae se i fonoa fale Fagamalo ma Vaituutuu ona oo mai lea o sa matou fautuaga. Ia ae malo galulue, e afua suiga, matou te talitonu e afua ona silasila mamao i le tulaga o le faafaigofie i tagata. E taua, ae na ona matou tautaualemau i lau Afioga, toe lava o se taimi ona fai foi lea o sa matou feiloaiga ma lou itumalo ona maua ai lea o se fautuaga lau Afioga.

Ona ou oo mai lea i le Minisita mo Aoga, Taaloga ma Aganuu. Se faafetai tele. E fia faaleo i lenei avanoa ua maua ua maea le faamoemoe sa talosagaina. O le mea lea o la e faafofoga mai lou itumalo, o le tala a toeaiaina e momoli i ai le faamalo e afua ai ona lagona le leo i lenei taeao. Faafetai. O lea e talitonu le matou nuu ma lo matou itumalo, e tele le faasoaa aua aoga a le atunuu, ae faafetai o lea lava sa faatino le faamoemoe i le taimi sa matou moomia ai. O lau pule lea, ia alofagia e le Atua lou tulai mai, maua lau tofa aua le faasoaina e le faigofie le tiute faa-Minisita o Aoga, aua o Aoga ma le Falemai, o lea e ave i ai le faamuamua a le Faigamalo lenei.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lona uiga e tele se avega o lena e feagai ma oe, mataitu ai tulaga uma. O ou mama na faamanuia le Atua, tulaga o le aga atu i taaloga, matou vaaia ma le loto fiafia. O lea na saunoa se tasi o sui usufono, e oo lava i Savaii e teu uma faleaoga, tupe e alu. A o le agaga o le lagolago ma le faamoemoe o le Malo, o la e atagia i Savaii.

Faafofoga la lau Afioga i le Minisita, pe le maua ni tagata e malaga atu i Savaii mai taaloga ia, a o la e atagia ai o matou loto. Pe matou te nonofo mai i Savaii, o outou mama na, aua taaloga o lea o le a alo i ai lo tatou atunuu. E lagolago lenei itumalo, matou vaai i teuga, faatinoga o mea uma, ia o lena.

E pau lava lea o si vaega e fia oo atu i ai, o le tulaga i auala, lau Afioga i le Minisita o Auala tetele. O le auala lea e alu i le Far & Range i Tafaigata. Sa ou i ai i le vaiaso talu ai, sa ou fesili pe fai ni taaloga faapena ona o le auala e le i teua. Na ona tuu atu faapena, afai o lava le taimi, se i toe silasila ifo i ai ne i te i ua galo.

**FOFOGA FETALAI:** Ou te vaelupeina le saunoaga a le Afioga i le Sui Fofoga Fetalai. Masalo e le o toe mamao....e le o toe tele foi se vaega o totoe. Ona o lea ua tatou toai taunuu i le tatou malologa masani. O le a faataatiaese galuega a le Fono Aoa mo lana malologa masani.

*Na faataatiaese Taulumaga a le Fono Aoa Faitulafono mo lana malologa masani i le itula e 10:45 i le taeao ma toe amatalia i le itula e 11:36 i le taeao.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 2) 2018/2019 ma le Tulafono Tau Faaofi o le Faatatauina o Tupe 2019/2020.*

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoa Faitulafono. Ua matu i fau le taliga o le sua ma le taumafataga, ae faaopoopo ai ma maua le faasiligamalos i Taitai o le atunuu, e faaauau ai la tatou galuega.

Ae ou te le i tapa le Sui Fofoga Fetalai, ou te muai tapa lau Afioga i le Palemia mo se lafo, sou finagalo.



19 IUNI 2019

## LAFO MO LE TOE FETUUNAIGA O ITULA FONO

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:** Lau Afioga le Fofoga Fetalai faapea foi ma le mamalu o le tatou Maota nei, ou te tulai atu ma le faaaloalo, *Mo le toe fetuunai o Itula Fono a lo tatou Palemene. Muamua, faataatiaese Taualumaga i le itula e 1:00 i le aoauli nei, ona faaauau lea o le tatou Fonotaga i le itula e 7:00 i le afiafi a nanei seia aulia le itula e 11:00 i le po. E pei ona silafia lau Afioga o le avanoa lea e mafai ai foi ona faaauau fonotaga faatulaga a le Kapeneta i le aso lenei. Ae le gata i lea o le avanoa lelei foi lea e mafai ai ona faatino nisi o galuega a le Komiti o le Palemene ae faapea foi Ofisa Sili o Pulega o Matagaluega, o galuega ua le mafai ona faatinoina i le aso ananafi se i tau mai i le aso, ona o le auai i la tatou Fonotaga.*

Lau Afioga i le Fofoga Fetalai o le lafo lena ma le faaaloalo.

**FOFOGA FETALAI:** Ua faatuina mai le lafo e le Afioga i le Palemia, ina ia toe fetuunai taimi o la tatou Fonotaga ona o nisi o galuega le maalofia, e le gata i le Fonotaga a le Kapeneta ia latou foi matafaioi ae faapea foi i Komiti a le Palemene, e tusa ai o latou foi galuega. Aemaise foi o Ofisa Sili o Pulega o Matagaluega ma Faalapotopotoga a le Malo, o lo o faapena ona auai mai e faatasi ia tatou Fonotaga, e amata mai i le aso ananafi, seia paia mai le aso. Ua maua lenei avanoa e faatino ai nisi o feau, tiute ma galuega. Ua faatuina mai le lafo, ina ia tatou tolopo mo le itula e 7:00 i le afiafi e amatalia ai ma faaiuina i le itula e 11:00 i le po nanei.

*Faaluaina e le Minisita mo Aoga, Taaloga ma Aganuu.*

*Na faamaonia le lafo.*

**FOFOGA FETALAI:** O le a mulimulitaia le lafo e pei ona faatuina mai e le Palemia. Ma ou te tapa lau Afioga i le sui Fofoga Fetalai e faaiu mai le saunoaga. E le o toe tele foi sou taimi.

**Tofa NAFOITOA TALAIMANU KETI:** Faafetai i lau Afioga i le Fofoga Fetalai, ou te manatu e faaluaina le saunoaga ma le malelega a lau Afioga i le Fofoga Fetalai. O lea ua matu fau ua sao i alo foi taliga o le sua a le Maota, maua se faasiligamalosi aua le faaauauina o galuega o totoe.

E le toe umi foi ni motugaafa a lenei Itumalo, aua o lea e le i oo sa matou faamatalaga i lau Afioga i le Minisita o Galuega Tetele a le Malo. Malo le galulue i lau Afioga, ua maua e lo matou itumalo ua maea le asiasiga e masani ai. O le tulaga o auala galuega e faapena foi auala i totonu o aai. O lea ua matou molimauina, ua maea ona silasila lau Afioga faapea foi le Komiti, i tulaga o i ai auala o totonu o afioaga o Satoalepai ma Safai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga, i totonu lava o faigamalaga i le vaalele, a silasila i tusi o lo o faailoa ai ia turisi, ma maimoaga i totonu o lea atunuu ma lea atunuu. E uma loa le Tosua sosoo loa ma le Laumei i Satoalepai, swim with the turtles. O lona uiga e atagia ai le maualuga o lea mataaga, e i le tulaga o le faalauiloaina o a tatou mataaga aua le affio mai o e maimoa, ma sasaa mai o latou tamaoiga i totonu o le atunuu. O lea ua molimauina, e le afioaga o le ala lea o le matou tuitui atu i tafatafa o lau Afioga i le tulaga lava o le vaai mamao i tulaga lautele, e faapena foi.....ne i manatu nisi ua matou faapito manu ia tasi i lo matou lava itumalo. Ae le faapena sa matou vaai, o le mea lea e talosaga atu ai, o lea ua maua, o lena ua numera tasi, pe a pasia le Tala o le Tupe. O le ala foi lea o le le tele o sa matou talanoa i le Tala o le Tupe, ona e tatau ona vave pasi ae se i faatino manaoga o itumalo ma nuu. O lea la ua saunoa mai lau Afioga, ia matou te faalo atu, faafetai tele. O la e fafofoga mai Satoalepai, le paia aua sa Peseta, alalatai ai le Aitutagata faapea le mamalu ia Satoalepai. E faapena foi le matua ia Suisala i Safai, matua o le aiga sa Peseta, ma le mamalu i le Atifai, o le agaga lena. Ae momoli atu le faafetai tele, o lea ua silasila o matou afioaga ia, o lea ua maea le asiasiga, lau Afioga ma le Komiti o outou faiva na. Matou popo le fala ma feula le mulila, ae alo lau Afioga i le faasoa o le keke, aua le mamalu maualuga o le atunuu ma manaoga o tatou tagata.

Ona ou oo mai lea lau Afioga i le Fofoga Fetalai i le Minisita o Vaalele Sivili. E momoli le faamalo ma le faafetai, e le i leva nei se faalavelave o lo matou aiga, ao tala ave ia. O lea sa mitamita ai lava le lagona ma pei e aumai le faaamui a o matou aiga malaga mai fafo ia te au. Ou fai atu e leai, o lau Afioga e tatau ona ave i ai. Aisea? O tulaga foi o tatou air purchase, o le mea lea, malo faafetai, malo le silasila mamao. Aemaise lava lau Afioga o lea ua lata nei ona taunuu le faamoemoe aua taligamalo i tatou taaloga o le Pasefika. O le first entry point lea, mo tagata malaga mai aua le fia silasila, ma auai i taaloga o le Pasefika. O le mea lea, faafetai tele, ou te manatu o i o le a maua ai foi ni faamatalaga lelei mo i tatou. Aua le alo atu o lo tatou Malo ia tatou taligamalo i lenei tausaga. Se i silasila ane ai lau Afioga, toe lava o le toe faaulelei o le car paka i le tulaga o lo o tu ai, aua le faamatagofieina o le tele lava o lea faamoemoe i le malaevaalele. Ao le aotelega lau Afioga, faafetai.

Ona pau lava lea o si mea laititi o totoe o le mea mulimuli foi lea lau Afioga i le Fofoga Fetalai. O tulaga lava e toe lagalaga pea, o le fautua lava aua se matagofie o tatou taaloga, o lea o le a tatou alo atu i ai. I le tulaga o taifau taaloga, e faamanatu atu o la e.....le Matagaluega o Leoleo, se i silasila ane i ai. E tasi lea tulaga e tatau ona ave i ai la outou faamuamua, aemaise o lea o le a alo atu le atunuu, i tulaga ia, aemaise lava i vaega ia i Faleata ma le agai mai i le taulaga. E tatau foi ona toe silasila i ai i vaega uma ia.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Faamuli ai sa matou talanoa ma so matou manatu i lenei itumalo, i se matou faamanuiaga i taaloga, le au taaalo o faafofoga mai, aua e ta'u ai, e o ma le fua a Samoa. Ia o outou mama na. Matou faamanuia atu, matou tapuai mai i Salafai ma moomooga ia manuia lo outou alofaiva, aua le feagai ai i taaloga e tauave le igoa mamalu o le atunuu. Ia alofagia e le Atua ia maua lo outou tomai, maua lo outou malosi aua taaloga o le Pasefika i lenei tausaga.

Ona foi mai lea o sa matou faamatalaga, momoli atu le matou faamalo i lau Afioga i le Fofoga Fetalai, malo faatoa, malo foi mo le taitaina o le tatou Fonotaga i lenei aso ma le aso ananafi. Malo foi papale i lau Afioga i le Fofoga Fetalai, ma le aiga Minisita. Onosai foi i tulaga o Fonotaga e faapea lava uiga o itumalo nei ma sui mamalu. Ao i ina o lena e taoto ai le tofa ma le uta aua le taitaina o lo tatou Malo. Manuia le Fonousu a Samoa i lenei taeao.

**FOFOGA FETALAI:** Malo faafetai saunoa i lau Afioga i le Sui Fofoga Fetalai. Ma ou te tapa ma le faaaloalo lau Afioga i le sui usufono mo Faasaleleaga Nu 1 i Sisifo.

**Afioga Hon GATOLOAIFAANA AMATAGA ALESANA GIDLOW (Faasaleleaga Nu 1 Sisifo):** Ou te muamua ona ou faafetai i lau Afioga i le Fofoga Fetalai mo o le avanoa o lenei itumalo, e tulai ai e fai sina manatu e tusa ai foi ma le Tala o le Tupe 2019/2020. Ou te lagona ua maea paepaeulufanua lo tatou aso, le sasao ai foi o le paia ma le mamalu o Samoa i totonu o le Maota nei. O le faafogafoga mai foi a lo tatou atunuu. Ua uma foi ona saunoa ma fetalai i ai nisi o sui usufono ua maea atu o latou tootoo. Ma o le a le toe oo tele i ai se faamatalaga, ae pau lava o lea lau Afioga i le Fofoga Fetalai, ou te faatalofa atu. Faatalofa atu foi i le afio i le Afioga i le Palemia po o le Taitai foi o le atunuu, le mamalu o le aiga Kapeneta aiga Minisita tainane Minisita Lagolago, malo lava le soifua ma le lagi e mama. Afifio atu foi Taitai o Komiti taitasi aemaise o toe Ulutaia o le tatou Palemene e pei ona sasao atu ai sui usufono o le Palemene, o lo o mafai ona galulue ma lagolagosua i lo tatou Malo aua foi fuafuaga ua faataatitia i totonu o lo tatou tala o le tupe i lenei tausaga. E faatalofa atu foi i le afifio ai o Ofisa Sili o Pulega o Matagaluega ma Faalapotopotoga a le Malo. Aemaise lava le faafeagai ai o outou ma tiute ma galuega. Malo le tautua malo foi le onosai. Afio lau Afioga i le Failautusi o le Fono Faitulafono. Faafetai i lou tulai mai Tiatia, ua fai oe ma Failautusi o le Maota o le Fono Faitulafono, lagolagosua foi la tatou afaigaluega. O outou lava o lo o vae ma lima i ai le Palemene, i mea o lo o latou manaomia i lea taimi ma lea taimi.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Fofoga Fetalai, e momoli lou agaga faafetai i le Afioga i le Minisita o Tupe, le Minisita o Tupe Maua, aemaise uma lava Matagaluega ma Faalapotopotoga ua latou tauaofaiina nei tupe, aua le mafai ona tagolima i ai lo tatou Malo, mo galuega e atiae ai, faaleleia ai ia le soifua maua, soifuaga o tagata Samoa. Ia malo lava le tapena, malo le onosai, ua faataatia mai le ata ma le auga ma le faamoemoe o le tatou Tala i le Tupe, ia autasi le vaai taulai, mo se lumanai o Samoa.

Ou te lagona lava o le agaga lena ua tatou faapenei ai i le Maota Fono o Samoa, ona ua aumai le faatuatuaga ma le faamoemoega o le tatou atunuu, ina ia mafai ona tatou faia ia ni tonu ma ni faaiuga lelei ma talafeagai aua le lumanai o le tatou atunuu o lo o faapea ona taputapu mai. Ia e le oo la se tala tele i le Tala o le Tupe ua lagona e lenei itumalo le lagolago ma le faafetai e momoli atu i tulaga uma ua faataatitia. Ma e pei lava o saunoaga ua maea, e le o ni tamai lauia foi ae o lauia tetele na latou faafeagai ma le tapenaina o lenei Tala o le Tupe ma o lea o le faatuatuaga ma le lagolago e tuuina atu i lau Afioga i le Minisita aemaise foi le Faauluuluga o le Matagaluega, ina ia faapea ona mafai ona faatino ia faataatiaga ma faamoemoega pei ona i ai ia le Tala o le Tupe i lenei vaitau.

Ia ae le mafai ai foi ona tuua ia nai tuualalo, e ao ona faaleo pea aua foi nisi o nai mea e toe faamanatu ma toe taumafai atu ai pea, mea e ono faaleleia ai le itumalo, ia mea foi e faaleleia ai lo tatou atunuu lautele.

Lau Afioga i le Fofoga Fetalai e tauala atu i lau Afioga se fautuaga i le Afioga i le Minisita o Tagata Tafafao Maimoa mai Fafo. Faafetai tele mo galuega o lo o vaaia pea, ou te lagona o le tasi lea o Matagaluega o lo o tele ia tatou tupe maua mai ai ona o e tafafao mai ma faaalu ia latou seleni i totonu o le tatou atunuu. Ia ma e ao lava foi ona tagatagai i auala e faaleleia ai foi lea vaega o le tatou tamaoaiga. Ma e avatu ai se fesili i lau Afioga i le Minisita, aua e pei foi ona saunoa le Afioga i le Palemia le Taitai o le tatou Malo, i aafiaga o le suiga o le tau i lenei vaitau. Ua matua matauina lava le siisii o le tai, o nofoaga e le i afaina i le tai, ua matuai oo oo i ai le tai i le vaitaimi lenei. O fale foi na fauina mo ia foi faamoemoe, ma le leiloa o le a faapea ona afaina ona o suiga lava lea o le tau, ua vaaia ma le faanoanoa ua tele ni afaina ma e tele foi ni gaioga e tataua ona toe faia i ai ina ia faatumauiina le matagofie o a taou maota ma nofoaga o faaaogaina e o tatou tagata mai fafo.

O lea la o le fesili lau Afioga i le Minisita, po o i ai se alagatupe foi lea mai tupe nei mo le suiga o le tau mitigation funds agai i le tatou Matagaluega e mafai ai ona fesoasoani ai i le industry e tapenapena ai ma toe faaleleia ai nofoaga ua afaina, e le ona o so latou faatamala, po o ni a latou gaioga, ia ae o luga lava i le suiga o le tau e pei ona tatou i ai nei i lenei vaitau.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua**

O lea la e avatu ai se fesili i lau Afioga e fia malamalama, po o oo oo i ai se tapenapenaga a le tatou Matagaluega, aua o mea uma ia e tatau ona silasila totoa i ai le tatou Matagaluega i na ia lelei, faalelei ma ia faatumauiina le matagofie o Samoa, aua le afifio mai o i latou o lo o tatou faamoemoe foi i ai, e maua ai le seleni mo a tatou galuega atiae.

Ia ona ou...

**Afioga Hon Sala Fata Pinati (Minisita mo Tagata Tafafao Maimoa mai Fafu):** Lau Afioga i le Fofoga Fetalai...

**FOFOGA FETALAI:** Ia se i tulai mai le Afioga i le Minisita o Turisi.

**Afioga Hon Sala Fata Pinati :** Ou te faafetaia le sui usufono e tusa ai ma le saunoaga matagofie i lenei taeao. O tulaga mo mea o le fesuaiga o le tau, ia ou te masalo o le vaega lea o lo o nafa ma le Marine po o i latou lea i le Siosiomaga.

O suiga o le tau e le o i lalo o se vaega o le Ofisa o Tagata Tafafao Maimoa Mai Fafu. O vaega foi e pei ona taua e aafia ai Faletalimalo ma nuu, ia o le tulaga lea i mea tau seleni. O lo o i ai ia seleni e faapena ona faaagaga mo mea o faletalimalo, ae o le aafiaga tau i matagi ma mea na, ou te manatu o lo o i ai pea i latou o lo o feagai ma ia vaega, ae e le i lalo o se budget a Tagata Tafafao Maimoa mai Fafu. Ae lelei pe ana e afio atu e ta te faal le mataupu lea, atonu o i o le a maua ai se ata lelei mo lau Afioga, ia ma maua ai foi se lumanai manuia o e tafafao mai fafu, i ai latou o lo o faapena ona faia le galuega, ia aua ou te talitonu, e sao lava e pei ona e saunoa i lenei itula o le aso, e tatau lava ona tatou galulue faatasi.

O le a foi se mea e taumafai atu ai i matou nei, ia o mea lava e pau mai ai le mafai. O le tele pe itiiti, ia a ua i ai lava le mea foi lea, o lea ua o tatou galulue aua le lumanai o Samoa. Ma lou faaaloalo lava.<sup>3</sup>

**FOFOGA FETALAI:** Malo tulai mai le sui usufono mo Faasaleleaga.

**Afioga Hon GATOLOAIFAANA AMATAGA ALESANA GIDLOW:** Ia faafetai tele i lau Afioga i le Minisita mo le fesoasoani mai i se lagona o le sui usufono. Ae faamalulu atu nei mea ua sala ese se fesili, ia ae lagona lava o la outou Matagaluega lea e tatau ona taulai i ai mataupu uma lava tau le taliga o malo tafafao mai fafu, e maua mai ai le fesoasoani, maua mai ai le fautua, i mea uma o lo o mafai ona maua mai vaega eseese o le tatou Malo. Ia ae ua lelei o le a taumafai pea e fesootai, ona e le o se tamai mataupu le mataupu lea ou te talanoa atu ai, tele ni faletalimalo ua afaina i le siisii lea o le tai, ia a o sina fesoasoani mo i latou e toe tau tapena ai ma tau puipuia ai ia latou meatotino foi ua tele seleni ua alu ai, ia ona o aga lava a le tau e leai se tatou mea e mafai ona faia i ai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ona ou oo mai lea i lau Afioga i le Minisita mo Aoga, ia e muamua ona avatu le agaga faafetai, ona o tapenapenaga ua tapena i ai le Matagaluega, i le mataupu lava lea e pei ona laga i le tele o taimi, a lelei lava le faavae, ona alu ae lava lea o mea mulimuli ane, ua tapena lelei ma faatulaga lelei. O se lagona lava la na tele na tuualalo i ai le Matagaluega, o le tulaga lea o le faitau tusi, ma le numera a tatou alo ma fanau ina ia matuai tapue lelei, po o fea la e alu i ai le tamaititi, e i ai le faavae lea o lona malamalama e mafai ona faaleleia ai lona soifua aoaoina. Aua o lea e molimauina nei i lenei vaitau, e le o atoatoa le tatou tapenaga lea mai ni tausaga se tele. E le o na o Samoa foi, o se vaivaiga o lo o i ai i totonu o le Pasefika atoa, le alu i lalo o le pasene o le lelei o le Numera ma le faitau tusi ma le tusitusi a alo ma fanau a le Pasefika.

Ae o le mea sili ma le taua, ou te faafetai atu ai i lau Afioga i le Minisita, o lea ua i ai ia polokalame ua faataatia e la tatou Matagaluega ina ia taumafai ina ia foia lea vaivaiga ia ma lea faaletonu. Ma e ou te avatu ai le agaga faafetai tele.

O le isi lava mataupu ou te lagona e fesoasoani tele lea foi ua i ai fuafuaga a le tatou Matagaluega, o le tulaga lea mo faletusi i totonu o aoga taitasi. E le gata la i Aoga Mauualuluga, ia ae faapea foi i lalo i lalo o tatou Aoga Tulagalua, ina ia mafai ona maua le avanoa e nai alo ma fanau e maua ai se tusi faigofie e amata ai ona faataitai ona faitau tusi, amata ai ona faataitai le fiafia e faitau le tusi, ia ma alualu ai i luma lona malamalama. Ma o le talosaga lau Afioga i le Minisita, lea ou te lagona ua i ai nisi Aoga Tulagalua ua mafai ona maua ni a latou tagata ia librarian, tagata e nonofo i totonu o faletusi.

Ia o le matou nuu o Iva, ua i ai le faletusi ua faapea ona agalelei se tasi o tamalii o le alalafaga ma le afioaga na fausia se faletusi matagofie, ae paga lava lea, e fia manaomia se fesoasoani i se e mafai ona ia faafoeina lea matata o le tatou aoaoga, ina ia tulai mai i se tulaga e aoga le faamoemoe na mafua ai ona faatino lea faamoemoe e sia foi tamalii. Ia o se talosaga lena i lau Afioga i le Minisita mo Aoga.

Ona ou oo mai lea i le Minisita mo le Soifua Maloloina, faafetai i lou tulai mai lau Afioga i le Tamaitai Minisita. Ia e talitonu foi o lo o fou ou tiute ia ae le fou lau tautua e le fou foi lou galue lau Afio ma o le a faapea lava ona talitonu le faamoemoe o le a faaauau galuega e pei ona tulai mai ai foi le sa i ai i le tatou Matagaluega. Ia e avatu ai foi le agaga faafetai i le Afioga i le Minisita sa tulai mai i le taimi ua tuanai, aua i a matou asiasiga foi, e o atu ai i tua i tatou falemai o le tatou atunuu, matagofie le siisiina o tulaga o faafeagai ai ma e o lo o manaomia le fesoasoani i lo tatou atunuu. O le tulaga foi i le o i tua o fomai pe tasi pe lua aso e o ai i tua a ua maua pea le avanoa e nai o tatou tagata o lo o faafaigata ona o mai po o Tuasivi i Savaii po o Motootua nei i Upolu, a o la ua i ai isi fomai i le taimi lea, e mafai ona latou o ae i ai i nisi mai e le o tigaina tele. Ma e avatu ai le agaga faafetai mo ia polokalame faaauau ma polokalame faatino.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ma e ou te lagona foi o fuafuaga lava ina ia mafai ona i ai se fomai i totonu o tatou falemai faaitumalo ia o lo o i ai nei, o se fuafuaga matuai lagolagoina, o se fuafuaga e tatalo ina ia mafai ona taunuu i se taimi lata mai pe a talafeagai.

Ae o se tuualalo faamolemole i lau Afioga i le Minisita, matauina nisi o falemai, e le o matagofie le teuina, le faalauleleina, le sanitation e tusa ai ma le tulaga o falemai. E tatau ona atoatoa le mama ma le matagofie o lotoa, o i le faataitaiga o le soifua mama ma le soifua lelei. Ae ua matau, o nisi o falemai ua tele ina ave i konekarate foi ia e o atu e faamama le vao, vaeane foi le sasao o le paia o lenei taeao. Ia ae peitai o le molimau a e o lo o faafeagai foi ma le galuega, ia a tele lava ia timuga ua vave foi ona oso i luga le vao. A logo atu konekarate ae fai mai e le i oo i le taimi tou te o atu ai. E le talafeagai lea faamoemoe ma e o sina tuualalo, manaia ia ae toe foi i Komiti ia e faafeagai ma falemai. O e o lo o i totonu o afioaga o lo o i ai le falemai i totonu ina ia mafai ona latou faia ia lea vaega, e le gata o le faamamaina i soo se taimi, ae i ai pea le fesootaiga lea e malupuipua ai foi ia maota gasegase ia po o le aufaigaluega foi i totonu o afioaga ma alalafaga. Ia o se tuualalo lea lau Afioga i le Minisita, ae faafetai tele mo galuega lelei ua vaaia pea le suiga ua i ai nei.

Ia ona oo mai lea o sau faamatalaga i le Afioga i le Minisita mo Galuega, faafetai tele lava mo le faalogologo atu ia o lo o i ai pea le faamoemoe mo nai talosaga ua uma ona tuuina atu. Tatalo pea ia lava lau faasoa ina ia vave ona oo mai ia se faamanuiaga ia po o se fesoasoani i lenei foi itumalo ma ona auala o lo o taumafai e galulue ai.

O le isi lea itumalo lau Afioga ua matauina lava le tele o e ua agai i uta, e afifio ma papaaao ai, aua lava le taumafai ina ia tali mai i le apoapoaiga ia o i uta, aua la le mea lea ua tupu mai o le suiga o le tau, ua le toe sefe ia le gataifale.

Ia o le mea lea e talosaga atu ai lau Afioga i le Minisita se i toe tagai atu pea i a matou auala, avatu foi le matou tuualalo, ia masalo lava o i inei i Upolu ua masani lava Upolu a o matou nei mai Savaii a matou o atu i nuu ia i tua e matua leiloa lava po o fea o oso agai i ai pe a fia alu i.....po o Lalomanu po o Lotofaga. E tau le masani lelei, ae o le fautuaga, pe mafai na fai ni faailoilo i soo se magaala, ia iloa ai, o fea le mea e te alu agai i Apia fea le mea e te alu agai i Aufaga po o le Lepa.

**Susuga Hon Papaliitele Niko Lee Hang:** Lau Afioga i le Fofoga Fetalai.

**FOFOGA FETALAI:** Se i tulai mai le Minisita o Galuega.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Susuga Hon Papaliitele Niko Lee Hang:** E le faalavelavea le saunoaga matagofie a le Afioga i le sui mamalu. Ae o lea ua laga le mataupu lea i faailoilo, o lea ua tapena le Matagaluega o le MNRE aemaise foi le Ministry of Works, e tapena uma ia faailoilo i auala, ina ia mautinoa e silafia e le mamalu o le atunuu, aemaise foi i tagata tafafao mai fafo. E lelei lava le i ai o faailoilo ia, e iloa ai e tagata feoai lea auala ma lea auala, ao lea ua tapena le tulaga lea. Faafetai.

**Afioga Hon GATOLOAIFAANA AMATAGA ALESANA GIDLOW:** Faafetai o lea ua malamalama e le toe oo foi se faamatalaga i lea vaega. Ae o lagona lava e le o tele seleni i mea uma ia e talosaga atu ai sui usufono, ae tatalo atu pea. Se i vaai i e ua atoa le lima tausaga po o le sefulu tausaga e leai ni auala fou, ina ia mafai ona oo i ai le faasoa.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoui:** Lau Afioga i le Fofoga Fetalai, ao tatou i ai i i ae le i see ese le sui usufono tamaitai, e taua tele lona laga o le mataupu leni i faailoilo. Ua tele naunau lava faailoilo ua faaleaga, e le gata i totonu o nuu ae faapena foi iinei i le taulaga. O le mea la lea, o lo o ee mai le Minisita o lo o gafa ma le Komiti lea o sui o le Malo. O tatou foi e tatau ona tatou fesootai ma tatou sui o le Malo. E le gata i tamaitai ao latou foi o alii, e lagolago ane ia tatou faailo nei, o lo o fai i totonu o nuu. O isi faailoilo e o atu ua tutu mai na o pou ae ua leai ni faailoilo, ao isi faailoilo ua aveese uma lava ma pou. E aafia uma ai lava le atunuu atoa e le faapitoa i se afioaga e tasi. Ae taua tele mo i latou e femalagaai. E le gata o tagata mai fafo ao tatou lava ia. O le toatele lava o i tatou e le iloa tuaoi o nuu, ao faailoilo nei e tutu tonu lava i tuaoi o nuu.

O le ala foi lena ua le iloa po o le a le mea o le a fai. A faaoga laau e sue atu ua pusa ai suavai a isi aiga e nonofo latalata ane i ina sei tulou le Maota nei. Ae a fai foi pou uamea, e o atu ua sasapa mai pou uamea ua pipio, o lona uiga ua alu le po atoa o tau se i atoa i luga. O le mea la lea e faataua tele mea ia, o lea foi e faafofoga mai le Minisita, ae o tatou uma lava. Se faamolemole a e oo atu i lou itumalo pe afai o fai ma e alu i lou itumalo, se i silasila lelei i le tuaoi po o a mea o tutupu ai. Po o tu ai pea faailoilo na sa fai foi e le Faalapotopotoga a sui usufono mo Gagaemauga Nu 1, ua teva ai ma le fia fai faailoilo o Sala. O le taua lena o le laga o le mataupu leni, ia ina faafofoga mai foi lo tatou atunuu. E i ai lava le moemoenoa ma le laufaleaina i totonu o tatou nuu, e ono faaletonu ai ia mea e fai. E i ai la isi faailoilo sa i o i le itu atu le la o Savaii, e le i mafua la ona o taulelea ae mafua ona o le SSIG, ua o atu talanoa i isi matai o nuu, e o e toso i lalo mea la. Se i vaai i ai i le le popoi.



19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Fofoga Fetalai, e taua lava le tulaga lea i faailoilo. O isi ituaiga faailoilo e tau mai ai mea lelei ia e i totonu o le itumalo. Ae o atu la tagata e fia vaavaai i mea lelei ia, ae o la e nofonofo mai ai matai o nuu e ao ia tupe. Se se i faamolemole e faatonu matai na, e o e fai ni a latou galuega, ae soia le o ifo i i, faamataga atu lo tatou atunuu i fafo i ituaiga mea ia. O le mea e sili ona mataga o au o le Taitai o le Malo e afe atu i isi afioaga ou te alu ou te vaai i auala, o lea la e faafofoga mai ia sui usufono ia, e logo ane la toeaia ia, i ou alu atu foi ae taofi mai au, e totogi le tupe lea e fai ai a latou tapaa. E tasi lena mea e le ono faia ai se auala o se itumalo, o le afe atu o au nei ma Minisita ae o la e nofonofo mai ia isi aulafa e le o e fai ni a latou galuega. Ae o ifo faalavelave i i i le o atu o tagata e sasaa atu le manuia ia i latou, o fai galuega lelei ma atinae lelei mo i latou lava, aemaise o latou fanau o lea e galulue i i.

Lau Afioga i le Fofoga Fetalai, e pei o se lesona lelei lena o lea ua tupu ae i le mafaufau i leni taeo talu ai le saunoaga matagofie a le sui usufono tamaitai.

**FOFOGA FETALAI:** Se i tulai mai le Minisita o...

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nu ma Afioaga ma Agafesootai):** Ia faasaoina le taimi o le saunoaga a le Afioga i le sui usufono, e tulai atu e toe faamanatu, o le Tulafono lea o lo o i lalo o le vaavaaiga a leni Matagaluega. E pei ona silafia o Tulafono o Mataupu tau lotoifale, o lo o aiaia ai ia matafaioi a sui o nuu ma sui o le Malo. I lalo la o le Vaega 15 o le Tulafono o Mataupu tau lotoifale, o lo o aiaia ai afioga i sui a nuu ma sui o le Malo. O la latou matafaioi lea o le vaaia o mea totino a le Malo i totonu o se afioaga, faatasi ai ma le anoanoai o isi mau tiute, o lo o aumai ai i lalo o le Vaega lava lea o le Tulafono.

O lea foi la, faafetai mo le faamanatu, ma o lea e fai pea Fonotaga e tai masina a sui o nuu ma sui o le Malo. O le a toe faamanatu i ai a latou matafaioi ia, ao le galuega taugologolo lava lea o lo o fai i masina uma, i o tatou sui o nuu. Ina ia tautuana ma i latou, e le gata ai i lea, o le tumama foi o le nuu. O le latou matafaioi la pe a matauina tulaga nei o e o lo o faaleagaina meatotino a le Malo, i totonu o se nuu po o le itumalo. E tataua loa ona logo alii malu o le Malo, ina ia faia se poloaiga pe faatonuina i latou o lo o faia ia amio le taupulea, po o le faia foi i ai o ni tulaga talafeagai, e tusa ma le Tulafono. Ia aua ai nei toe tulai mai tulaga faapea i totonu o afioaga. O le faaopoopo atu lea e tusa ai ma le saunoaga a le Palemia, e puipui ai lea vaega.

**FOFOGA FETALAI:** Malo faafetai, e aoga foi mataupu lagalaga a le Afioga i le sui usufono. O lo o faafofoga mai le atunuu, o le tiute lena a pule mamalu a alii ma faipule, e taulamua ai sui a nuu ma sui tamaitai.

Saunoa lau Afioga sui mamalu..

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga Hon GATOLOAIFAANA AMATAGA ALESANA GIDLOW:** Faafetai lau Afioga i le Fofoga Fetalai. E moni lava au, o avanoa le au maua ia, aua e ese foi lava le matou talosaga atu i mea o lo o mananao ai itumalo, ese foi aga ma tu o lo o faia i tua e le talafeagai foi ma le galulue faatasi ma le lagolagosua i faamoemoe o lo tatou Malo. O le mea sili faafetai o lea foi ua aumai se fautuaga, ao lo o faafogafoga mai foi lo tatou atunuu. Ae faaauau atu sau faamatalaga lau Afioga i le Fofoga Fetalai, o i ai lava a matou taligalu ua....ou te lagona e pei o le faatolu ai lenei ona ou lauga ai i si o matou itumalo, po o totoe ni tupe mo taligalu le Afioga i le Minisita o Siosiomaga. A faapea o i ai, ona faasoa mai lea, ona o le isi lava lenei itumalo ua afaina lava i le siisii o le tau e pei ona i ai lenei vai tau.

**FOFOGA FETALAI:** Toe lua minute o le sui usufono...

**Afioga Hon GATOLOAIFAANA AMATAGA ALESANA GIDLOW:** Lau Afioga i le Fofoga Fetalai, o le a.....E i ai lava si mataupu lea sa ou nofo lava ma vaavaai foi ma fesootai foi i nisi o tama ma tina matutua o e sa galulue foi, ma tautua i totonu o lo tatou Malo. O le tulaga o lo o i ai nei, e 55 loa tausaga ona litaea lea. Ou te manatu o se mataupu ua uma foi ona faaoo mai i luma o lenei Palemene, po o nisi foi o vaega o lo tatou Malo. Ae ou te fia faaleo pea lau Afioga. Po o le a se finagalo, lau Afioga i le Palemia, ae se i tagai i se auala pe siisii ai i luga le tausaga o le litaea i le 60 po o le 65. E mafua lea faamatalaga ona e tilotilo ma le totoa foi, e tilotilo foi ma le manumanu i le tofa ma le faautaga. Aua e pei foi ona saunoa nisi, e pei lava o le 65 i le 70 o iina e atoatoa ai se tofalaiga i nisi o tama ma tina. E atoatoa ai foi se malamalama i galuega sa faafeagai ai. Ao lea ua oo mai loa i le taimi ua i luga le malamalama ma le iloa, e tataua loa ona faasee tuagalua. Ia ae o mai foi nisi o lo o talavou pea lo latou soifua.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoi:** Lau Afioga i le Fofoga Fetalai, ua ou televave atu e talia le talosaga. O lea ua faafogafoga mai a tatou tusi Tulafono, tusi loa le 65, ae aua ne i toe tuua i tua. Se i vaai i le Minisita o Sala, o lea toetiiti 90 tausaga ao lea lava e malosi. E sao lelei, pe tuu foi i le 70. Aua o le mea foi lenei na ala ai ona teuteu le Tulafono o le au faamasino. E gata mai le faamasino i le 62, ona tatalo mai foi lea i le Malo ia le au faamasino e tuu atu i le 68. Ae o la ua ou tilotilo atu i le isi faamasino la na litaea atu nei, o la e talavou. Ae po o le a sou finagalo ae tuu atu pea e fesootai ai oulua ma le Minisita o le Soifua Maloloina. A tuu foi i le 80 tuu i le 80. Ae taua e faatupu manatu, i le 65. Ia fai loa.

**FOFOGA FETALAI:** Tulai mai le sui usufono, amuia oe ua tali le Malo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga Hon GATOLOAIFAANA AMATAGA ALESANA GIDLOW:** Faafetai tele i lau Afioga i le Palemia. Ou te lagona lava a avatu ni manatu e talafeagai ona faapea lea ona talia gofie, ae faafetai mo lea faamoemoe pe a taunuu.

O lau faamatalaga mulimuli lava faamolemole, o lea ua i ai ni evidence po o ni faailoilo o mea ua tutupu, e pei ona saunoa se tasi o sui usufono mai Savaii, i le tulaga lea o le palota mo tagata Savaii. Lau Afioga sa o matou taumafai atu ae le i pasia le Tulafono. Tuitui atu pea, ao se matou tuualalo, ao se matou talosaga, o le faigata ia o le aupalota i Savaii ona o uma i Savaii. O le mea ua i ai ou te lagona, ua avea le le faamaoni o i latou i le taimi ua fano, ma mea e afaina ai e e i ai lo latou aia tatau e i ai lo latou agaga faamaoni. E fia o atu e palota ae le mafai, po o nisi lava mafuaaga talafeagai ai. O lea la, e na o se tuualalo ma se faaopoopoga, aua o lea ua saunoa le Afioga i le sui Fofoga Fetalai, ua i ai le lipoti, le numera o tagata ua le palota. Maumau e palota a Savaii pe a o le tulaga lea o le a i ai. Ae tuu atu pea i outou tafatafa le Afioga i le Minisita, feliuliuai ai le tofa pe talafeagai pe leai.

Ona faaiu ai lea o sau tala, ou te fia faafetai atu i le Komiti o Tupe, faafetai tele i lau Afioga i le Taitaifono ma le sui Taitaifono ma le mamalu o le Komiti o Tupe, mo le lagolago foi e fesoasoani mai, e aumai se lipoti e mafai ona tilotilo i ai, ma iloa ai le atoatoa o galuega lo o fitaituga ai le Afioga i le Minisita ma le Matagaluega.

Ona faaiu lea o sau faamatalaga lau Afioga i le Fofoga Fetalai, ou te faafetai i lou itumalo o lo o taputapu mai, ia faapea lava ona maua le mafanafana o le sui usufono, ou iloa o lo o i ai ia la outou tapuaiga ia aemaise foi i Susuga i Faafeagaiga, o lo o faafalelemalu i totonu o le itumalo aua lava le saogalemu o le itumalo. Ae ou te tatalo lau Afioga i le Fofoga Fetalai, alofa le Atua ia maua lou soifua faafualoa, maua lou soifua ina ia mafai ai pea ona faaauau lau tautua ma ou tiute e le faigofie le tautaiga o Fonotaga a le Palemene.

Lau Afioga i le Palemia, ia amuia lava oe, ua upuia, ua faaleagaina ona o lau tautua mo Samoa. Ia maua pea le toa, maua le toa, maua le faatoatoa, e faia ai lau tautua i lo tatou atunuu. Ia maua foi le tofa ma le faautaga lau Afioga i le Minisita...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai, aua e te popole, ua iloa foi o au e faitau tusi tele i lauga a vaega ia e i ai Viliamu, lea e fai mai ÷ se a lafoai mai mea na, o isi ou ai na e maua i luga i le lagi. Se tele la nai au mea ia e maua, aua e te popole fua e tele nai au mea ia e maua ou te pasese ai i luga pe a oo mai lena taimi.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga Hon GATOLOAIFAANA AMATAGA ALESANA GIDLOW:** Ia lau Afioga i le Fofoga Fetalai, ou te le popole leaga o lea ou te iloaina e le popole le Afioga i le Palemia. O lo o faatino lana galuega e tatau ai ae ia maua le tofa ma le faautaga i a outou Afioga i Minisita, lagolagosua i lo tatou Taitai, ae tainane le afifio o Minisita Lagolago, faapea foi le afifio atu o lenei itu, i toe ulutaia o le tatou Maota, ia maua le faatofalaiga mai le Atua, faamanuia i Ofisa Sili o Pulega o Matagaluega ma Faalapopotoga o lo o tatou auai, aemaise le Failautusi ma le aufaigaluega a le Palemene, faafetai tele mo lo matou avanoa.

**FOFOGA FETALAI:** Faafetai, malo faafetai saunoa i lau Afioga i le sui usufono mamalu, logoitino lava matagi lelei i le saunoaga, sausau fialele foi le manu nai Utufiu. Ia o le tali a le nofoa i le saunoaga a le sui usufono, ia faatasi le Atua ma oe.

Ia tulai mai le sui usufono mo Anoamaa i Sasae, ia tulai maia le sui usufono mamalu.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa Sasae):** Maitau i aga o le Fonotaga, ua foliga ua finagalo lau Afioga e tulitamoe le faamoemoe ona ua vave foi le taimi. O le mea foi lea ua uma ona tuualalo le ia a aiga Sasaumani i lenei foi Itu o le Maota, ua tasi ai le latou tofa ua lava ia au e fai mo latou sui, Minisita Lagolago, ioe. Ia o lea o le a ou lauga faatumua e kava uma ai itumalo o i latou nei.

Ia e le toe ta i tua le tili, leaga o lea ua uma ona paepaeulufanua ma paepaelalago e ala i saunoaga ma fetalai o paia ma sa ma mamalu o Tiafau. O paia e tumau e le liliu e oo lava i le faavavau. Ia e ao lava ona muamua ona mua le sao ia Manuvao, ma viia le alofa o le Atua, ia ona o lana pule faasoifua. Aua e foe faaee i le tau le faamoemoega o le tagata, ia pe ana le o gatusa ma le finagalo alofa o lo tatou Tapaau i le lagi. O lea ua tatou lauluafesilafai ai i lenei taeao manino ma le taeao totoa, aua ua laolao foi Maota, le suigaula nai le vasa. Ua uma foi ona faamanusina le atu o le sela e ala i le taulaga molia i lau susuga i le taeao.

Ia na ona matou fono faapipii le agaga faafetai aua o le Atua le viia e Samoa, lea foi ua faavae i ai lona atunuu, Tama le Alo ma le Agaga Paia. Sa faitau lau Tusi Paia i le taeao, i le tusi lea 1 Samuelu 17, e i ai le upu faapea o le taua o le taua a le Atua. E aumai uma lava e le Atua latou na i lou lima. E faapena se lagona o le tagata e na te iloa le tele o le Atua lea e tatou te auauna i ai. E le tei tei gofie, tatou te le popolevale, o a matagi o a afa e fou mai, leai e tatou te talitonu o lo o soifua lo tatou Atua.

19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E le na ma le laina leni vaitau ma taimi ua agai mai faafitauli ma luluta mai ia faitioga, ia ae o le fautuaga i lo tatou Maota, ia toa le tai, ia fai malu faiva, ioe, silasila i le nofo lelei o le tatou atunuu, o le mea sili lea ma taua. Ina ua tetee i tai lo tatou sa i le aso ananafi, faataumuaava i le faatautoga o le sui usufono fou o le tatou nofoaiga, fiafia le agaga, tulai mai le sui usufono o Safotulafai, le tofa i le Pule, Namulauulu, ia faamalo saunoa faataupou, logoitino matagi lelei, foliga o le sui usufono ua leva ona tapena mo taeao ma aso faapenei, faamalo faafetai. Ua saunoa atu nisi ma faamanuia atu nisi ma faaviiivii atu foi nisi, ia ae o le upu lava a Iesu, ʻa talanoa lelei tagata ia te oe, ia e faaeteete, you know, when people speaks well of you, be careful, leaga e i ai le isi tagata la e tu i tua ma le isi mea faalelelei .

Ae pau lava lea o le fautuaga a Lufilufi, leaga o la e i o lava i Mulivai i gatai o Lalogafuafua ia le mea na to i ai tama ia. O le mea la lea, a le faamanuia Lufilufi i le tulai mai o le sui usufono lea, e le manuia. O le mea lea Namulauulu, o ou mama na, sagai ane ai o le tai, faaosofia moealuaga maua lau tofa, o lau tala lava lea na fai i le tuumalo o Pau, pau se toa ae tu se toa. Ia o lea ua tulai mai le uso, ia viia le Alii. Viia le Atua i le faaogaina o tatou, ia o tatou ia ua na o ni auauna e le atoatoa, o a foi ni faaletonu, ia ua tatou mama lava i le faaolataga a Keriso. Amen.

Ia o lea foi ua taua e le Palemia ia le tusi a lau faifeau, ia o tusi ia e ola ai le tagata. Aua tou te faitau i nisi tusi leaga o tusi e tusi i mafauauga o le tagata, ae o le tusi e tusi e le faauuga a le Agaga o le tusi lena e ola ai tatou.

Ou matau i saunoaga a sui usufono, se o au ua lagona lou fefe ma lou matau i saunoaga. Na ou fia tu atu lava i le po o le aso ananafi, ua faatusa Samoa i sefe panikeke, ioe, e lia lota tino i ia ituaiga saunoaga, aisea? Se o Samoa e tiu i le faaaloalo. Tiu i le mamalu.

**Tofa Olo Fiti Afoa Vaai:** Lau Afioga i le Fofoga Fetalai, o se mea e fia faasao.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** E le soona aumaia ia lafoga i totonu o le Maota, e faatusatusa i ai le Malo e i ai le Ao o le Malo ma tulaga tofi i le sefe panikeke. E le taitai ona paleni ia mea.

**Tofa Olo Fiti Afoa Vaai:** Lau Afioga i le Fofoga Fetalai, malie lau Afioga i le Fofoga Fetalai, o se mea e fia faasao

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O le mea seu le manu ae tagai i le galu.

**Tofa Olo Fiti Afoa Vaai:** Malie lau Afioga i le Fofoga Fetalai se i faasao ia le mea sese lea e aumai e le sui usufono, silasila lau Afioga i le Fofoga Fetalai...

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Ia, tulai mai le sui usufono mo Salega.

**Tofa Olo Fiti Afoa Vaai:** Sa fesiligia au e le Afioga i le Palemia ou te le malamalama i se faiga o se tamaoaiga ma mea tau tupe e le o sau taleni lena. Ia ou talanoa atu lea i le Afioga i le Palemia, e tutusa lelei lava le tatou running o le Malo lea, ma lota running o lata sefe panikeke e na o le \$1,000 le mea e fai ai. O le saoga lena o lau tala ae ou te le i faatusaina le atunuu, ia o ai au o le a ou faatusa ai le atunuu i se sefe panikeke? Ma le faaaloalo.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O le Malo o ai? Ni Malo o ni Initia lea e tatou te talanoa i ai? O le Malo o Samoa, se se i alofa ia sui usufono, tausi le mamalu, le mea lava lea e naunau atu ai le taofi, tago i le too tepa i le ati, silasila ina ia nofo lelei le atunuu. Ioe, o au foi, ua faateia au anapo vili mai lo matou itumalo, fai mai, Alaiasa..

**Tofa Olo Fiti Afoa Vaai:** Lau Afioga i le Fofoga Fetalai, se e faamalulu atu lava i le sui usufono mamalu,

**FOFOGA FETALAI:** Se i tulai mai le sui usufono mo Salega Sasae.

**Tofa Olo Fiti Afoa Vaai:** O lea e manino lava ia lau faamatalaga, o la foi e molimau mai le atunuu, ae sili atu na matuia le upu na lafo e le Palemia ma lau upu na lafo. A, o le malepelepe, o le mativa elo, sili mamao lava le mamafa o upu na na i lo o lau tala sa fai, ia ae o la e faafofoga le Atua, faamasino mai le Atua, ia ae o le mea lea e saunoa ai le sui usufono, fai mai nei o le la tusi ma Viliamu ae se i vaai nei i le tulaga lea e saunoa ai,

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai e i ai se mea lea e...

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** e leaga o le faauigaina lena faaSamoa, tuusao lava upu o le least developing countries, e le o se faaupuga la a au. O upu na, e tuu uma lava i lalo o le Malo Aufaatasi ia atunuu uma lava ia e maualalo ia lo latou tamaoaiga. Ae o le faauiga sao lava lena o le upu lea na ou avatua. A tatou teuteu lumafale i upu, ona le manino lea, o le ala lena o lea ou te avatua ai upu tuusao o le faaliliuina o upu ia mai le Gagana Peretania.

19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E i ai le polokalame na fesiligia ai au i le aso ananafi, i le faauigaina foi o le tatalo a le Alii. O le faalavelave o le mea lena, lea tatou te tilotilo i le faauigaina o le Tatalo a le Alii e toeaiina foi lea e nofonofu i lalo o le talie, e le itumalo o le Sui Fofoga Fetalai. Lea na faaliliu ai e nai toeaiina i onapo, ae o le faaliliuga o le faaliliuga a isi foi tagata Peretania, ae faaliliu mai i ina, e isi foi tagata mai le gagana ia sa tusia ai le Tusi Paia. O lona uiga e tolu ia ituaiga faaliliu, lea la ua faaliliu mai, e le o le Tatalo la lena a le Alii tuusao mai lana gagana, a o le Tatalo lena a le Alii e pei ona faaupu ai e le afaaliliu upu, ia lea la ua oo mai iinei, i le tatou taimi, lea la e fesiligia ai au.

Ae o au ia mo mea o le ugapepe, ou te le malamalama i ia mea, ia lau Afioga i le Fofoga Fetalai, ae ou te manatu ai i mea nei o faaupuga nei, pau lava lea o le faaupuga matua ou malamalama lelei i ai. Ia o le mativa lea na sasai ai Samoa, ia ma le upu lena o le elo. Leaga o au sa lelei le aoga faapi tautau. O le ala lena e ala ai ona maai au komaliliu, ma au piliota, leaga e lelei tele le faifeau na ou aoga mai ai. Ia lau Afioga i le Fofoga Fetalai ia pei o le mea lena o le a tauau ina misa le aualii ia, i faaupuga, ae o mea ia, o faaupuga sao lava a tuusao mai e faigofie ona piki, piki e le isi. Ia o le mea la lea, onosai pe afai ua faauiga foi e le sui o tumua nei, leaga e oo loa i mea tau tumua, tau upu, tama la ia e tatou faalogologo i ai, o le autumua. Ia ae se i aumaia alii ia le faautautaga.

**FOFOGA FETALAI:** Ia ua saunoa foi le Afioga i le Palemia, e faamalamalama nisi o mea, ia ae ou te fautuaina, aua le faamamafaina ia le tatou Fono ananafi, e le Afioga e le sui usufono o Lufilufi.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Lau Afioga e le faatao matatao, lea foi ua saunoa le Taitai o le Malo, ia o atugaluga ia o le tootoo, ia ma lenei usugafono. Ioe, leaga e pala le maa ae le pala tala, ioe, e le mafai ona aveesea e nisi nei mea o le a faamaumau ai lava e oo i le faavavau.

Ia valaau mai ia le matou itumalo, ua fefefe, Alaiasa e i ai se isi 1.1 piliona lea i loan faaopoopo ia o le a i ai, ou fai atu, ua soo faafa lau faitau i le Tala o le Tupe e leai se mea. Ua tuu le au ae mai aau. E leai ni mea na o mea o lea e fuafua e leai se Tala o le Tupe lea e soalaupule nei, o i ai ni mea aua le faapopoleina outou. Lou itumalo, toa le tai, ioe, e le faaseseea le itumalo lenei i ni saunoaga. O lea ou te taulimaina le pepa lea o le Lipoti lea a le Central Bank, o mea anoa la ia...

**Tofa Olo Fiti Afoa Vaai:** Lau Afioga i le Fofoga Fetalai o se mea e fia faasao...

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O lea o le a faa-Samoa e ave i tua i toeaia la e faatali mai se i faailoa ai le sao o le tamaoaiga lea e i ai.

**FOFOGA FETALAI:** Malie le sui usufono se i tulai mai le faauilavea.

**Tofa Olo Fiti Afoa Vaai:** Lau Afioga i le Fofoga fetalai, o au na taua le mea lea. O le Afioga foi i le Minisita Lagolago, o le Accountant numera 1. A silasila nei i totonu o faamaumauga, 53% o le 2017/2018 o le debt to GDP lena. O le mea lea na ma talatalanoa ai ananafi i le GDP, e 2.2. A tago la le Sui Minisita e fai le calculation o le aitalafu, 1.113. E maua lelei lava. Leaga o au ia na o le fai maumaga a o lea ou te iloa fai le mea lea. O faamaumauga lea e aumai e le Minisita o Tupe. Afai la e sese i le Sui Minisita lau tala, o lona uiga e pepelo faamaumauga ia aumai totonu, leaga o le tusi lea na aumai i le lua vaiaso tatou te matamata ai. Ma le agaga faaaloalo.

**FOFOGA FETALAI:** Malo faafetai. Ae a pe a see atu ia lo oulua vaa i se isi mataupu?

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Lau Afioga, o lea ou te talanoa atu i le pepa lea sa saunoa i ai le Minisita o Tupe a o fai le saunoaga a le sui usufono e faamalamalamaga. E 1.06, lea e sau ai i i fuainumera fou a ia. O le ala la lea o lou fai atu leaga o lea e faa-Peretania, o lea o le a ou faa-Samoaina le pepa lea e tufa i lou itumalo ia malamalama ai, e leai se mea e atugalua ai i tulaga ia, o lea e lelei le tamaoaiga, o lea e manuia fuafuaga a le Malo aua Samoa. A le o lena foi, o le a ave faapapalagi leaga e lelei lava fenanui a toeaia i tua. Ua leva ona aoga ma lelei simili a toeaia.

Ia o faiga a ia o le soifuaga, a poia i afa se folauga, e atugalua a i afa le faiva o le tautai, fememeai le tautai, aisea? Pei lava ona ou fai atu o Samoa e tiu i paia ae mapo i mamalu, seu le manu ae tagai i le galu. E mau a e faalele mau e matau. Ona faapena lea o so matou faamoemoe, ia e tusa ai ma lena Tala o le Tupe ua tuuina mai. O lea ua folasia manaoga o isi itumalo.

Na pau lava lau tatalo, o lea foi na taumafai mai le isi Matagaluega e fai taiala o le faiga o atinae, ae o le taiala atoa o so o se itumalo, o la e sau ma le sui usufono, aua o mea ia na folafola e le sui usufono, a ou tulai mai i le tofi, o mea ia ou te faia, ia omai loa tagata lagolago le sui usufono. A uma la le nofoaiga a le sui usufono ae leai se mea, ia ua iloa foi le mea e oo i ai le sui usufono o tai i le tuaau se i tulou lava le gagana. A o le a tau fai foi nei taiala ma nei mea pei a standardize faasoloatoa leaga e eseese manaoga.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le mea lea, na ona matou faapena atu, nai atinae o le itumalo. Faafetai i le Afioga i le Minisita, faafetai tele lava i nisi o mea ua faataunuuina, ae tautuana, le Anoamaa Sasae i Lufilufi ma Falefa, ua leva ua 50 tausaga o le Malo ae leai se atinae, ai ona sa o toeiina e lagolago le itu foi lea e tetee ai le Malo, a o lea la ua tulai mai tagata e lagolagoina le Malo, se i tautuana, alofa ifo se i lalaga nai atinae mo si nei itumalo. E i ai le auala o lea ua taua mea nei o ambulance, e i ai le matou falemai i Lufilufi, ua uma foi ona foi mai ai le asiasiga. A alu atu le ambulance e alu i le falemai, toetiiti lava tele le mai o le mai lea na aumai i le salutulutu o le auala lea e toe foi mai ai i se i maua le aualatele, faamolemole se i silasila ifo, pe na o se selau mita le mamao o luga o le auala, ua tele la gasegase foi ia e tautau paina toto, e masaasaa uma lava i le leaga o le auala. Faamolemole lau Afioga se i silasila ifo i le tulaga o...

Faafetai mo galuega ua fai, i talivai ma nisi auala, ia faamanuia a le Atua i le Afioga i le Minisita. E le umi se faamatalaga a lenei itumalo, faafetai i le tapuaiga a si ou itumalo. Talu ai nei, ua lua faafeagaiga ua fou atu i totonu sa osi feagaiga ma nuu o le itumalo, o le mea lea, faamalo faafetai. Sa tele a foi i Pesega a o lea ua mapu i falematu le toa o le tai aua le taunuu atu o auauna a le Atua leaga e le atoa se nuu pe a leai ni faifeau. O le nuu lava ia o Samoa, o le pulega a alii ma faipule, faifeau uma loa. A leai la se faifeau ua faasevasevaloaia le soifua o tagata, aua e leai se faaleagaga o i ai. Tulai mai le Susuga ia Tafai Galumalemana i si o matou nuu i Falevao, selau pasene le tulai mai foi a lea faifeau. Ia faamanuia le Atua i lo oulua tulai mai. O le isi tama i Falefa o Tau Toleafoa, ia faamanuia le Atua. Toaga e tatalo ma toaga e asiasi i le nuu ma totogi lua lafoga, aua e te lua faaitaitai i isi tama e le totogia lafoga. A totogi a lua lafoga, ia e manuia oulua faiva.

Ia, se e i ai tofiga foi ia e faaea itumalo i tulaga faapea, e pei foi la o faifeau. E i ai si ou uso ua tofia i le mea lea o le turisi lea e fesili soo ai le tatou vaega, o le Susuga i le Faamatuainu o le susuga a Lufilufi. O le mea lea, faamalo faafetai i lou tulai mai ia sagai ane, ia e faaaloalo ma e usitai i le Minisita, ae aua e te lua inu ma le Minisita e vave ai ona e faaletonu, ae pau lava le mea ia e usitai i ai. A ia faamanuia tele le Atua i lou tulai mai, ia maua sou finagalo ia atili ai ona tele teineiti aulelei e omai mai fafo e asiasi mai i le tatou Malo, leaga e talavou le tama, e aulelei foi.

Ia, o au faatoa ou foi mai nei ua ou fealuai nei i auala laupapa foi nei o le tatou malae vaalele, se e ese le manaia. E le tau selu atu, ua siitia le tulaga. O mea ia sa tatou moomoo i ai, a ua a? O lea ua tali mai. A tatou tuu lava i faitioga ma nei mea e aumai, ia e leai ni tatou mea faapea e maua, peitai ane tatou te le silisili i ia tulaga.

**FOFOGA FETALAI: Faafetai.** Malo. Ia ua maea le taimi o le sui usufono.

*19 IUNI 2019*

**Tulafono Tau Faaofi o le Faatatauina o Tupe Faaopopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Ia le paia e o le itumalo, le afifio o Aiga Sa Fenunuivao ma le Aiga Sa Alaiasa, ae a le afio o le Aloalii, laua Matua ma Iuli ma Moeonoono ma le tofi faasolo i le aai, o lea lava e malosi le tou sui usufono. Ioe, o lea ua uma ona ou foi mai i Niu Sila i lau siaki, ua pei foi o le iliafi le tata o lou fatu o lea lava e lelei. I le tapuaiga ia Lufilufi, o oe o le Tumua, le Toaono ma le Saofaiga, Tupai ma Seutatia ma le mamalu ia te oe Lufilufi ma ou fuaiala, le Matua ia Ti ma Tagata, ia Tai ma Fonotia. Faafetai tele i la outou faaaloalo. O lea ou te tauave le tatou... you know o le mea lea o Lufilufi e le faigofie le va feagai ai i totonu o le Maota lenei ma totonu o Samoa. O le a foi se vaivai o le auauna, leai e taumafai lava.

**Tofa Olo Fiti Afoa Vaai:** Lau Afioga i le Fofoga Fetalai, leai na ou fia fesoasoani atu lava i le sui usufono mamalu e tau faamama lana sausu o lea ua ou vaai atu ua amata ona fefe le Minisita e le i taitai se la palota.

**FOFOGA FETALAI:** Ia, e ui lava e le lavea i le Tulafono Tumau se fesoasoani a le isi sui usufono i le isi sui usufono, ae ui i lea , ia taoto atu ia i ina i ou tafatafa Lufilufi.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Leai o le aso ananafi, ua tau saia fua le maaveave le fua i le misa a le aualii ia, tau ai fua ma lou alu i Maa ae ou le alu i o i Salega. O au ou te le toe tepa i tua i ia tulaga. O au foi ou te le alu alu i se mea ou toe sau ou toe taumafai atu, e leai, a ou alu loa i luma, alu i luma, ioe. A ua tasi le itumalo ia te au, ou te alofa i ai. O le mea lea, ia manuia lou tulai mai Olo. Ia agalelei mai le Atua.

O le tulaga o taaloga a le tatou atunuu, o lea ua outou silasila i ai Samoa, e le te i te i tulai mai taaloga ia i le manuia, o lena tou te silafia o le Minisita o le tagata sa logologoa i taaloga, o le mea foi lena e tapena ai le uta ma le tai, o luga ma lalo. So o se ituaiga mea ua tapena e le Minisita e faamatagofie ai le faamoemoe, e ui ina leai se tupe ma utiuti le faaso. Ioe, a o lea lava e tapena faafafine toaga aua ni ai mo lau Afioga i le Fofoga Fetalai aemaise le Afioga i le Palemia ma le Kapeneta.

Ona faapea lea o sa matou faamatalaga, ia e poto lava le tautai ae le atoa ni ia i lona faiva. O le a foi sa outou faafofoga Samoa aemaise o le paia o le Maota, se ua ta fia talanoa umi, ae o le faalavelave, o lea ua e saunoa ua uma lou taimi, o au ou te ava tele i le Nofoa. A o le a se tou faafofoga ua taulaulu se faamatalaga, Lufilufi, ia lafo ia i ava magalo le faamoemoe, vaatele i lo outou finagalo se matou tala. Alofa mai le Atua ia i ai ona manuia i lenei Palemene.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Le susuga i le Taitai o le Maota, Minisita o le Kapeneta, aemaise le Palemene o Samoa. Soifua manuia lau Afioga, ua ou alofa atu lava e fai ma e tau tootoo mai, ae malo faatoatoa, o lou toa lena e le mafai, leaga a ou tala foi le mea lea ona e faapea foi lea ua ou oo i tulaga ia. Ae ia manuia tele le tulai mai o lau Afioga ia maua sou finagalo. Soifua ma ia manuia le tapuaiga a Samoa, ae ola la outou auauna i le alofa o le Atua. Faafetai.

**FOFOGA FETALAI:** Malo. O upu lava a le tamaloa Atua, e sau lava le fuauli e toa le moa. Ia, malo e le tau viivii atu pe tau faafuluina le toga lelei. Ae malo saunoa, faafetai foi malele. Malo saunoa faa-Tumua ma fetalai faa-Tumua. Ia ua ou manatu ua faigofie foi le galuega ma ua vave foi le pitolaau a le Malo, o lea ua uma lea itu o le Maota ona saunoa. E momoli atu ai le faafetai ma le faamalo, o le tatou galuega e tausoa. Masalo e le o toe mamao foi, toe lava o toeaaina matutua ia, ana ua tulai mai Faumuina ma Fonotoe ma le Tuiatua Faanofonofu ua tali loa le Taitaifono a ua uma lena itu o le tatou malu.

O ai le tama lea e tulai mai? Ia se i tuu atu le avanoa i lou uso mai Faleata Sisifo.

**Tofa LEALAILEPULE RIMONI AIAFI (Faleata Sisifo):** Lau Afioga e le o au o sou uso, o au o lou atalii. Sa leai se lagona e le taimi lenei o Faleata, leaga o eleele nei ua mavae Faleata e ave mo Samoa, o le malae o le tagatia a Samoa. O lea la Tuisamau, sa ou le fia faalavelave i lau lauga. Vaimauga, e sa sa ona e toe faia se tala faapea i totonu o le Maota lenei.

Lau Afioga, pei lava ona malie i lau saunoaga, o lea ua lata le vaivaa, e le o toe mamao foi toe lua a tatou lauga faapenei o le Tala o le Tupe, aua o le lumanai, e na o le Atua na te silafia, ae a maua loa lou avanoa na aumai le Atua ma aumai e lou itumalo, faaoga tatau. Aua o upu tatou te tautatala ai iinei vaeane le paia o Samoa ma le Maota, o upu e faamaumau, faamaumau ma fesili ai taeao pe a lo tatou sao i le faatautaiga o Samoa.

O lea ma lou faaaloalo tele ou te solituina ai le paia ole Maota o Samoa i lau Afioga i le Fofoga Fetalai, lau Afioga i le Palemia ma le Kapeneta, sui usufono mamalu uma o le Palemene, faamalo le usufono. Le tapuaiga a Samoa i ona tulaga faalupe, le afaigaluega tofofi a le Atua, le Susu o Lana Afioga Mamalu O Le Ao o le Malo ma Samoa i ona tulaga faalupe, ou te faatulou ma faatalofa atu i lenei itula. Faafetai le tapuai ma nonomanu a o alo lau Palemene aua Samoa ma a taeao.

E faatalofa ma faamalo atu foi i lau fetalai Namulauulu, faamalo le toa ma le sailimalo, malo saunoa, o lena ua faamanuia atu Lufilufi, ia manuia lou tulai mai maua se ai o le itumalo. O le manaia o le Tala o le Tupe lenei lau Afioga i le Fofoga Fetalai, e uma loa ona sisi le Fua, tatou tauaofia loa le Fono. E te sau la ete usufono, e te sau ma lou loto fiafia, sau ma lou lototele ma lou loto faafetai i le Atua, o Samoa o le atunuu muamua na tutoatasi i le Vasa Pasefika.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E te sau ma e fesili ia te oe lava, o le a sou sao a o le a sau mea e fai, pe a tatou tomanatu i le tausaga mai o Samoa i le taumafai mai i le amataga, talofa i o tatou tuua. A o lea ua manuia ua 57 tausaga o tutoatasi le tatou atunuu. Ona ou faapea lava lea o au, ou toe taumafai e tali lau fesili; a, se o lou sao la lea, o lou sao lea, taumafai e faatumau le tutoatasi o Samoa ma faaauau le galuega lelei ma le fita na taumafai mai e o tatou matua, o tatou o tausimea, ia tumau Samoa i lona Faavae, e faavae i le Atua. Aua i lou talitonuga maumaututu ma lenei Palemene, o le Faavae lea e manuia ai Samoa mai e lua ma le agai i le lumanai tatou faavae i le Atua.

Sa fai le tatalaga o se tasi workshop, aoaoga sa fai i se tasi o faletalimalo i le amataga o le tausaga, sa tatala e le faifeau ma le Palemia, na uma loa ma savavali mai ma lau uo Fiti o le tagaeta ua leva ona faigaluega i fafo. Fai mai le tamalii lea, Leala, e fai le tatalaga o le tatou Fono nei ae maligi ou loimata, na ou faapea atu ia te outou, amuia outou, leitioa a manuia Samoa tou te tumau i le tou Faavae ma tatalo i le Atua e faamanuia. O le matou atunuu, ua ese le tulaga lea ua i ai, its no longer a christian state, its a circular state. A e alu e te tatalo, ua tau faasa tatalo i totonu o mafutaga e fai. A fai foi se tatalo ua tusi atu lau tatalo e te tatalo ai ua faasa ona toe tau le Atua, leaga e tele Atua e tapuai le atunuu. Tele le faaletonu, ae amuia outou Samoa, a outou tumau ai i lona, e le mafai ona faaletonu tatou, outou. O le ala lea lau Afioga, o le a le tele o faigata, puapuaga, o mea o le olaga, e tumau a tatou i le Faavae lea e le mafai ona suia.

Ona ou oo mai lea lau Afioga i le Tala o le Tupe, e sefulu tausaga o ma i o ma Levao, vaeane le fetalaiga ia Olo, sefulu tausaga lea a e tomanatu i tua i taimi na lauga ai Lealailepule, e leai se taimi na ou lauga ai ma ou faapea ou te tetee i se Tala o le Tupe. E le gata e le tetee i le Tala o le Tupe, ou te le tetee foi i ni aitalafu. Aisea? Amuia tatou o lea tatou te omai e faasoasoa tupe ma le tamaoiga o Samoa, tausaga uma, tausaga uma. O le a ou oo i ai ise vaega, leaga e tataua ona ou tautala i ai lau Afioga e fesoasoani i mea nei o aitalafu, o le mea lea o le deficit i lou talitonuga. I lou talitonuga lau Afioga, o lo o faamalieina Samoa atoa ma o tatou manaoga i a tatou tupe maua, mai le amataga ina ua ou taunuu mai le 2006 i le tatou tupe na maua pe a faatusa i le tupe maua i le tausaga lenei, ua matua tele le siitaga. O i ina e atagia ai le suiga o Samoa ua i ai i ana atinae. A uma la ona faamalie o tatou manaoga i aso fai pea, ona tatou mananao lea e atiae Samoa, o le ala lea e ala ai ona tatou nofo aitalafu ma i ai le mea lea e tau o le deficit. Afai la e finagalo le sui usufono e aua le atiae le atunuu ma aua le atiae lona ia lava tagata, e le mafai la ona tatou faatinoina i tupe ia tatou te maua mai. A faapea o le tupe pau po o le deficit lea a Samoa e faatau ai tatou meaa i ma totogi ai tatou, ona ou popole loa lea. Ae afai e ala ona tatou nono ma aumai tupe ona e faatino ai atinae, o le ala lea, aua tatou te popole pe atuatuvaale.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le mea taua lau Afioga, o le tele o tatou lea e i ai nei, ua ova i le 50 tausaga o tatou ola, nonofo ma tutupu ae i Samoa. O le faigofie ia ona faafetuunai lou mafaufau. E a Samoa i le 50 tausaga talu ai faatusa i le taimi lenei? O i ina e te fua i ai. E pei o lea e faamamafa le vaai a tatou ma le Ofisa o Tupe i le mea lea tatou te pisa ai pei o le debt, ratio GDP lea e fai nei, le service ratio lea e i ai nei. Se o mea na is like a theory, e faaoga uma e le tele o atunuu, o mea e appear.

A o le mea, e lua mea, o le mea e tau o le theory ma le mea e tau o le logic, e faaoga tatau o le fuafuaga tatau a tagata. Leaga foi o tatou e tatou te le o nonotupe mai commercial banks, po o ni tupe foi nei financial markets. O tatou lea e faamanuiaina i mea ia o consessionary loans, lea na saunoa i ai le sui atamai lea mai Falealili Sisifo. Mai le luasefulu i le tolusefulu tausaga talu ai, na o nai sene ia e togitogi ai aitalafu, ae moomia mo tatou e faatino ai le agai i luma o le tatou atunuu.

O le mea la lea lau Afioga, sa ou fia oo foi lava i le mea lea sa saunoa i ai si ou uso, vaeane le Afioga i le sui usufono faatoa uma atu nei, i le mea lea o le sefe panikeke ae ou faapea, e leai, e le valea Samoa, e le o ni paluga panikeke mea ia e fai nei. O i lava lea e fai ai le atunuu o Samoa.

**FOFOGA FETALAI:** Malie le sui usufono mo Faleata se i tulai mai le sui usufono mo Anoamaa.

**Afioga Alaiasa Muagututia Moefaauouo Malagaitutogiai Sepulona Moananu:** Lau Afioga i le Fofoga Fetalai, leai o se mea e fia faasao i le sui usufono o lo o saunoa nei, leaga lea e fai mai o lau saunoaga lea e aafia ai le mea lea o le sefe panikeke po o lau lauga. E leai e faamalie atu e le o au e ona le lauga lea, ae saunoa sao i le tagata e ona le saunoaga, ae aua le faatutu mai ia te au leaga ou te le faatusa faapena Samoa i se sefe panikeke. Ia ma le agaga faaaloalo.

**FOFOGA FETALAI:** Se i onosai....

**Tofa Olo Fiti Afoa Vaai:** Lau Afioga i le Fofoga Fetalai o le mea e fia faasao, e uma atu le isi lauia lea na foi na sese muamua mai, a o lea foi ou te vaai atu e sese foi le isi lauia. O lona uiga, e le o ni lauia mea ia o mea o afi. E ta te fiu e faamalamalama atu le aualii ia e le malamalama i au tala e fai atu. Ia alofa ifo lau Afioga i le Palemia se i tau faamalamalama ifo tama ia e toalua.

**FOFOGA FETALAI:** Ia manatua foi o le afi e mafai lava ona afifi ai le ia lapoa?

**Tofa LEALAILEPULE RIMONI AIAFI:** Ia o le a see ese leaga o Faleata e le ai panikeke vaeane le faafofogaaga a Samoa, ou te ai Mc Donald.

**19 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malie le sui usufono mo Faleata o lea e tulai mai le faauilavea a Falealili, ae ua ou manatu, e a pe a se i tatou foi mai faaauau le faauilavea a Falealili, leaga o lea ua tatou oo i le taimi o le tatou malologa, leaga tatou te toe amata nanei i le 7:00 ona faaauau ai lea o le faauilavea a Falealili.

Ou te faasilasila atu o le a faataatiaese Galuega a le Fono Aoaofaitulafono mo le tatou malologa, tatou toe amata i le itula e 7:00 nanei i le afiafi seia paia le itula e 11:00 i le po.

*Na faataatiaese Taulumaga a le Fono Aoaofaitulafono i le itula e 12:59 i le aoauli.*

*Na toe faaauau Taulumaga a le Fono Aoaofaitulafono i le itula e 7:00 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono. Ia, malo le onosai mai mo le faataunuina o le tatou Galuega.

E faataatiaese Galuega ma Taulumaga o le Fono Aoaofaitulafono i le malama ua tuanai o saunoa le sui usufono mo Faleata Sisifo. Ia, ou te tapa le sui usufono e tulai mai. Talu ai ona o lea na tulai mai le... masalo ai ua uma ona lua fale i tua le tulaga o le faauilavea a le sui usufono mo Falealili Sasae. Ia, tulai maia le sui usufono mo Faleata Sisifo e saunoa.

Ia, se i tulai maia le sui usufono mo Falealili Sasae.

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, leai e le faalavelave i le saunoaga a le sui usufono, pau lava le mea o faamaumauga ina ia faasao faamaumauga. E le o Falealili Sisifo. O lou taua o le vaega lea i le pasene foi lea e totogi ai aitalafu sa lavea ifo i le lauga a le sui usufono mo Falealili Sasae. Mo faamaumauga faamolemole. Faafetai.

**FOFOGA FETALAI:** Malo faafetai. Ia tulai maia lau Afioga i le sui usufono mamalu mo Faleata Sisifo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa LEALAIPEPULU RIMONI AIAFI:** E toe faatalofa atu i le paia o le usugafono a Samoa i lau Afioga i le Fofoga Fetalai aemaise le paia lasilasi o le Maota i lau Afioga i le Palemia aemaise foi le faafofoga tapuai a Samoa, faamalo le onosai i lenei aso, e talitonu ua maua sina malosi e fesoasoani i a tatou galuega faaaauu, aemaise le Kapeneta o lea sa fono foi i le aoauli, o lea ua toe faaaauu le tatou galuega, malo taupati mai aua le toe pasiaina o le Tala o le Tupe mo le faaaauuina o galuega faatino a Samoa.

E tuu le galuega analeila lau Afioga, a o lea ua faasolosolo lau lauga i le vaega tonu lea i aitalafu, ona o se mea aupito sili lea ona taua. Na uma le Fono matou talanoa ma nisi ou uso a faipule pei ua ula mai ia te au i lau tala lea e faapea talu ona sau i le Palemene e sefulu tausaga i le Itu Agai ou te le i tetee i se Tala o le Tupe, o la e faauigasese lau tala. Ae o le uiga sao o lau tala, ou te le tetee i mea e tatau ona tetee ai, a o le Tala a ia o le Tupe pe a talanoaina, e le tetee i ai Leala. E le tetee i aitalafu.

O le mea lea, ona e fia oo i ai lau faamatalaga lau Afioga e faamanino ai se vaega laitiiti lea, o le ala o le tetee, ona o lea e aumai pea e tatou ma nisi o sui usufono le mea lea o le debt i le GDP, le ratio lea tatou te talanoa ai pea, a o lea e faaoga pei se mea foi lele e faaoga lautele e le tele o atunuu e fua agai i ai le... ae lua vaega taua, lea e faamamafa soo e le Afioga i le Palemia i nisi o taimi, le mea lea ou te malamalama lelei i ai ma ou fia talanoa laitiiti i ai, o le mea lea e tau o le debt service ratio, o le tologiina o aitalafu. O le mea pito sili lea ona taua lea lau Afioga ona e le o faamamafaina, a o le mea aupito sili lea ona taua. A e alu atu e nono au tupe, e tasi a le mea e fia vaai i ai le faletupe, pe mafai, e i ai sou malosi e totogi ai lau aitalafu. O le mea taua lea.

I le faasologa mai la o le tatou mea lea mai le 1987 seia oo mai i le taimi nei, o faamaumaga a Faletupe o le Lalolagi, lea e i ai le website, leaga o au ou te masani i le mea o le IT. O lau field lea, po o fea lava ou te i ai pe inu kofe pe ou te nofo i lou fale e ki lava lau computer i le mea lea, ou te vaavaai i numera nei. E faapea la se i uma avatu se fuainumera i si ou uso o Levao, e te tago la e ki ona e tilotilo lea i ai ia Samoa po o fea tonu le mea lea e i ai e faatusatusa i nisi atunuu o le lalolagi.

**Tofa Olo Fiti Afoa Vaai:** Lau Afioga i le Fofoga fetalai o se mea e fia faamalamalama, ou te le fia faalavelave i le saunoaga a le sui usufono....

**FOFOGA FETALAI:** Ia, e faamalie atu i le sui usufono mo Faleata Sisifo, se i tulai mai le sui usufono mo Salega e i ai se mea e manao ai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa Olo Fiti Afoa Vaai:** Lau Afioga i le Fofoga Fetalai ma le mamalu o le Maota, faafetai o lea ua oo le saunoaga a le Minisita Lagolago i le tulaga lea o le IT, ma informations ia i luga o le website. Ou te iloa foi o le Afioga i le Minisita Lagolago, o ia lea e Minisita tonu lava i mea ia o communications. Ou te le iloa po o le a le information lea e saunoa mai ai le sui usufono, ae a silasila lau Afioga ma le mamalu o le Maota i luga o le website, o la e i ai lava faamatalaga o la e 2G, ae ua 4G le mea lea ua i ai, 4G le saosaoa o le saunoaga a le Minisita Lagolago ae le o update ina informations la e i luga o le website.

Ae silafia lau Afioga, o i tonu lava e muamua fetagofi mai i ai le aufaipisinisi, e vaavaai mai ia Samoa po o a ni pisinisi e ono fai i totonu o Samoa, a o lea e le o update ina mea ia e talanoa mai ai. E pei o le mea lena ua ou tulai atu ai, pei o lea o le a sau i le mea lea o le IT ma mea na, ae na te le o faia lana galuega e faa-update informations ia aua na o le fealualuai solo ou te le iloa po o le a lana galuega lea e fai.

**Tofa LEALAILEPULE RIMONI AIAFI:** Ia faafetai lava i si ou uso, se i ou oo i le IT ona ou talanoa lea i le IT, o Levao, sa ma faigaluega i le malae vaalele a o le tagata e matautia, ia Olo. A le faigaluega Olo, e le mafai ona land vaalele aua o ia e kiia moli. Na pau lava lea o le mea a Levao e fai, ki le moli toe tape le moli. E le i oo le malamalama o Levao i le mea e tau o le 4G, a o lea ua 5G le mea. E ui i lea, se i oo i le taimi lea. A o le mea lea, se i ou toe foi lava i le mea...

**FOFOGA FETALAI:** Malie le sui usufono mo Faleata Sisifo se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e i ai le mea lea ou te fia fesili atu ai ou te fia malamalama ai. O ai la sa faatonuina Olo e ki moli? O ai sa faatonua?

**FOFOGA FETALAI:** Ia se i tulai mai po o ai e...

**Tofa LEALAILEPULE RIMONI AIAFI:** Sa faatonu e Lealailepule. Ia ae vaai la i ai i le malie o le ma mafutaga ma lau tama, uma loa fai le ma misa ou tulia, ae sau foi ia i tua fai le mea e tuli ai, tuli loa au e Faumui. A o lea la ua ma toe omai i i, o le mea la lena o lea ou te fai atu ai i le faiga e le Alii o le mea a? Ou te alofa i si ou uso, lau Afioga i le Fofoga Fetalai, e le o se mea lea ou te fia tautala i ai.

**FOFOGA FETALAI:** O lona uiga e taufai leaga uma oulua.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa LEALAILEPULE RIMONI AIAFI:** Aua foi o tatou e faapena uma lava tatou te leaga uma lava, ae sili atu lou lelei i lo oe lau Afioga i le Fofoga Fetalai. E faamalulu atu i lau Afioga, e leai. A o le vaega la lea, a outou tagai i ai i le totogiina o aitalafu nei, o lea foi ua tatou oo i le 9%, aua e alu i lalo i le 3pasene alu i luga i le taimi o afa ma mea na. A o le fesili la ou te fia fesili ai, lea e fesili soo ai nisi o sui usufono, o le fesili lau Afioga, pe mafai ona toe aitalafu Samoa pe ua ova aitalafu Samoa? O le fesili lena. I lou lava talitonuga ma lau suesuega lea e i ai fua i suesuega ia e i ai e fua i faletupe o le lalolagi, o lo o tele le avanoa e mafai ona toe nono ai Samoa. E iva pasene lea e i ai tatou i lalo i i le totogiina o aitalafu, ae 14pasene lea e faatulaga mai e mafai ona oo i ai i le tulaga o atunuu e fua i ai lo tatou tamaoaiga. A o le mea lea ou te faafetai ai i le Afioga i le Minisita o Tupe, faapea le Failautusi o Tupe ma le tatou Matagaluega, o lea e faatino fuafua tatau. O le mea lea e tau o le fuafua tatau. Faatoa aitalafu lava tatou pe ova le paketi pe a moomia atinae lea e i ai.

O le isi vaega e tatau ona o tatou malamalama i ai lau Afioga o le GDP lea e pisa ai ma le tupe maua. O le 2006 na ma oo mai ai i totonu o le Maota Fono lenei ma Levao, Olo, faamalulu atu leaga o le ma tausaga, ma te oo mai i le 2006 lau Afioga, e 1.35pilion a Samoa, e oo mai i le 2010, e 1.57pilion. Oo mai i le 2015 e 1.91pilion, i le taimi lenei ia Mati o le tausaga nei, e 2.3pilion. O lona uiga i totonu o le vaega lea i le taimi lea ua aumai ai, ua ova i le piliona le tele o le tupe faaopoopo o le tamaoaiga o Samoa. Afai la e alu i luga le aitalafu, e tatau, tatau e fuafua i atinae ma le tupe maua a Samoa. Ou sau iinei i le 2006 na o le 430miliona i le tausaga. Oo mai i le 2016, e 650miliona tupe maua, a o le tausaga nei, o lena ua i outou luma le tupe maua ma le tupe faaopoopo e i ai, o lea toeitiiti oo i le 900 ma ona tupu miliona le tupe e maua. O le a la se fua i ai a tatou? O se atunuu ua alu i luma po o se atunuu alu i tua? Ia e le tau fai atu, aua o fuainumera, o mea ia e tautatala mai o mea mautinoa mea ia, o lea e avatu ai le faamalo i le Malo ma tatou uma, tatou galuega e fai faatasi, ina ia aua ia ne i toe faapopoleina i tatou. O lou itumalo e le popole aua e talanoa tagata i le imeli, talanoa i luga o websites, na ona fesili mai lava alu atu le tali tilotilo sau le tali, faafetai Lealailepule, uma. Aua o le mea lea ou te fai atu ai lau Afioga, o le atunuu pito sili ona miliona i le lalolagi o Amerika, o le atunuu foi lea e aupito tele aitalafu lea i le lalolagi atoa, e numera tasi i le tamaoaiga, numera tasi i aitalafu. Ia a o lea tatou te faaaogaina. O tupe ia tatou te faaaogaina mai Faletupe o le Lalolagi, o savings a isi atunuu. O savings a isi atunuu lea e teu i o ae o atu tatou faaoga ma togitogi i nai tului laiti aua le atinaeina o le tatou Malo. O lea la ua fuafua nei le Malo e fai le uafu tele lea i Vaiusu, e le o se mea fou lau Afioga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

A tatou vaai i tua o le hansard ma tua o le Faavae o le atunuu lenei, o i lava na fuafua e fai ai le uafu lea ae le i tutoatasi Samoa i le vaega tonu lea o le a fai ai nei. Ae ua ou oo mai i le Palemene, finau e fai, o le mea e tatau ona faatino. O le a se tou tagai i le malae vaalele o i ai nei, ua fia ni malae vaalele talu ona tatou tulai mai? O lea ua e oso mai ua e oso sao i totonu o le ea malulu. E le tatau ea ona e faafetai, faafetai i le Atua i lana faamanuiaga, i latou o lo o galulue aua le tatou atunuu. E lua mea, o le suiga, o le change ma le progress, o suiga lelei. Aua tatou te tilotilo na o suiga ae tatou tilotilo ma faatau suiga lelei. A le faia nei uafu nei, o le isi lima tausaga ua faaluaina pe faatoluina le tau. Ae a faatino i le taimi lenei, ona o le mea lea e tilotilo ai tatou, e le faapea na o tatou, o le isi lea lumanai o Samoa i le vaai mai fafo, e tuese a Samoa, we are very isolated, e tuese mai isi atunuu. A o le mea lea tatou te tatala, e aumai ai le lalolagi totonu o Samoa ma avatu ai Samoa i le lalolagi. Ua globalisation le lalolagi, ua tasi le lalolagi atoa. O mea la ia e mafai ona o tatou faatioina ma faaoga tatou i le o atu o vaa o i luga omai i lalo o atu i luga ma afe mai iinei faaoga tatou ma tele ai le tatou tamaoiga ma manuia ai le tatou atunuu. Ua vaiti le uafu lea i Faleata i Vaiusu ua tatau ona faatino, o se tuualalo i lau Afioga. O lea la, e le tau selu atu o i la tatou te talanoa ai ma tatou faafetai i le taitaiga o le tatou Malo e le Afioga i le Palemia, Minisita o le Kapeneta ma Minisita Lagolago ma sui mamalu uma o le palemene. Faamalo, e le selu atu.

A tatou vaai ai i atunuu uma o le lalolagi, e oo lava ia Peretania o le mea na amata mai ai le palemene, o la ua tuli le Palemia, tau sue se Palemia fou ma tatou uso a tuaoi sui le Palemia o Papua, vevesi Solomona a o atunuu lata mai, ae a Samoa? O le a la le mea tatou te popole ma te i ai, a tatou tumau i le faatuatua ma le faavae o Samoa lea na amata ai le lauga, o lena. Faamalo i lau Afioga i le Taitai, faamalo le toa, ioe e le fai atu e toa, leaga tatou te totoa uma lava, ae e i ai foi le taimi tatou te toa faavalevlea ai, ae o le toa, e tasi le mea taulai o le sa o Samoa ia sao. Aua e i ai le taimi e tatau ona alu i tua, e i ai le taimi e tatau ona alu i autafa, po o fea e fetuunai i ai, a ia taua le sao o le sa o Samoa.

**FOFOGA FETALAI:** Ua maea le taimi o le sui usufono.

**Tofa LEALAILEPULE RIMONI AIAFI:** Se ta te ofo tama o lea faatoa lua ata upu a o lea ua uma lota taimi. O lea o le a uma atu o lea te le i oo i lota itumalo. Ma lou faaloalo.

**FOFOGA FETALAI:** Ua lelei. Ia faauma mai le saunoaga a le sui usufono.

19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa LEALAILEPULE RIMONI AFIAFI:** E lei i ai ma sau tala i le Budget lau Afioga. Ona ou oo mai lea i le LTA, o se mataupu lava lea lau Afioga e fia avatu ai se tuualalo i le Malo, leaga o lea ua see le sa o le Kapeneta i le mataupu lea. Na o se tuualalo i le Palemia ma le Minisita aemaise le Afioga i le Palemia, o lea e i le Maota nei sui na faia reforms nei, le Afioga ia Sili ma le Afioga ia Faumuina, tasi nei reforms o lo o talanoa ai pea le Pasefika. Ou te le selu atu, le taua ma le taimi na faatino ai, e le i faatinoina faatemutemu, ae o le mea lea ua tulai mai, e tatalo atu, afai ua aveese le vaega lea o traffic, ou te talitonu o le mea e tatau ona fai, leaga e le i manino le faatulaga mai, o leoleo. A o le pasiaina o taavale ma le pasiaina o laisene ma isi vaega uma, o lau tatalo lau Afioga i le Palemia ma le Kapeneta, ou te talitonu o le matafaioi tonu lea e tatau ona taatia pea i le LTA, o lo o i ai le latou tomai ma le iloa ma le silafia e faatino ai e latou vaega ia, aua o latou o le operator, a o leoleo lava ia o Tulafono. O le mea lea ua tupu lau Afioga, leaga ou te malamalama o tatou ua leva iinei i le Palemene, ona ua fia Leoleo le LTA. O le mea lene pei ua tau palapala ai loto o Leoleo ma sui le latou... ae ana tumau lava latou i le latou core functions ma le mea na avatu e fai e leai se vevesi. O le mea lea e tatalo atu ai i lau Afioga, toe liuliu le tofa i lea vaega taua.

A o le isi mea, o tatou auala, ua tatau ona sui standards o tatou auala, a e taamilo nei i tua, ua vai ai auala, o le mea lava lea na tatou sau ai i aso ia, e fa mita e faata ae ono mita e kilia, e le toe ofi ai ni taavale. Sa fetau i le sefulu tausaga talu ai pe luasefulu tausaga talu ai, ua tatau ona toe sui e ono mita le faata ae valu mita le faalatele ia kilia, e i ai foi le rule for safety mo tagata feoai. Ma standardise le faiga o mea, ese le patupatu i Alafua ese le patupatu i Vaivase, e eseese uma. E tatau ona laugatasia uma mea, e o o i auala, edges o auala foi nei e sau i totonu ae a pe a se i faagatasi, a e vaai i auala, e muamua leaga e tae mai tua. Ta te le tau aoga inisinia tatou te iloa ai, ae tau fesoasoani atu i le Minisita ma le Matagaluega, o mea foi nei e ala ai ona ote le tatou Malo, o mea faigofie, commonsense, se i tagai ane i ai faamolemole.

O le isi mea aupito sili ona ou fia talanoa i ai, ona o lea ou te faalogo ua fai inisinia a le MWTI. O lau fesili lau Afioga, aisea? O mea ia e sau uma i reforms ia e le toe i ai ni inisinia i i, e ave inisinia i le LTA. Vaai i le galuega lea e fai i Maluafou i le auala laupapa, ou te alu atu o i ai le tamaititi i ina ou te le tau atua vaeane, ou fai atu loa, o ai le tama Initia la e tuu mai o? Fai mai, o le inisinia a le MWTI. Ou fai atu, o, o le a lana mea la e fai i o? O la e sau e vaai matou galuega. Ou fai atu, ae a outou? Mato u o Inisinia a le LTA. Ou fai atu, oi sole, sau le isi inisinia e vaai galuega a le isi inisinia. O a nei mea e faapenei ona fai? Ia, a o lau tuualalo, e le tatau, toe silasila ma vaavaai o lea e duplicate services ma tele le tupe maumau a o lea ua ave le faatuatuaga ia ia, o i, o le latou faatuatuaga, vaai auala ia saogalemu, vaai taavale o lo o feoai i luga o le auala ma so o se masini ma so o se tagata e talafeagai ma agavaa i luga o le aualatele.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa Olo Fiti Afoa Vaai:** Lau Afioga i le Fofoga fetalai, na o sina mea lava lea ua oo i ai le saunoaga a le sui usufono. O lea sa i ai le sui usufono i totonu o le Maota leni i le talanoaina o le Tulafono a le MWTI ma le faatauuina o le i ai o ni Inisinia i le MWTI o le regulator o galuega ia sa faatino e le LTA. O le aoga ia o le mea sa tatou talanoa i ai o le monitor mai e Inisinia o le MWTI o Inisinia ia o le a project managers i poloketi a le atunuu. A faapea la o le a finagalo le sui usufono e aua ne i toe i ai ni Inisinia a le MWTI, ia o le a la le mea o le a fai? O le a tafili saunoa iai Inisinia ia o le a hire e kamupani i le faiga o poloketi a le tatou atunuu. E pei o se mea lena ua galo i le sui usufono.

**FOFOGA FETALAI:** Malo faafetai. Tautuana ma le sui usufono....

Ia se i tulai mai le Minisita e fitoitonu i ai le...

**Susuga Hon Papaliitele Niko Lee Hang:** Lau Afioga i le Fofoga Fetalai, e le fia faalavelaveina le saunoaga matagofie a lou uso ia Lealailepule. Ai ua galo ia Lealailepule le faatalanoaina o le mataupu lea. Ae ua ae foi se tofa aua e i ai lava taimi e fai ai suiga. I leni vaitau, ona o le MWTI o le Regulator lena e faatonutonu ma vaavaai le faiga o tatou galuega tetele. Ia sa i ai lava inisinia. O le inisinia lea e te fesiligia o le inisinia lea o le fesoasoani Ausetalia mo technical assistance e aumai e fesoasoani i a tatou galuega tetele. Ole tamaloa lea ua fai si leva o galue i le faiga o auala laupapa ma tulaga faapena, lea ua faaoga e le Matagaluega, faatino le tulaga lea ina ia mautinoa ua lelei ma saogalemu ma malos galuega ia e faatino e konekarate, aemaise foi o le aoga foi o le tulaga lea. E sao la e i ai inisinia a le LTA, ae e o atu la inisinia a le LTA ae tatau lava ona i ai se inisinia faapitoa i totonu o le tatou Ofisa lea o le MWTI, aua pei o le ofisa lea o le Regulator lea na te vaavaai ma faatonutonu po o a ni tulaga, aua e i ai foi taimi e lape ai le isi Inisinia, alu atu le isi Inisinia ona o tatou galuega tetele e tele tatou tupe e faaalu ai ina ia mautinoa o la e lelei le faatinoga o galuega. E pei o le tulaga lena ae taua lava Inisinia ia ua faatu mai totonu o le Matagaluega. Ma le faaloalo lava.

**Tofa LEALAILEPULE RIMONI AIAFI:** Ia, o le a faalefinauina lea vaega lau Afioga, na pau lava le mea e fesoasoani atu ai, tatou te malamalama uma lava pei ona saunoa Levao, o inisinia ia e vaai galuega. O le mea lea ou te talanoa atu ai lau Afioga i le Minisita, o le LTA, e le o faia e le latou, e le o faia e latou ni galuega, o la e regulate e latou foi e latou le faiga o auala, e ave i le private sector ae o atu latou e supervise le faiga o galuega. A o lea la e foliga mai ua le talitunuina e tatou tatou, toe sau le inisinia mai le MWTI e sau e vaai le inisinia a le LTA aua e le faamaoni le inisinia a le LTA. Fai atu ai foi.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Susuga Hon Papaliitele Niko Lee Hang:** Lau Afioga i le Fofoga Fetalai, o se mea e fia faasao leaga e le faapea e le talitonuina Inisinia a le LTA, e pei o se isi faaopoopoga lea ina ia mautinoa aua ua tele faitioga mai le mamalu o le atunuu i le leaga o auala. O lea la e taua ai la le vaega lea se i o e vaavaai po o le a tonu le mafuaaga. O le mafuaaga e mafua mai konekarate. O la e foi e fai galuega a le LTA, a o lea ua ou matauina e le o malosi le finau a le Pulega o le LTA e faatonutonu konekarate ma faatino galuega e tusa o tulaga o POQs lea e ave e faatino ai galuega. A o le tulaga lena, e le faapea la ua le talitonuina ia foi Sui Inisinia a le LTA, ae pei o se taumafaiga ina ia mautinoa ia atoatoa ma lelei tatou galuega. E tele tupe ia e alu i tatou auala, ae ua ou matauina le leaga o le faiga o tatou auala. E pei o le tulaga lena lau Afioga.

**Tofa LEALAILEPULE RIMONI AIAFI:** E eseese lau fesoasoani. Na pau lava le mea lau Afioga i le Minisita, tailo i ai, o lea ua e saunoa nei faaletonu, leaga le faiga o auala, afai e leaga le LTA, tutuli loa le LTA, e leai e moni lava lau tala, e le o faia se latou galuega. Ae ui i lea, e faamalulu atu i le Afioga i le Minisita.

Ona oo mai lea i le Minisita o Faatoaga lau Afioga, faafetai ma faamalo, e taua lou tulai mai, aemaise le tele o atinae fou, aemaise le mea lea o le commercial farming ua leva ona tatou taumafai i ai, o le fai, o le moa, o le fuamoa, o ia, ma isi mea uma, malo faafetai, faafetai i mea ia o faamamaavega ua ave i tatou aufai atinae. Talu lava ona ou sau i le Palemene lenei o tatou talanoa i mea o import substitution ona o lea tatou te faamoemoe i mea mai fafo tatou te aai ma faaoga i aso faipea, ae ou te talitonu, a tulai mai le tele o faatoaga nei, e le gata ina faamalieina le fofoga taumafa i totonu lava o Samoa ae o le a tele le oloa e avatu i fafo aua le tamaoiga. Faamalo faafetai i lau Afioga i le Minisita i lou tulai mai.

Lau Afioga i le Minisita mo Tagata Tafafao Maimoa Mai Fafo, se faafetai lava i lau Afioga. O le faamamaavega lea ua fai nei ma ave i nai faletalimalo ia sa aafia, e avatu lau faafetai ma lau faamalo, o fea a tua i ai nai tagata? Ae faafetai ua ave i ai se faamamaavega ma ave i ai ma se fesoasoani, ina ia mafai ona tulai mai. O le mea lea sa fai e le Malo i tausaga e tele, mea tau o le tax credit lea na tau taofi po ua taofi ea, na ala ona tele ma manuia faletalimalo ona o le fesoasoani lea. Afai e tataua ona toe ave le fesoasoani lea i faletalimalo ia ma faletalimalo uma o le a fausia, e tataua ona toe faatino ma tagai i ai le Malo e taua tele le mea lea. O le tele o faletalimalo nei, a tatou le toe ave i ai se capital injection le tupe e fesoasoani i ai ma galulue faatasi, ia, e tatalo atu faafetai talosia ia mafai foi ona tatou galulue ma nei faipisinisi e fesoasoani i nei mataupu. Ia manatua foi o nei i le tausaga nei, e tele fonofono tetele a le lalolagi lea e fai mai. I le 2022 o le fonofono pito sili lea ona tele a le Commonwealth lea ua fai mai i Samoa.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

I lou talitonuga, e le tatau ona lava potu talafeagai mo ia faamoemoe tetele. Ae faamalo, o lau fautuaga e faamalo foi i le tamaitai sa i ai i le Matagaluega, faamalo galue, avatu lau faamanuia i le uso ua tulai mai vaeane le CEO fou ua tulai mai. A o lau fesoasoani ma lau tuualalo i lau Afioga, ua tele le faigata o le tou galuega o le felefele o tou mea e fai, e tasi lava le core functions o outou ma le mea e tatau ona concentrate ma tuu i ai le tou malosi o le market ina o Samoa, na pau lava lea. Maketi Samoa i le mea e tatau ona ave i ai, aua tou te o mamao foi, o Ausetalia ma Niu Sila, e le i taitai, e lava a tatou i maketi ia pe a toe o i ai e taumafai e uunai, tele tagata i ina.

O le tatou vaalele, e avatu le faamalo ma le faafetai. Toe vaai nisi routes fou, aua e sau nei i lalo i Ueligitone po o Christchurch e sau i Samoa, e te lele mai i le Air New Zealand agai i Aukilani. Lona uiga e te lele mai loa i le Air New Zealand, e tele lava le avanoa e te sau ai i Samoa. Ae ou te talitonu a mafai ona fai ni tatou routes fou i ina ae faaopoopo ni tatou vaa e fesoasoani tele i le tatou galuega.

Ona ou oo mai lea i le Ofisa o Aoga, faafetai lava....

**Afioga Faumuina Asi Pauli Wayne Fong:** Lau Afioga i le Fofoga Fetalai, sa ou le fia faalavelave lava i le saunoaga a lou uso a o lea ua ia taua le ma poloketi faitoalua o le uafu lea i Vaiusu. Na o lou fia faafesili atu lava i ai po o le a se taimi e talanoa ai le tatou itumalo ma le aufai uafu, o lo o faatalitali lava le tatou itumalo i se tatou talanoaga e fia malamalama foi le tatou pitonuu ma le itumalo i se tulaga ua oo i ai. Ma le faaaloalo lava faafetai.

**FOFOGA FETALAI:** Malo faafetai faaii mai le saunoaga a le sui usufono.

**Tofa LEALAILEPULE RIMONI AIAFI:** Faafetai lava. O le mea e fia faasao, e sao si ou uso o maua e sootulutulu, a o le itumalo, o le itumalo o Lealailepule. Ma le faaaloalo lava. Ioe. O si ou uso, o le Tu Taulaga, e eese mamao lava le taulaga ma le itumalo, o Lealailepule e ana le itumalo lea.

**Afioga Faumuina Asi Pauli Wayne Fong:** Lau Afioga i le Fofoga Fetalai, se i ai lava si mea sia e fia faasao o ia e gata lava i Faleata i Sisifo, a o le itumalo o au, o Faleata i Sasae ma Sisifo. A tuufaatasi la, e tele atu i lo le itumalo lea e saunoa mai ai, a o le mea lava e tasi, na pau lava le eeseesega e fai si tele o au, ae laitiiti ia mo le faasaoina o le tatou taimi lau Afioga i le Fofoga Fetalai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa LEALAILEPULE RIMONI AIAFI:** Lau Afioga i le Fofoga Fetalai, e pei ona ou talanoa atu i le taimi ua fano, o tatou e talanoa i fuainumera. A talanoa loa i lola, o ai e tele, e tele Lealailepule. Ae le afaina e maimau lou taimi i ia mea. Vaai lau Afioga i le sui usufono, o le toeaina matua lea o Ulugia Aukuso, agai i ai e fesili taeao, fesili i ai taeao, o le toeaina lena na ou aumaia lava i le amataga i le komiti foi lea a tatou ma le Palemia lea e vaaia atinae tetele a le Malo, ona o le a? O mea tonu lava ia o le uafu. A fai la e le o sau i fonu, ia o ia lava i le le fia fonu. A o le toeaina lena ua leva ona ou fai i ai e sau analeila. A o le mea moni...e leai la se mea o le a popole ai i lea tulaga.

**Afioga Faumuina Asi Pauli Wayne Fong:** Lau Afioga i le Fofoga Fetalai, o se mea lava e fia faasao faamolemole lau Afioga, o lea e faatalitali mai le nuu mo se talanoaga, leaga o lea sa ou aumaia le mataupu i se taimi o i luma, o lea ua saunoa le Afioga i le Palemia e onosai le talanoa se i maua se tupe. Ae faafetai o lea o le a sauni e fai. O toeaiaina foi ia, e malamalama lelei lava i ai, sa palota foi mo Leala, o la e la ua le toe iloa e Leala ua le toe lavea i lona itumalo, o la e ua tiai nai toeaiaina. Ma le faaaloalo lava.

**FOFOGA FETALAI:** Ou te fautuaina a oulua Afioga, ia ave i tua le lua mataupu e talanoa ai.

**Tofa LEALAILEPULE RIMONI AIAFI:** Lau Afioga e le afaina. Lau Afioga leaga e fia faasao le saunoaga lea, e le mafai ona galo ia Leala, uma le palota, fai le oo o Leala, fiu e tausasami fia povi, fia afe pusaapa ma pusamoa, na fai se oo o Wayne? Leai se mea. Ia vaai la ua oo i mea tatou te le talanoaina, ave i ai ma le \$20,000. O le mea lena e igoa o le tagata faipule, fai le oo. A leai sou oo, aua le pisa.

**Afioga Faumuina Asi Pauli Wayne Fong:** E le mafai ona ou alu e tau ia Leala le taimi na fai ai lou oo, ioe. Lau Afioga i le Fofoga Fetalai, o la e tautala faamaualuga Leala ia i le mea o la e na te maua, leai o lea ou te tautala lava au i le tulaga e tatau ona i ai, e faigofie lava lau fesili na fai i ai. O le a le taimi e talanoa ai le tatou itumalo e uiga i le uafu, o la e faatalitali mai, e lagolago foi i ai, ae tu mai la i luga feau mai ona oo...

**Tofa LEALAILEPULE RIMONI AIAFI:** Lau Afioga i le Fofoga Fetalai, ou te faamalulu atu i le faafofogaaga a Samoa, ae manatua lau Afioga, o lea fai mai ou te faamaualuga. E leai sau lafoga, o le lafoga na fai mai e ia, ua galo ia Leala nai toeaina ua tiai e Leala nai toeaiaina. Leala e faamaualuga pe faamaualalo tala ia? Ae ui i lea, faamagalalo atu, ae na pau le mea ua silafia e Samoa, na fai le oo o Leala, e le i uma ona ai vaeatu le...

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** E le i uma lava le folasaga?

**Tofa LEALAILEPULE RIMONI AIAFI:** Leaga ua ou see ese ma le LTA lau Afioga, a o i...

**Tofa Olo Fiti Afoa Vaai:** E sao le sui usufono e le i uma ona taumafa lana oo, ae le i uma lava ona totogi le aitalafu o le oo lena.

**Tofa LEALAILEPULE RIMONI AIAFI:** Ua galo ona ou fai i si ou uso o Olo e avatu nisi mea o lou oo e fai ai sona oo. Ae ui i lea, leaga ua ou see ese mai le LTA lau Afioga, malie o lota auala lea i Falelauniu. Lau Afioga i le Minisita, se ou te ofo foi ua ta musu foi e fai atu ua ta ma, o lenei ua fia tausaga ae te fua i le aofai o tagata ia e nonofo i i ua atoa le fia afe o tagata. Lea na saunoa mai nei le Minisita i le tatou Fonotaga talu ai, na ala ona ou le uunaia malosi ona o lea ou te talitonu ma iloa o lea e ave le faamuamua i taaloga a le Pasefika i Saute. Ae ou te talitonu, o le auala lenei o se matua solitulafono, i le Afioga i le Minisita ae le faatinoina i le Paeaiga lenei. E moni lau tala lau afioga. O lea tatou te fonu pea fonu pea, na avatu ua toatele tele, ae ui i lea, lau Afioga i le Minisita o Aoga e avatu le faamalo, faafetai o lea ua ta talanoa i le ta aoga lea na talosaga mai lava mai le amataga. O lea ua e tali mai, ua tatau ma onomea ona faatino e fua i le numera ma tagata o nonofo ai. O lea ua toe avatu o le faasefulu ai lea ona avatu o le talosaga i lau Afioga, ma avatu ma tuu i le lapisi, ae alofa ia sei saina ae le i faia le... a o le mea lea i faiaoga lau Afioga, na tatou aoga uma lava i le Kolisi, oka le mau Faiaoga Initia, Faiaoga pisikoa, Ausetalia ma Niu Sila, lea na tatou popoto ma atamamai ai. Afai ua fiu e fai ae le lava Faiaoga, o le a le mea e le toe aumai ai faiaoga na. Ou te iloa o la e fia fesoasoani mai atunuu nei i le tele o mea. Ae o le ki lea ma le aano o mea uma o aoga ma Faiaoga lea e taumafai i ai.

Avatu le faamanuiaga i lau Afioga i taaloga o le Pasefika, o lea ua ou iloa e le o se mea fou ia te oe. Se na oulua galulue ma Faumuina i le 2007 e leai se mea na faaletonu. Ou te talitonu ua sili atu mea ua e faia, manuia ia taaloga. O lea foi ua alo atu le Afioga i le Palemia i taaloga. Lau Afioga i le Minisita, aua ne i faia se pine, fai se fusi. Ioe fai se fusi, leaga o le Palemia muamua lenei ua taalo i le taaloga a le Pasefika, o le Palemia muamua e fai se fusi. O le fusi o le siamupini o le vasa Pasefika. Ae aua le faia se pine aua e le maua se pine auro.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o lea lava e i ai lou fusipau. E le tau aumaia foi se fusipau e fusi ai lou ie, o lea lava e fusi lava lou ie i lona ia lava fusipau. Ae o mea foi na o pine, o lea lava ua uma ona ou fai atu, o la e tele pine totoe ou te tua i ai i aso o le taaloga. E i ai lava mea o mea faasili, o mea na a le toeaina.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa LEALAILEPULE RIMONI AIAFI:** Malo lau Afioga, e toe tasi lava le Minisita lea o Tupe Maua, ona uma loa lea lau Afioga. Lau Afioga i le Minisita o Tupe Maua, malo le onosai, malo le loto tele. O mea ia tatou te talanoa o tupe ia e ao e le Afioga i le Minisita. Ou te avatu foi le faamalosi ia te oe i le mea lea o lo o tupu nei. Ma lau tatalo ia te oe, tatalo i le Ekalesia EFKS, alolofa ia, o le finagalo o le Malo, e na o sina outou sao lava mo le atinaeina o le atunuu i mea tatou te faia. Ae o le mea lea ou te fia talanoa atu ai i lau Afioga, faafetai foi i pagota ia e lau mai nei e faamama ia le taulaga, o se mea lelei tele. O lea ua outou tagai ua mama faasoloatoa le taulaga, e fai ma sao o nai uso ia mai le toese, faamalo. E pau lava le mea e fesoasoani atu ai, o tatou pagota foi ia sosola. A vaai nei i ata ia e sau i le televise lau Afioga ma faasalalau mai nusipepa, se e pei ni ulu foi na e pei ni bunk, o lona uiga o ata nei e le iloa po o fea e aumai ai. I lou talitonuga mo le tagata pagota pe a ua faasala, o le mea muamua lava lea e fai, faafuga le ao, pue le ata, o le ata la lea the most accurate tulaga o ona foliga lea e i ai. O ata la ia, a tupu mai loa se faafitauli, e muamua lava, aua o vaega ia e tataua ona aumai i luga o nusipepa ma televise. E ala ona ou tautala lau Afioga ona e aafia tele lou itumalo i mea nei, i ata nei. Ona sosola lea o pagota ia na sosola talu ai nei. O atu loa leoleo nonofo i uta i le isi au uo e fai lona maumaga i uta i Fiaga. Fai mai si tama, o atu loa nonofo i lo latou fale, malolo i lo latou fale ma ona vaaia. O le mea la e ofo ai, ia manatua e o atu nai susuga alii malu o le Malo, e sue savali. E le taitai ona mafai ona maua. Sa tataua ona vaai pe i ai ni taifau sei tulou. po o mea fou ia e o mai i le taimi nei o mea o drone e felele i luga. E pau na o mea e ono maua ai. O tagata nei, o lona ua outou silafia, e muli ai taavale a leoleo i tagata nei pe a o. E fesoasoani atu mo le agai i luma. A o le mea taua lau Afioga o mea ia o drugs, e toe oo pea i ai lau faamatalaga lau Afioga. Faafetai ua tagai malosi i mea nei o scan e aumai ma taifau. O Aperila i le masina nei lea na i ai le drug past lea i Tutuila, lea na maua ai US\$1.3milion le aofai o le tupe e maua, i mea nei i fualaau faasaina i le motu lea. Ou te le o tuuaia la e.... Ia puipuia la le ono sao mai o mea nei, e tamaia ai tupulaga fai ae o Samoa.

Lau Afioga ou te talitonu ua lava ia lea, faafetai faaaloalo mai ua uma atu nai mea ia. E lei taitai ae faafetai i lau Afioga mo le avanoa. Avatu le faafetai i lau Afioga i le Fofoga Fetalai i le faafoeina o la tatou Fonotaga, faamalo faamalosi, maumau pe ana i ai ni taaloga e mafai na ta taaalo ai i taaloga o le Pasefika. Sei fai foi ni tauvaga faatu, manu e maua ni ta taaloga. Ae ui i lea ta tapuai ia i le alo atu o le Afioga i le Palemia. Ia manuia lona alofaiva ma Samoa atoa. Sui mamalu o le Palemene na fa'ia mai i le fuifui, tatou onosai e le o toe umi. Ua lata mai foi le isi palota, ia tatou toe o mai uma. Faamanuia le Atua ia Samoa ma lana faafofogaaga, faamanuia i le Auaigaluega uma a le Malo. Soifua.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo faafetai. Ua oo mai le avanoa mo le faagasologa o le tatou galuega i se isi sui usufono e fia saunoa. Tulai mai le sui usufono mo Aleipata Itupa i Lalo.

**Afioga TAFUA MALUELUE TAFUA:** Faafetai atu i lau Afioga i le Fofoga Fetalai, e soo soogata foi le manaia o le saunoaga a le sui usufono ua mavae atu nei, ma se taumafaiga o le a avatu. E muamua ona ou faatulou i le Maota, e momoli atu moomooga alofa i lau Afioga i le Fofoga Fetalai. Ma e vaai atu lava ua e gasegase lau Afioga, ae momoli atu moomooga alofa ma talosaga ia e manuia, ia e toe savali, o lea e alofa atu lava i lau Afioga. Faafetai foi mo le avanoa.

Afioga i le Palemia ma le Kapeneta, Minisita Lagolago faapea foi lenei itu i le mamalu o sui usufono, e le gata i lea faapea foi Ofisa Sili o Pulega o Matagaluega faapea foi ma Faalapotopotoga Tumaoti, ma le au pueata, ae le gata i lea faapea le Failautusi o le Fono Aoa o Faitulafono ma le mamalu o la tatou Matagaluega. E faatalofa atu i lenei itula o le afiafi po o le taeao na liugalua.

E le tele lava ni upu o le lauga, muamua ona ou faatulou i le paia o Samoa ua potopoto ma faafofoga mai, e le gata i lea e faapena foi ma aufaigaluega a le Atua. Faafetai mo talosaga aua faiva o matou nei o sui usufono. O le vaega muamua lea e fia oo i ai lau tautalaga, o au ia e leai se manaoga tele, e na o le agaga o le faafetai i le Malo, ua fai lou malaevaalele, fai lau uafu fai lau slip way, le mea toso vaa. O lea e pisa isi i le leai o ni vaa ma ni pasi e ave ai o latou tagata i Savaii ma tua, ae o lea o le a fai lau malae vaalele e ave ai au palota i le vaalele pe afai le palota lea e lumanai nei. Ae faafetai i le Malo mo atinae o lea ua faataunuu. E avatu foi le faafetai faapitoa i le konekarate o lo o faia le galuega lea i Tiavea. Mo le silafia e le Maota aemaise le faafofogaaga a Samoa, o lea foi e molimauina e le alalafaga lea o Tiavea ua leva ona talosaga i se latou auala mo Tiavea tai. E tasi lea turisi mataina tele, o le aai lea Tiavea Tai. O le tupe sa quote mai i se taimi ua mavae pe lata i le \$2miliona. A o le taimi nei ua uma ona tanu e le Konekarate lea e faia le malae vaalele, tanu lava e tau i lalo i le aai, e leai se totogi. Ua ala ona ou taua lea mea, mo le silafia e lau Afioga i le Palemia ma le Kapeneta, le agalelei o lenei contractor. O le sao lea o Konekarate e faaoga le faautautaga tatau ma le loto alofa, loto nuu, ua mafai ai ona faatino lenei auala taugata. Ia atonu e aoga foi mo ia i le tanuina o le auala, ae o lea ua ou tau atua. Afai ae aumai se variation a si toaina, ia outou alolofa i ai. Ma le faaaloalo.

Ona ou see mai ai lea i le Konekarate i le vai lea e faia la matou vai lea sa eli, ua eli eli le vai ua maua, o la la ua tutu ai lava. Sa ou faapea ai o le a avatu se Konekarate e eli ai paipa ia e faataooto mo le suavai. Ae ui i lea, ua faamalieina lava lou loto i le saunoaga a le tamaitai Ofisa Sili analeila, o lea o le a faatino i le masina fou. Faafetai atu ai i le Ofisa o le Vai mo le tulaga lea. O le isi mea ou te faafetai foi i le tanuina o le auala lea sa fai e alu e tau i le mea la e eli ai le vai.

19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le faalavelave e maumau le taimi e fai ai le auala pe a le faia ni alavai. O lea foi na ou faalogo nei o saunoa ia Lealailepule, e i ai le Inisinia a le LTA e faia le auala ma le Inisinia a le MWTI latou te monitor ina aua o latou te regulate ina le faiga o le galuega lea. Ou te faamaonia la lea vaega aua sa ou fesiligia le MWTI o se tasi lea Faalapotopotoga e o atu i le matou Komiti o atinae tetele, latou faamatalaina mai faafitauli o lo o feagai ma le latou foi Matagaluega o le MWTI. O le faafitauli o le leai o ni Inisinia Sinia faapitoa lelei sinia latou te monitor ina le tulaga lea i o tatou auala. Ae o lea e aumai a matou fautuaga i lipoti mai le Matagaluega, o se faafitauli sili lea ona tuga mo i latou. Ma e talosaga atu ai foi i Minisita o le Kapeneta, se i outou silasila totoa i tatou inisia, e moni ua uma ona fai le faavasegaina o totogi ma vaega uma faapea. Ae manaomia lava ni tatou inisinia faapitoa, specialist engineers mo le monitor ina o tatou auala, o paipa, o traffic o inisinia uma faapena. E taua tele, o le fautuaga lava a maua se avanoa e asiasi ai a outou afioga i Minisita i fafo, pe talosaga pea i atunuu i fafo po o Sapani, Korea po o Niu Sila foi ma Ausetalia, e maua mai ai ni tatou Inisinia e i ai le poto faapitoa, tomai faapitoa e fesoasoani e o mai e aotauina a tatou Inisinia o lo o i ai nei.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea lea e saunoa i ai le sui usufono e taua tele. O au foi sa ou manatu e faaleai ni inisinia, ae ua ou te i lou alu i le valaau mai, o le Fonotaga a le Asosi o Inisinia, e tau le ofi le potu i le matua toatele o le mau Inisinia lea o lo o i ai nei. O le matua toatele o le mau Inisinia, o le mea lea ua ou tau ma e talanoa soo i nei mea, e talosaga atu ia Ausetalia ma Niu Sila i mafauauga, a o lea o le matua toatele lava o tatou inisinia. O le mea lea e tupu, e manaomia le faamaoni, e matua manaomia le faamaoni. O lau upu foi lena sa fai ia i latou, latou ia e i le Asosi o Inisinia, o mea nei o faalapotopotoga faapitoa, e i ai a latou.....e i ai Komiti, Pulega, councils. E i ai lava le mea lea e tupu i le tele o fono faapitoa po o komiti faapitoa. E pei lava e le o malolosi, e le o malolosi foi lele fai iuga e tataua ona fai, ia i latou o sui o faalapotopotoga e le faamaoni. E fai lava si toatele o nai o tatou tagata e lavevea i le mea lena, o le le faamaoni. O la e i ai inisinia, e le faapea e leai ni inisinia.

O au ua ou te i i le tupu o le faalavelave lea i le alo o le sui usufono, a o le isi Inisinia faamoemoeina lena. O la lava e i ai a tatou Inisinia, pau lava le mea e manaomia, o latou ia e pulea, o le vaai lelei le faatonutonuina o le Inisinia ma le mea e tataua ona o e fai. E silafia lelei foi e le afioga ia Faumuina i le taimi foi sa i ai. O isi Inisinia e fiu e faatonu atu e tataua ona o e vaai totoa mata i i i mea ia e fai, i le faatinoga o auala ma lipoti mai. Ou te matua le iloa a latou mea la e fai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Fofoga Fetalai, e oo foi i Fomai, o le anoano o fomai, anoano o mau Loia, ma le anoano o le mau Suetusi. A o le mea la lena o lea e sioki o tagata e devoted, e faatino a latou galuega, e tele foi le investment a le Malo, i le auina i fafo o i latou e aoaoina ai. Lau Afioga e le faapea o inisinia uma, ae i ai lava le vaega e.....ma latou foi i soo se faalapotopotoga, e i ai lava le vaega e faaletonu. Ae a le foia le gasegase lea, e sosolo, e manatua foi e i ai le upu foi lea a tuufaatasi ia mo mea o moli pula ma moli pala e iu lava ina ua pala uma ai lava. E leai lava se taimi e tuufaatasi ai mea na ae vaai atu ua toe lelei moli pala ona o le i ai o moli pula.

O le mea lena e taua ai latou o e ua filifili e faauluulu i ai Matagaluega e vaai totoa i le mea lea e follow up o lona uiga, ave le faatonuga toe alu e toe vaai po o faatino. Aua po o le a lava le lelei o le faatonuga, ae a le alu e vaai ma follow up mea e fai, ia o le mea lena e iu i ai. O le ala foi lena e fai ai ma alu pea asiasiga a le Kapeneta o e vaai, vaai mea ia na fai po o fai moi, aua e le mafai ona faalagolago i ripoti o ripoti e aumai e ono pepelo, ae leai se ripoti e sao na i lo o lota alu lava o ita e vaai.

**FOFOGA FETALAI:** Malo, ia se i malie le sui usufono o Aleipata se i tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai e sao ia le tulaga lea e saunoa i ai le Afioga i le Palemia. O le eseesega o au e le o se inisinia, ae ou te alu faasino i Inisinia le auala e fai ai.

E i ai ia le isi.... na fai le taligalu i luga... ua fai i le auala ia le taligalu, ae tuu mai gatai ia le mea e fafati ai galu. Na ou fai atu lea, o le taligalu e tatau ona tu i le mea e tau ai le galu, ae le tu i le aualatele. Na fai atu foi e faava iti ia alavai ia tafe lelei le vai i le sami, ae o atu faalautetele, e le mafai ona tafe le vai e alu atu toa i uta. A faalaititi le mea, ona masau lea o le vai e alu i tai, o le mea lena ou te iloa e tatau i le Minisita ona alu e faasino i Au Inisinia le mea e tatau ona fai, ma lou faaloalo lava.

**Tofa Olo Fiti Afoa Vaai:** Lau Afioga i le Fofoga Fetalai mo le faasaoina o le taimi, leitioa la a tele taligalu e faaletonu ona o lea sa faasino e le sui usufono mamalu ae tuu ia Inisinia.

**FOFOGA FETALAI:** Ia ua ou manatu ia se i tulai mai...

**Afioga Hon Faumuina Tiatia Faaolatane Liuga:** O le a foi o le sui usufono o Salega o le Afioga ia Olo, e leai ni taligalu i le mea lea e i ai ia le sui usufono o saunoa nei, a o lona itumalo lea na alu i ai i Saleaula, o le taligalu la e toetiiti talanoa i tumutumu o laau, matua lelei lava o taligalu ma lou faaloalo lava.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Ia se i tulai mai ia e le o inisia uma e faasino i ai le saunoaga, e i ai lava latou o lo o faatamala, ae le o latou uma. Leaga e faigata e le mafai foi ona tali mai latou i le tatou Fonotaga. Ae o uiga lava ia e i ai le faatamala, e i ai foi i latou o e mataala e faatino le galuega. Ia se i tulai mai ia le...Ia o uiga lava ia e i ai lava e faatamala ae e le o i latou uma.

**Afioga TAFUA MALUELUE TAFUA:** Faafetai lava mo le fesoasoani mai i le lauga a si nei toeaina. O le isi vaega lea lau Afioga i le Fofoga Fetalai, o le auala lea e motu i gauta o Samusu. E momoli atu le agaga faafetai i le tatou Matagaluega o lo o faatinoina lea atinae. Pau lava si tuualalo faamolemole o gauta atu, o le auala lea, e tutusa lelei lava ma le auala lea i le pioga lea e i lalo mai o le falesa Pope i Tiavea. Ua pala mea o paipa foi nei chrome la sa faaaoga, ia na la e goto malie le auala lena ae a maua se avanoa e le mo le taimi nei ae o lea vaiaso po o lea masina, na ona faataatia atu i luma o tou Afioga, pe a maua se avanoa e asiasi ai, o le tulaga lena e i ai le pioga lena i tala mai o le falesa Pope i Tiavea i le agai mai Apia faamolemole lava ma le faaaloalo.

**Afioga Hon Papaliitele Niko Lee Hang:** Lau Afioga i le Fofoga Fetalai, e le fia faalavelaveina le lauga matagofie a le sui usufono mamalu, e fia tali atu i le mataupu lea e laga i le auala lea ua laga mai e le sui usufono mamalu, o la ua tapena le galuega tele i ina. A faapea o se tulaga foi lea e toe fia faalelei i le taimi nei, ia o le a o atu taeao le LTA e vaai ma faalelei, ae o la e tapena le galuega tele i le mea foi lea sa tafefea ai le van lea na maliliu ai tagata, o la e tapena le auala laupapa lelei e fai i ina, ma lou faaaloalo lava.

**FOFOGA FETALAI:** Malo, ia.

**Afioga TAFUA MALUELUE TAFUA:** Faafetai lava i lau Afioga, e ese la le auala lena, o le auala lena lea e fai ia le diversion i autafa, o lalo laitiiti lau Afioga. Ae leai se... there is no urgency faafetai lava i lau Afioga na ona faailoa atu te i ua toe tupu mai se isi mea i le taimi o i luma.

Sa fai si a matou fonu e aoga foi ia le polokalame a Tina ma Tamaitai lea e faaaauu e le Afioga ia Faauga, lea e fonu ai ia pulenuu mo community plans po o a ea igoa o mea, sa matou fonu uma la ma matou pulenuu uma ma tamaitai, tina ma olomatutua ma fafine ma teine, ia ae malie lau Afioga i le Minisita mo Galuega, o le a toe tau atu pea nai mea laiti ia sa laga e latou, ae ua uma na ta talanoa ai ma lau Afioga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Na ona ou faamanatu atu leaga na ou fai i ai, ia faalogologo mai i le Fono o lea o le a laulau atu lava ia manaoga o le nuu ia, pe fai pe le faia, ae o lau tali lea na ave i ai tou Afioga mo le silafia e le Maota nei, e muliga le tele o le fale lenei i le tele o manaoga o faipule ia e aumai, ia afai la ua laki ia ua laki, ae a leai e fai i le la tausaga, po o tausaga e 5 o lo o lumanai, o le tulaga na e i ai, ae tau lava ina faaoo atu i le paia ma le mamalu o le tatou Malo.

Ia o le nuu lea o Satitoa, ia o le latou talosaga o le latou siosiomaga, ia o le auala sulufai mo tagata matutua, ai o auala foi ia i le taimi e toe oso ai se isi tsunami, ma tulaga faapena, ia i ai se polokalame a maua se avanoa o le tatou DMO, e fia fai se faaitaiga mo latou, atonu e oo atu i ai ua i ai se auala sulufai mo tagata matutua.

O Utufaalaalafa, e na o le 2 lava nai o latou manaoga, o se latou auala fou po o se latou auala galue ia ma le vai. O le vai la lea e moomia e Utufaalaalafa, Samusu ma Amaile, ia o Amaile ia e leai lava ma se vaipaipa. Na o le Vai o le Tama lea tatou te faalogo soo i ai, ia na ona pau lenei o le vai e faamalu ai lea nuu po o lea foi alalafaga o le itumalo. O lea la e talosaga atu ai, ua uma foi ona saunoa mai le Pule o le Suavai, lau Afioga i le Minisita, afai e manuia le vai lea i Saleaamua e lava le malosi o le pressure e alu ai le vai e amata mai i Satitoa e tau i Samusu ma Amaile, ia faafetai o le a maua sina suavai e taumamafa ai nuu ia aemaise lava ia Samusu, Amaile ma Utufaalaalafa, faasolo atu ai lea i Lotopue, Mutiatele ma Satitoa. Ae faafetai atu lava mo le saunoaga a le Tamaitai Pule o le Suavai, ua faamalieina lava lou sui usufono i le tautinoga na aumai. O le tausaga nei e umusa ai ia le tatou vai.

Ona ou oo mai lea i le nuu lea o Malaela, fai mai le tala a le tina, ma o le a logo atu pea le paia o le Maota nei, talu lava ona oso Eveni, e le i toe ola latou moli la e i le auala. Sa ou faamalamalama i ai ia faiga faavae a le Malo, atonu e aoga foi lenei e faafofoga mai nisi o pulenuu ma le mamalu o le atunuu, a pepe ia outou moli auala, o le faiga o le vaega lea, e tusi le numera o le pou, vili sao lea i le EPC, ia ona o atu lea o le afaigaluega e faigofie na o le suiina lava o le matauila le mea e fai, pau lea. Ae e leai se mea o le a faatigaina ai fua le sui usufono tigaina ai ma le Minisita ma le isi vaega ae o lea e i ai auala e fai ai, ma le faaloalo.

O le tama lea o Afamasaga, le Afioga i le Minisita mo Communications ma le tama lea o Leala, o toeaia nei o tagata mai le Anapapa i Amaile, ae paga lea, e tagi lava talatala mai le Pulenuu a Amaile ia te au, Tafua, e le o ola se matou TV. E le gata e leai o se vai, ae pau lava lea o le nuu o Aleipata e leai se auala galue faatasi ai ma Utufaalaalafa.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lea la e faafofoga mai lau Afioga i le Minisita ma le Minisita Lagolago, faamolemole, se i alofagia ia le tatou TV, sina pou lava e faaola ai ia le matou TV, faapena foi i lalo i Saleaamua, ia atoa ai ma Malaela. Ia afai foi o le a sui ia le TV Analog le TV fou la e i ai digital ia ola ai lenei itumalo.

O le mea la ua tupu, o le isi toeaina o le matou nuu sa ou tofia e fai ma sui o le Komiti, ua 2 nei vaiaso talu ai, ae ua alu atu le tusi i le Ofisa, e pei lava o lau uo o Lopaoo, a lea o le a uma ia le tatou term ae o lea e le i fono lava lea sui o Komiti, talu ai fai mai si tama e leiloa lava se mea aua e le ola le TV i a latou. O lea la e talosaga atu ai i lau Afioga i le Minisita, a maua sou avanoa, ia se i asiasi atu i lo tatou nuu se i tatou talanoa ai ma feiloai. O lea ou te maua o lau Afioga ma Leala lea o matai uma mai i le Anapapa i Amaile.

**Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo):** Lau Afioga i le Fofoga Fetalai, faasaoina foi o nisi sui usufono e saunoa i lea tulaga. E sao le Afioga i le sui usufono mamalu, o maua ma Leala o isi matai o Amaile i le mea lea e sau ai Mataafa. Ia ae o lea ua faigata tele ua i ai nei, ona o le ua fai le suiga, o le tulaga lea e i ai le Televisi mai le Analog agai i le Digital. Ia o le faatulagana la o le galuega ua i ai nei, ia o le masina o Oketopa, ia o le a faapena ona ola ai i le faaiuga o Oketopa, e oo atu i le 90% o le tatou atunuu i le Digital TV. Ia o le taimi la lenei, e faamalulu atu i le paia o le atunuu e le o maimoa TV i lenei taimi, ia ona ua faigata lava i ai latou e fai televisu, ona toe faaalu ni tupe i le vaega tuai lea, ia ae o lea ua faatalitali uma, faaalu uma ia latou seleni e tapena ai le Digital, ia e oo atu i le taimi lea, ia ua atoatoa ia le auaunaga ma maimoa mai ia... ae mo le taimi la nei, o le leitiu, o le tatou 2AP o lea tou te silafia o lo o toe faaleleia.

O le pou lea i Mulinu, ia o le taimi lenei o la ua toeitiiti lava maea galuega. O lea e ola i le FM ia le tatou 2AP i le taimi lenei, 91.1 ia ma le 107.4. Ia o alaleo na e 2, ia e mafai ona faalogologo ai i le tatou Fono. Ia ae o le faaiuga o le vaiaso nei i le Aso Sa, ia ua toe ola atoa ai ia le tatou 2AP, faasopolia ai Samoa faapea o tatou nuu tu tuaoi, Amerika Samoa, Tokelau, Tuvalu e oo atu lava i Hawaii lea foi e maua mai i Alaska. Ia ae o le tulaga lena mo le faafofogaaga a le atunuu, ia aemaise foi le lausilafia e nisi foi o sui usufono e le o silafia e sauni mai e lauga i ia tulaga, ia o tapenaga na o lo o i ai nei, faamalulu atu i ia tulaga, faamalulu atu i le tatou nuu i Amaile ia ma le tatou itumalo i Aleipata. Ia toeitiiti lava oo atu le auaunaga, faafetai.

**FOFOGA FETALAI:** Ia malo. Ia se i tulai mai le Minisita mo Faatoaga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Tofa Hon Lopao Natanielu Mua (Minisita mo Faatoaga ma Faigafaiva):** Lau Afioga i le Fofoga Fetalai, leaga o lea sa taua ia le matou Komiti foi lea faufautua, e i ai le mea na tupu i le sui usufono mamalu lea sa aumai foi le suafa sa faapea foi ona aafia i le Komiti o Aoga, ia ae peitai ina ua logo mai au e le afioga i le sui mamalu ma toe siakiina, o lea la na avatu ai le tusi e toe amata o lo o avanoa pea i le Komiti lea ona o la e ua toe foi mai lona suafa i le Komiti, ae o le matou Komiti e fono i masina uma lau Afioga ne i tei ua sasi i le tulaga lea ma le faaaloalo.

**Afioga TAFUA MALUELUE TAFUA:** Faafetai lava, ia tulou lava le Palemene, ia o le mea foi e faigata o le mea o le ma. O le tama lea mo le silafia e a outou afioga, sa sau muamua lava i le Komiti a Alaiasa i o i le Ofisa o Aoga. Ia ua faalua ona alu atu si tama i le Ofisa o Aoga, ia ua fono fono tuli mai i fafo e le i ai le Komiti, ia o le sau lava lona alu atu ma nofo nofo ai i tua si tulafale lea e le i toe sau. Ae faafetai lava atonu o la e faalogologo mai o lea e maua lana Komiti. O le Afioga i le Sui Failautusi o le Fono,

**FOFOGA FETALAI:** Ia se i tulai mai le sui usufono mo Anoamaa Sasae.

**Afioga Alaiasa Muagututia Moefaauouo Malagaitutogia Sepulona Moananu:** Lau Afioga i le Fofoga Fetalai, ua ou le maua le... e le i i ai se mea na tupu i le matou Komiti lau Afioga i le Fofoga Fetalai. Ae ou te faamalulu atu i le sui usufono mamalu, ia pe a faapea sa i ai se mea faapea sa na aafia se tasi o tamalii o le atunuu. Ae o le agaga foi e pei ona saunoa le Minisita mo Faatoaga, ia e fono lava i masina uma ia lenei Komiti, taumafai lava e faaauau ia tulaga o fonotaga, ia ae faamalulu atu i le sui usufono, se i toe siaki lava ia matou faamaumauga pe a faapea e... afai e leai o le a toe totogi uma taimi o le tama lea pe a faaletonu, ia ma le agaga faaaloalo.

**Afioga TAFUA MALUELUE TAFUA:** Faafetai, faafetai lava, e leai se mea e popole ai lau Afioga, o le 2016 na tupu ai le faalavelave lea, atonu te i ua galo i lau Afioga, masalo ua fai si leva, ua m lava si tama, ma ua alu e le toe sau. Ae faafetai lava, o le isi mea lea faamolemole lau Afioga i le Minisita, o le auala lea o matou i Saleaamua, o nai aiga ia e tai maua lava le 18 i uta i Saleaamua Uta, ia e le i oo lava i ai le auala, lea lava e savavali lava i le palapala tulou, ae o lea e tau faamalalamalama atu o le Afioga i le Sui Failautusi lea tou te silasila mai e ogatotonu mai i lalo ifo o le Fofoga Fetalai, ia e faiava atu i le nuu nei.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le auala la lea e alu i uta i le fanua lea e alala ai le Afioga i le Pule Sili Lagolago o le Ofisa o le Fono tou te silasila mai o lea e ogatotonu i lalo mai o le Fofoga Fetalai, e faiava atu i le nuu nei, o le auala la lea e alu i uta i le fanua o lo o alaala ai le afioga nei po o le Ofisa Sili Lagolago a le Ofisa o le Fono. E asa le gasu o le palapala lea pe a timuga. E le gata i lena o le vaoa ia o le auala. Ae faafetai o lea e faafofoga mai lau Afioga i le Minisita, a e vaai mai lava i le Ofisa Sili lagolago o le Maota Fono, ona e manatua lea o le talosaga lea i le auala. E i ai nai matai ua uma ona talosaga mai, masalo o taatia i se mea le latou tusi. O lea e talosaga atu ai pe a maua sina tupe e totoe o le tatou paketi ma le faaaloalo. E i ai lau fesili e tasi e fia fai i le tatou Komiti o Tupe. O le vaega lea i le itulau e 39, fautuaga 3 e uiga i CSO. Malie lau Afioga e faale lelei lau....e 20minute pe 30? Ua lelei o lea foi ua uma. O le itulau 39 lau Afioga i le Taitaifono pe a maua sou avanoa, o CSO e \$2miliona mo le EPC ma le \$2miliona mo le Suavai. O lea la sa i ai la outou fautuaga 3 lena e iai e faapea, E manaomia se isi seleni e faaopoopo i le vaega lea o le CSO. O lau fesili la po o le a le fuafuaga a la outou Komiti, po o le a foi se fautuaga. Po o le a tonu le tinoitupe o lo o manaomia e Matagaluega uma ia e lua? O si tamai fesili lena lau Afioga i le Taitaifono.

O le a ou faasolo atu loa i le Minisita o Faamasinoga.....

**FOFOGA FETALAI:** Se i tulai mai le Taitaifono o le Komiti.

**Afioga Aliimalemanu Alofa Tuuau (Taitaifono, Komiti o Tupe Maua ma Tupe Totogi):** Lau Afioga i le Fofoga Fetalai, e pei o lea faatoa i ai lea o se fesili agai i le lipoti a le Komiti o Tupe. Ae o lo o manino lava le fautuaga agai i le Matagaluega o Tupe mo le lumanai, ina ia toe faia se fuafuaga ina ia toe tau sii atu laititi i luga ia vaegatupe ia, ia e fesoasoani ai i le Pulega o le Suavai ma le Malosiaga tau eletise, aua le faaooina atu o auunaga nei e talafeagai ma nai tagata ia, e i nuu i tua. O le tali atu lena, e le o i ai se fuainumera ae o le talosaga ma le fautuaga i le Matagaluega o Tupe. Faafetai mo le avanoa.

**FOFOGA FETALAI:** Tulai mai le sui usufono e faaii mai le saunoaga.

**Afioga TAFUA MALUELUE TAFUA:** Faafetai mo le... Sa matou talanoa foi ma le vaega lea i le CSO lava, ae e le i manino foi se numera, o lea la sa ou fia malamalama ai. Ae faafetai mo le tali.

Ona ou oo mai lea i le Minisita o Vaalele faamolemole lau Afioga i le Minisita, e puupuu lava lau tuualalo. E i ai le taimi e alu ai le tatou vaalele e half full, pe toetiiti lava empty, pe le maua se avanoa o nai aso na pe tolu pe fa, e faasalalau ai i le leitio ma le televise pe a faapau nai pasese pe \$200 pe \$300 le one way. Ae ia tumu la tatou vaalele, ou te le iloa po o gaogao aemaise a taimi foi na e off season. O le uiga lena o le tuualalo lau Afioga ma le faaaloalo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

O le faafetai i lau Afioga i le Minisita o Turisi, o lea ua faatino le galuega sa talosaga atu ai i le Fonotaga talu ai. Malie lau Afioga e le i uma le galuega, ae se i maea ona fai lea o tulaga masani, e pei ona e talanoa mai ai lau Afioga. Faafetai i le Minisita o Galuega, faamalie atu i lau Afioga o galuega uma ia sa faaoo atu i lau Afioga, o lea ua uma ona tuualalo atu, ia ae.....sa tatau lava ona ou faalagi atu ona o la e faalogo mai tagata sa matou talanoa. O lau upu i ai, o la e faafogafoga mai, o le a ou aveva pea i luma i le Afioga i le Minisita. Le Afioga i le Minisita Faatoaga lau uo, faafetai lava Lopao, faafetai mo le matou seleni e \$3,000 o le malo o lo matou nuu i le tele o le manu ainiu. O la e faatali mai si o matou nuu pe toe maua se isi \$3,000 e tusa o le ponesi lena o lenei tausaga, ao lea o le a toe amata ona toe aumai manu ainiu. Faafetai foi i lau Afioga mo le fesoasoani na avatu i le puega o le manu ainiu lea e taumafai i ai i le taimi nei. Faafetai lava i lau Afioga.

O le Minisita o....

**Tofa Hon Lopao Natanielu Mua:** Lau Afioga i le Fofoga Fetalai, ona o lea e i ai le faamoemoe taeao e toesea atu ai. Ae o le polokalame lea o le manu ainiu, e le avatua muamau le tupe e aumai muamua le manu ainiu, ona faatoa mafai lea ona maua le seleni. O le polokalame lea ua uma foi ona faasalalau i le Ofisa o Pulenuu i sui o le nuu ma le pulenuu. Ua laugatasia uma ai le atunuu atoa e aumai manu ainiu i le Matagaluega, ona faitau lea. E i ai se taimi o i luma e lautogia e le Matagaluega e faasoa ai le seleni ona faapena lea ona fai. Ona o le taumafaiga o le tatou manu ainiu ua fai sina tetele tele, ua afaina ai o tatou niu. O le tulaga la lena o lea ua fai ai nei le tulaga lea. Ae o lo o faaauau pea le polokalame lea a le Matagaluega lau Afioga. O lea foi ua uma ona o atu Matagaluega i lou afioaga aemaise foi afioaga o le tatou motu nei o Upolu faapena foi Savaii, e fesoasoani i le tuua i lalo o niu ua aafia i le manu ainiu. Ae o lo o faasolo pea le polokalame lea a le Matagaluega. O lea foi o lo o i totonu o le paketi leni nisi o seleni o lo o fuafua i ai. Talosia i le alofa ma le agalelei o le Atua, e faaauau pea le polokalame lea. A i ai foi se isi taimi e toe talosagaina ai le Minisita o Tupe ma le Matagaluega o Tupe, ia e faapena lava ona fai ma le faaaloalo.

**FOFOGA FETALAI:** Faaiu mai le saunoaga a le sui usufono. Ua maea lou taimi.

**Afioga TAFUA MALUELUE TAFUA:** Faafetai i le Afioga i le Minisita o le Soifua Maloloina. E i ai le vaegatupe sa fai ai le bingo a le faifeau Lalomanu ma tina o le itumalo o Aleipata i luga ma Aleipata i lalo. O tupe la e faaagaga faapea ai ua gau foi le loto o le Faifeau, e silasila atu le Susuga i le Faafeagaiga po o le Ao o faalupega. E o atu nai tagata e leai se mea e malolo ai le au tausii mai ma le au sii mai ma mai foi latou.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lea la ua i ai se seleni o a latou bingo e faatatau i se fale e malolo i ai le au tausimai, a o atu le au mamai e o i ai. E talosaga atu i lau Afioga pe i ai se fesoasoani i le vaega lea. Pe atonu e i ai foi se fesoasoani mai poloketi a le vaega a le MNRE aua le latou faamoemoe. Pe i ai sina seleni e fesoasoani i nai tina ia o le itumalo. Leiloa pe i ai se isi mea i te i ua galo, ae sei faamanatu atu i se tusi.

Ae avea lenei avanoa e momoli atu ai le agag faafetai i le Kapeneta i le Matagaluega o Aoga ma le Minisita o Tupe, manaia la tatou taumafaiga, e \$700+miliona lea o le a faaagaga mo le tatou atinae e ave i ai le faamuamua, priority developments o lea e aofia ai ma tatou taaloga atoa ma tatou taligamalo, faapea ma le faiga o le fale i Aukilani ma isi lava atinae taua o le Malo. E momoli atu ai le agaga faafetai tele mo nei vaega lelei ma mea taua o lo o outou atinaeina. E le gata i lea ae o le Ofisa o Aoga, faamalo mo le taumafaiga a nai tamaiti aoga. E le o le seleni e manaomia, ae manaomia le sau pea o ata o tamaiti i le televise o la e fia matamata ai. E ui lava ina le maua se televise i tua, ae fiafia lava e matamata i o latou ata pe a alu atu le faasalalauga i le televise. O le tala lea ae faafetai i lau Afioga i le Fofoga Fetalai mo lou taimi, faafetai foi mo le faafofogaaga a Samoa, ae momoli atu le faafetai i le tapuaiga a le itumalo, aemaise faafeagaiga o lo o tapuai mai. Manuia le Fonotaga.

**FOFOGA FETALAI:** Tulai mai le sui usufono mo Anoamaa i Sisifo e saunao.

**Tofa Hon Laufo Fonotoe Nuafesili Pierre Laufo (Anoamaa Sisifo):** O lea e tau amata atu le lauga a lenei itumalo, ae o lea ou te vaai atu o la e tulai mai le sui usufono.

**FOFOGA FETALAI:** E leai, e pei o sana faauilavea la e tulai mai ai. Ia faapuupuu maia pe afai e le o se faauilavea.

**Afioga AMITUANAI FAGAIVALU KENRICK SAMU (Aleipata Itupa i Luga):** Faafetai atu i lau Afioga i le Fofoga Fetalai, e tusa ai foi mo le avanoa se i taumafai atu ai foi se sao puupuu o lenei itumalo o Aleipata Itupa i Luga. O lea ua malele le Afioga i le Tuiatua na faanofonofo, ona i ai foi lea o le talitonuga, ua tataua ona soo fau lo ma sa. Lau Afioga i le Fofoga Fetalai, ou te manatu o lea ua atoa tupe o le fala. Ua atoa foi atu i liu o le vaa, ina ua tau fai puea le matila ma le ofeloa. Ua taoto foi ataata o Taulelei ina ua totogo lelei malama, e pei o le upu ia Paiatea ma Paialala. Ao le faafetai i le Atua i lona alofa ma lona agalelei, ua taitaina mai ai lo outou soifua ma se ola faatauvaa i lenei foi vaega o le po, aua le Fonotaga a si o tatou atunuu. Ae muamua lava ona ou faatulou i Tiafau nei o le Malae o le faautugatagi a le atunuu. E faatulou atu foi, i lau Afioga i le Fofoga Fetalai, aua o lau Afioga e te faatonotonuina le Fonousu a Samoa.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ou te faatulou atu foi lau Afioga i le Palemia, ma le mamalu o le aiga Minisita. Ae tainane Minisita Lagolago. Ou te faatulou atu foi i lena itu o le Malu. Le afifio o Taitaifono o Komiti faa-palemene. Ae tainane le mamalu o sui usufono alii ma tamaitai faipule. E le faagaloina foi, faatulou atu i Ofisa Sili o Pulega o Matagaluega ma Faalapotopotoga a le Malo, i tupu ma tamalii, aua e le faagaloina foi lo latou sao taua, aua le atinaeina o si o tatou atunuu.

Lau Afioga i le Fofoga Fetalai, e puupuu lava se sao o lenei itumalo i lenei Tala o le Tupe. E muamua ona momoli le agaga faafetai tele i lau Afioga i le Minisita o Tupe, le Ofisa Sili o Pulega e le gata i lea o lo tatou Malo. O e uma sa fitaituga aua lenei tala o le tupe, aua se faamoemoe taua, aua lava le atinae o si o tatou atunuu. O lea e momoli atu ai le agaga faafetai tele i lau Afioga i le Minisita o Tupe faapea le Minisita o Tupe Maua, aua foi le sailiga o seleni aua manaoga o si o tatou atunuu.

Ae itiiti lava nai vaega foi e tau avatu i ai ia....o se faamanatu foi, aua e matauina lava. O lea foi ua alu le lua o Paeaiga i le tatou Nofoaiga lenei. O tulaga masani lava o lo o tatalo atu ai, ia o lena lava e i le aiga Minisita le uta a le faimea i lana faasoa paia, aua lava le manuia o si o tatou atunuu mo a taeao. Ae o le a ou fia oo mai lava i le Minisita o Galuega, o lea ua malele foi le sui usufono mo Aleipata Itupa i Lalo, le Afioga i le Tui Atua na faanofonofu e ala i le malae vaalele, e na ona ou piiama ma ou momoli atu le agaga faafetai tele i le Malo, e tusa ai ma lea atinae taua, amuia o matou aso. O le a le finagalo o le Atua, ao lea ua tau ai, faafetai o lea ua taatia le malae vaalele. O le tausaga fou ou te iloa o le a faapena ona faauma ai le galuega. Ae momoli atu le agaga faafetai tele i le Malo, ona o lea atinae taua. O pine ola ia o le soifua ma le ola, aua le manuia e le gata i lea tafa o le atunuu, a o si o tatou atunuu foi. Ae o nai auala galue lau Afioga i le Minisita, ia na ona taatia atu, o lena ua taatia atu a matou talosaga aemaise si o matou nuu o Ulutaotogia o Vailoa ma Lalomanu. E le gata i lea o le matou vai, o le vai mai lava i le tausaga e 2009 i le mala faalenatura sa faapena ai loa ona taumafai e siitia uma tagata o le afioaga, ia ma lea foi tafa o Atua i nofoaga maupuepue. Ia ae pei e tasi lea o faafitauli e oo mai i le aso, ia o le suavai. Ia o le tatalo, a faigata ona vili se vai, ia ae taumafai pea e alu atu ia le tatou loli vai, ia aua foi le tautuaina o nai o matou tagata. Ia ae momoli tele atu le faafetai tele i lau Afioga i lau faasoa i manaoga ia aua lava le atinae o si o tatou atunuu.

Ia ona ou oo mai lea i le Afioga i le Minisita mo Aoga, ia faafetai tele i lau Afioga, ua ou maua foi le tala ua tufatufa ia au laisene, o laisene faiaoga, e pau lava le tatalo a lenei itumalo, aemaise lava i le tatou Iunivesite i Papaigalagala, ia e manaia pe a tufatufa ia ni nai laisene, ae tusi ai le faamaoni, laisene o le faamaoni e aoao ai alo ma fanau, aua e i ai lava le talitonuga, o i lea e tau i ai nai faaletonu aemaise lava i suega a nai alo ma fanau o le atunuu. O e o lo o fia autovaa atu i atunuu mamao, mo le faalauaitelina o le poto salalau, ae pei o lea e i ai nai lape i i le tatou Iunivesite.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ae i ai lava le talitonuga o lenei itumalo, e le tatau ona tupu, e le tatau ona tupu ua faaletonu. Ia o le tatalo i lau Afioga toe timata le upega i ia vaega taua.

Lau Afioga i le Minisita mo Faamasinoga, ia faafetai tele lava i le Tulafono ua taoto mai ai Faiga Palota. O le a le tele se leo i nisi lavelave o le Tulafono. Pau lava le mea o lea e tulituli e lou sui usufono, le vaega lea o le Tulafono, ia faamalosia lau palota i le mea e te nofo ai. O le ala foi lea e pei e taufetuli mai ai sui usufono, pe faapei i le autovaa atu i tua ma Salafai i le feaveaiga o tagata. A lea ua fai mai le Tulafono, palota i le mea e te nofo ai. Faafetai i lau Afioga mo le silasila totoa, i le vaega tonu lea o le a leai se faigata, aua o le a o lava tagata palota i mea o lo o i ai ia o latou faasinomaga. Ia ae pei o le agaga tonu lea, e tatau ona vave ona fai se faalauiloa a lo tatou Ofisa o Faiga Palota, ina ia faapena ona faamanatu ia te i latou, ina ia o loa e resitala i mea o la e nonofo ai, seia vagana ai matai, e fai lana ia filifiliga saoloto.

Ia ona ou oo mai lea i le Minisita mo Faatoaga faafetai i lau Afioga, faafetai foi i le tulaga o maketi, ia o lo o auina atu ai le talo i atunuu mamao. I lau tau vaai ua tau faaletonu foi ia le Aufaifaatoaga, ia ua tele le manao mai, a ua le lava le talo e toto, ia ae o le tatalo foi i ai tatou o le Aufaifaatoaga, ia se i faamalolosi aua o i tatou lava ia le galueaina o le tatou laufanua.

Na ou oo mai lea i le Minisita mo Falemai, lau Afioga i le Minisita, ia o nai vaega foi ia sa talosaga ai ao seei ia le Afioga i le Minisita talu ai i le falemai. O lea ua saunua atu le sui usufono na mavae atu o matou i tua, ae o le agaga maua, o se matou foma e nofo mau. O le tasi lea faafitauli tele aua sa fai mai lava le Pule Sili o le Falemai, se i tuufaatasi ia Matagaluga ia e 2, ia ona fuafua loa lea o se Foma, e alu atu e nofo i tua, mai le Aso Gafua seia paia le Aso Faraile. Ia o le tatalo i lau Afioga i le Minisita, ia se i silasila pe le ua tatau loa ona faataunuu lea fuafuaga. Ia ma lona 2, ia o sina masini faamama toto, pe tasi lava sina masini, leaga ua i ai ia tupu foi ma tamalii o lenei itumalo aemaise foi o lea tafa o Atua, ia ua maua i le gasegase lenei. Ia ae matauina, e taitolu i le taifa aso o le vaiaso e o mai ai e autovaa mai i Apia, mo latou masini. Ae i ai lava le talitonuga, a i ai se masini pe tasi i tua, ia e gafatia lava ia e foi ua maua i lenei gasegase.

Ia lau Afioga foi i le Minisita mo Tina ma Tamaitai, Nuu ma Agafesootai, ia o si fautuaga laititi lava, mea ia o Sui o Nuu, Sui Tamaitai. E i ai lava ia le tatalo a lenei itumalo, a faapea e toe tofia latou mai le pule mamalu a alii ma faipule, e tatau lava ona i ai ma sina ripoti o tagata nei, mai le Ofisa o Leoleo, ona e i ai nisi foi, e i ai lava le talitonuga, e i ai ia latou solitulafono, ae leiloa e pule mamalu a alii ma faipule. E pei o le aoga, ina ia faapena, ona silasila totoa i ai afioaga, i e aumai i totonu, aua o le sao ia o le Sui o le Malo, i totonu o afioaga taitasi. Ia e pei o le agaga lea ma le faaaloalo i lau Afioga i le Minisita o Tina ma Tamaitai Nuu ma Agafesootai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ia ona ou oo mai le i le Minisita mo Leoleo, po o lau Afioga foi i le Palemia, faafetai tele lava i le auaunaga a le Matagaluega o Leoleo. O lea foi ua matauina, o le a faamatuu atu ia le... lea ua faamatuu ese mai ia Leoleo auala a le LTA i le Ofisa o Leoleo. Ia e pei o le tulaga tonu lea sa tau matau, i le tulaga pei e foliga mai, ia o le a see mai ai ma le pasiga o taavale, ia ma laisene o avetaavale. Ia ae i ai lava le agaga maualuga, o le a faatumau pea i le tatou Faalapotopotoga lea o le LTA.

Ia ae momoli atu le faafetai tele i le auaunaga a leoleo, aemaise lava i i le Ofisa Suesue. Sa i ai foi nisi o mataupu tuga sa matauina i le masina talu ai, ia ae faafetai tele i le sogasoga foi ma le atamai, ua faapena ai ona taunuu manuia nisi o suesuega a Malu o le Malo, ona o nisi foi o faafitauli sa tutupu mai i taimi ua sola.

Ia ona ou oo mai lea i si au Minisita mo Turisi aua o le 2 ai nei o paeaiga, ia o lo o faapena ona ma soosoo tauau ia ma ou lagolago i lana Afioga. Ia e momoli atu ai foi le faafetai tele, faafetai foi i a matou... o i i le Tausi Mavaega, faafetai i le Malo i le le mafai ona faamatuu ese atu, o nei itutino o le Malo, aua o lau matau, ana faapea e tuu atu i tua ia le tatou auaunaga lea, o lona uiga, o le tele o le esetete o tagata Samoa, o lona uiga, e maua uma lava e loia. Ae pei o i i le Tausi Mavaega, o i e fai... na ala la ona tupu le faafitauli i le tatou Tausi Mavaega, o le fiu e tauamo atu tagata i mea e aumai aua le vaevaeina o le esetete, ae le omai. Ae aoga foi lenei taimi aua o au le isi o lea e i ai lau esetete, ioe, e i ai ia fanua ia o lou aiga o la e faafofoga mai lou aiga, ioe, i i Faleata, i Vaigaga, ioe, ia outou alolofa o lea ua aumai le faaiuga a le Tausi Mavaega, o mai e totogi mai ia tatou tupe, ae se i fua le fanua. Aua o au, e le lava sau tupe, e totogi ai le tatou tupe atoa lea, e fai si tele o le pili, ae malilie suli ma feoi o le au Pilitati o le au Pritchard, ioe, e o mai,

**Afioga Fuimaono Teo Samuelu Teo:** Faamolemole lau Afioga...

**Afioga AMITUANAI FAGAIVALU KENRICK SAMU:** E omai e aumai le tatou tupe ae se i fua le tatou fanua, ona

**Afioga Fuimaono Teo Samuelu Teo:** Lau Afioga i le Fofoga Fetalai...

**FOFOGA FETALAI:** O lo o i ai faauilavea i lea itu o le Maota, tulai mai sui usufono mo Falealili Sisifo.

**Afioga Fuimaono Teo Samuelu Teo:** Leai o le tualalo i le sui usufono mamalu o lo o saunoa, o le mea muamua a i ai se taimi avanoa e la te talanoa ai ma lana Minisita, momoli aloaia lea i ai o lana faafetai, aua o le la Matagaluega lava e tasi. Ae o lo o i ai foi ia le avanoa i le tatou TV ma alaleo faasalalau, e fai ana faasalalauga, ae e le o i e fai ai sana faasalalauga faapisinisi, ma lou faaaloalo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** E i ai le isi faauilavea la e, malie le sui usufono.

**Afioga AMITUANAI FAGAIVALU KENRICK SAMU:** Ia o le a faaalu lava i le TV pe afai e leai se tupe. O lea e fai atu le mea...

**FOFOGA FETALAI:** Malie le sui usufono mo Aleipata se i uma mai faauilavea.

**Afioga Sulamanaia Fetaiai Tauiliili Tuivasa:** O le sui usufono lenei e masani ona ou talanoa i Minisita Lagolago, sa le tataua ona i ai ia ni a latou lauga, leaga o le latou vaega uma la e i Minisita. Ia ae pei o lea e maua atu i lenei afiafi, ia o lea foi ua toe lauga lava laua ia laua. E pei la o le tatalo a lenei sui usufono, ua alu ai ia le tatou taimi. O le laua lava Matagaluega, e pei e faailoa mai, e le o galue faatasi ia le Minisita Lagolago ma lana Minisita, o lea faatoa feiloai i totonu o le Palemene, ae o le laua lava matafaioi o le laua lava Matagaluega o la e iloa laua mea o la e tutupu ai ma le faaaloalo lava.

**FOFOGA FETALAI:** Ia e faamalulu atu i le faauilavea...

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioga ma Agafesootai):** Lau Afioga i le Fofoga Fetalai, ia sa musu lava e faalavelave a o saunoa le sui usufono mamalu, ia ona o lea ua maua le avanoa o faauilavea, atonu o le taimi lelei foi lenei e tali atu ai le fesili sa tuuina mai e le Afioga i le Minisita Lagolago i le tulaga lea i sui o nuu, ia ma sui o le Malo i tua i nuu. O lo o i ai i lalo o le Tulafono, o Tulafono a Fono a Nuu, o i latou ia e nominate mai e le nuu ia le latou Pulenuu, ia ona aumai lea i le tatou Ofisa Sili, ia ona faailoa mai e le Pule Sili i le Minisita, ia ma tuuina atu ai i le Kapeneta ia le suafa o le ua latou filifilia, e approve mai ai pe pasia mai ai e le Kapeneta, ia ona faatoa tofia lea i le nuu. Ia e tataua la ona silafia lelei e afioaga taitasi ia sui e talafeagai e le o ni tagata o i ai ni soligatulafono, ia po o ni tagata o taulamua i ni faafitauli i totonu o latou afioaga, ia mai latou foi e agavaa i le tauaveina o tiute o le Pulenuu aua e fai lava si tele o tiute o le Pulenuu, o lea e pei ona taua e se tasi foi saunoaga, ia e anoanoai tiute o le Pulenuu, e le o mafai ona faatinoina uma e pulenuu o lea e filifili mai lava i afioaga ma alalafaga. Ia e pei o le tali atu lea ma le agaga faaaloalo i le sui usufono o saunoa.

**FOFOGA FETALAI:** Malo, faafetai, ia se i tulai mai ia le sui usufono o Aleipata.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga AMITUANAI FAGAIVALU KENRICK SAMU:** Ia ua uma foi le lauga, pau lava le mea ua ou faanoanoa lava vaeatu i le saunoaga a sui usufono mai le pito le la, tulou lava, e leai lava ma se la feau ia au ia, o lea lava e faaali ou lagona ma ou manatu. Ia ae le faapea e... ia se i uma ona tatou o lea i fafo po o le a le tulaga e oo i ai lenei po, ioe, ae i lau Afioga i le Fofoga Fetalai, e pei o le agaga atoa lea o lenei sui usufono o lenei itumalo, i i lava i le tulaga i le Ofisa lea o le Tausi Mavaega, ia leaga o le tasi lea Ofisa o lea e pei e faitio i ai le atunuu, ae e ala la ona faitio, ona o le le o atu e avatu ia latou mea o la e manaomia mai e le Ofisa, se i faamaape ia latou esetete. E pei foi la o au, aua o lea ua le faasalalaua i le TV ma le leitio ae o lea ua aoga lenei po, o la e faafofoga mai lou aiga, aua e leai se tupe a au, aua e sau le pili, toetiiti \$20,000 ioe, ia o fea a maua mai ai se tupe a le faipule? Ia ae alolofa ia,

**Afioga Fuimaono Teo Samuelu Teo:** Lau Afioga i le Fofoga Fetalai,

**FOFOGA FETALAI:** Ia se i tulai mai le sui usufono, o lo o i ai le faauilavea a Falealili.

**Afioga Fuimaono Teo Samuelu Teo:** Leai e faamalulu atu i le Sui usufono mamalu o lo o saunoa, ia mo tatou faamaumauga, e matuia le lafoga a le sui Minisita, ae o le upu na faaaogaina e le tatau ona alu i a tatou faamaumauga. A o le tulaga foi lele, leai o le Tulafono Tumau lea tatou te mulimulitaia pe a i ai se vaega... a o le tulaga foi lele lea e saunoa i ai mulimuli i fafo e talia ma le faafetai, e le talia foi i ni vai.

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e i ai le itu taua lea e molimoli mai i le saunoaga a le sui usufono o saunoa nei, masalo e aafia uma ai lava le Maota lenei. E faaataata a lafoga ae taua tele lana mataupu. O i i le Ofisa lea, lea e tagofia uma ai tou te meatotino pe a tou feoti, ae i ai ni seleni o i ai, NPF po o fea lava. Ia outou silafia tou te feoti uma loa taofi uma a outou teugatupe ma mea uma lava, NPF ma le penisione, ae ave uma a e pule ai le sui usufono lea na saunoa nei ma le latou Matagaluega. E faatalitali ai, muamua, pe i ai ni au faulaiga aitalafu o i ai e muamua totogi. O le mea la e totoe, a fai sau uili, e le afaina lena ona faasoaso mai lea, ae a leai sau uili, pule ai loa le alii faipule ma le latou ofisa e faasoaso. O le faasoasoaga la, e tatau ona i ai uma i latou o fanau ma tausoga, o isi e i Niu Sila, o isi e i Ausetalia, sue atu isi o la e i o i Amerika, ona faasalalau lea e omai. A le omai a la, e nofonofo ai a i i seleni i totonu i i e le mafai ona tagofia e se isi.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E ala ona ou tau atua le mea lena, ona e le uma ai i o le la mataupu e oo mai ia te au le mataupu, fai mai la pe mafai ona faaaoga lou power faa-Palemia e talepe ai le Tulafono ae faasoa tupe mo i latou o lea e i i inei. E le mafai ona faia se na mea, seiloga lava e maua uma mai latou lea ua salalau solo i le lalolagi ona faatoa mafai lea ona faasoa. E faaataata a lafoga la le mataupu a le faipule, a o le tele ia o le feau lea mo outou ma i tatou uma. Manatua foi e i ai a tatou penisione ia e tatipi, a leai la sau uili e faia, e te fiu e te alu atu e aumai se mea a ua lea mafai ua taofia. O le mea lena e tele ai tagata e o atu i lou ofisa pe mafai ona faaaoga le power. E le mafai ona talepe e au le Tulafono, o le Tulafono lava o le Tulafono. O le tulaga lena e faaataata a lafoga le mataupu a le alii faipule po o le Minisita Lagolago a o le taua ia o le feau lea e aumai mo tatou uma, ma latou uma o lea e faalogologo mai faapea ai ma le au CEOs uma ia e faalogologo mai, a le faia sau uili, ua tu ia te oe le pituli. Ia, o le taua lena o le faatupu manatu a le alii faipule e ui o lea ua ia faaaoga sia mea e faasalalau atu ai si ona ia foi faafitauli lea ua faafeagai nei ua fiu e valaau latou ua fia oo i ai lona lima i mea ia a ua le mafai.

Lau Afioga i le Fofoga Fetalai, o le fesoasoani atu lena ona e tele tele le feau lea e aumai i si ana ia foi commercial lea ua aumai e aunoa ma se totogi.

**FOFOGA FETALAI:** Tulai mai le sui usufono mo Aleipata Itupa i Luga.

**Afioga AMITUANAI FAGAIVALU KENRICK SAMU:** Ia, ua uma foi le lauga a Aleipata Itupa i Luga. Ae avea ia lenei avanoa e momoli atu ai ou alofaaga i le Ofisa Sili fou lea a matou i le Turisi, leaga o Atua o le nuu o Atua o le aiga. Lau Afioga i le Ofisa Sili, ia sagai ane ai o le tai, o ou mama na. Ia sosoo le fau ma le fau, a pau atu se isi toa, ae tulai mai, e le o le itiiti o lou soifua, a o le faamanuiaga a le Alii ia te oe, ioe, o le meaalofa a le Alii i lau Afioga, ina ia i ai se suiga tele o le tatou Ofisa Turisi.

Ona faapea lea o se faamatalaga a lenei itumalo, ia alofagia lau Afioga i le Fofoga Fetalai, ia maua pea le malosi i le tino, a ia silisili le tofa mai le Atua aua le faatonufoalauina o le fonotaga a si o tatou atunuu. Ia manuia foi le Afioga i le Palemia ma le mamalu o le Kapeneta aemaise foi le la Itu o le malu, maua foi se ola o le toeaina, manuia lenei po.

**FOFOGA FETALAI:** Malo faafetai. O lea foi ua tatou oo i le tatou malologa masani. Ae le i tuueseina le tatou galuega, ou te fautua atu i le sui usufono mo Aleipata, aua ne i i ai se mea e tupu mai pe a tatou o atu i tua, tautuana ma lau Afioga, aveese le mea lena o le lotoita.

O le a faataatiaese Galuega a le Fono Aoaofa Faitulafono mo lana malologa masani.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

*Na faataatiaese Taulumaga a le Fono Aoaofaitulafono mo lana malologa i le itula e 8:43 i le po ma toe amatalia i le itula e 9:29 i le po.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono. Malo le onosai, e ui lava ina ua faapena ona faaaaogagase le tatou galuega, a o lo o maua pea le malosi ua aumaia e le Atua e faapena ona faatino ai le tatou feau ma le tatou galuega.

E faia le malologa ua maea ona saunoa le sui usufono mamalu mo Aleipata Itupa i Luga. A o lenei taimi ma lou faaaloalo ou te tapa lau Afioga i le sui usufono mo Anoomaa Sisifo e tulai mai mo lau saunoaga.

**Tofa Hon LAUOFO FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai o lea ua maea ona tali le sua i Afioga i sui usufono mamalu o le Maota, ua maua foi se faasiliga malosi e faaauai ai le tatou Fonotaga i lenei afiafi. E faamauina lenei itula o le aso le agaga fiafia e tulai atu ai e faaali foi se manatu puupuu e tusa ai ma le Tala Faatatau Autu o Tupe. O le mea lea e faatalofa atu ai i lau Afioga i le Fofoga Fetalai faapea foi le Afioga i le Palemia ma Afioga i Minisita o le Kapeneta faapea foi Minisita Lagolago i le la Itu o le Maota.

Ia liua foi le vai o le tamaitai i lenei Itu o le malu, e faatalofa atu i Afioga i Taitaifono o Komiti Filifilia o le Maota faapea sui usufono ma le Afioga i le Sui Fofoga Fetalai.

Ia e le faagaloina le tapuaiga a le atunuu, e faatalofa atu ai i le tapuaiga a Samoa i le papa le gae o tupu ma o latou aiga faapea le fala le see o faleupolu o tofiga ma le loaloa o le atunuu o lo o faafofoga mai i maota ma laoa i lenei itula o le afiafi. Faamalo le soifua manuia. E ofo alofa atu foi i le itupa gafua o lo o nopiai ma galulue i so o se tafa o le atunuu i le folafolaina o le upu o le ola aua se manuia o Samoa. Lau Afioga i le Fofoga Fetalai, e faamauina foi le faafetai a lenei itumalo mo le Tala Faatatau o Tupe 2019/2020 sa galulue ma fitaituga ai le Matagaluega o Tupe faapea le Afioga i le Minisita o Tupe, le mamalu o le Kapeneta ma isi Matagaluega sa faapena ona tofusao uma i le tuufaatasiga o le tatou Tala o le Tupe. O lea la ua tagai ane i fanua le faatamasoaliiga i le tai, ua malo le tautai ae.

Lau Afioga i le Fofoga Fetalai, o manaoga uma o lenei itumalo, ou te manatu ua maea ona momoli i Afioga i Minisita i tulaga tusitusia, ua maua foi le avanoa sa savalia ai e nisi o afioaga le Minisita i lona ofisa, ma faapena ona faaleo manaoga o lenei itumalo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ia, o lea foi ua ou malamalama ua maea foi ona asia e le Afioga i le Minisita le nofoaga ma afioaga o lenei itumalo e pei ona i ai latou talosaga i galuega tetele o lo o fia faatino. Ona i ai lea o le manatu lau Afioga, o le a ou le toe faaleoina ia ia manaoga, ona pau lava le mea o le galuega lava lea e tasi e agai i Sauniatu, le nofoaga o le Ekalesia o le Au Paia o Aso e Gata ai, se i manatua ane lau Afioga i le Minisita o Galuega faamolemole.

Lau Afioga i le Fofoga fetalai pei ona ou fai atu, o le a ou le toe agai e toe faaleo uma manaoga, ae ua i ai i lou manatu, e tolu lava nai mataupu, o atinae mai le lisi o atinae o lo o lisiina mai i totonu o le saunoaga a le Afioga a le Minisita o Tupe i lana saunoaga o le Tala Faatatau o Tupe, i lalo o le ulutala, ðatinae o lo o ave i ai le faamuamua a le Maloö e fia fai i ai se tala puupuu ma faaali foi i ai se manatu, aua o isi uma mataupu sa ou fia lauga foi i ai ua maea ona sausaunoa i ai Afioga i sui usufono mamalu nei. Ou te manatu e le toe asa pe toe aloa foi lea ogasami, ae o le a papaaveloa se manatu i nai mataupu ia laiti.

O le mataupu muamua, o le fausiaina lea o le fogafalelima o le Malo i Savalalo. E momoli atu le faafetai i le Malo i le tofa ua ae, o se atinae taua foi lenei atinae ua fuafua e amatalia i le tausaga faaletupe o muamua nei e afua atu i le aso 1 o Iulai i le masina fou, ae matau atu foi, o se galuega tele atonu o le faamoemoe o le a sii mai i ai ofisa o le Malo o lo o i le fale o le Malo o lo o i le eleele fou i le taimi nei. Ia atonu o se fuafuaga lelei foi lea e faaaoga le fale o lo o i ai nei mo se isi foi atinae a le Malo, po o a ana fuafuaga faatino e faaaoga i ai lena fale. A o galuega faapenei e lagolagoina e lou sui usufono ona e moomia lava i le tatou tulaga o le tatou economy aemaise le private sector mo kamupani, e manaomia ni galuega tetele faapenei e galulue ai latou e le gata e maua ai manuia o kamupani ae faapea foi tagata faigaluega, e maua ai galuega a tagata o le atunuu, aua e tele ituaiga galuega e maua ai aua e eseese lava matata e faaaogaina i galuega tetele faapenei, fale fogafalelima. Ia atonu o se avanoa lelei foi lea e faafaigaluegaina ai nisi o tupe a tatou Faalapotopotoga o lo o o ai e pei o le NPF ma le ACC. E taua o atinae tetele faapenei, e toe maua ai pasene, maua ai le return, aemaise la pe a faapea o tupe e faaaogaina pe faafaigaluegaina, o tupe a le NPF, tupe a le aufai saofaga e toe maua ai lea o isi tupe faasili ma tupe faaopoopo.

O le tulaga lea e pei ona matauina ma faitau i ai i le Lipoti faaletausagea a le NPF i nai tausaga ua mavae atu nei, o lo o maua a latou tupe faasili, masalo po o le 43miliona le tupe faasili o le isi tausaga. O lona uiga o lo o lelei le tulaga tau tupe a le tatou NPF. E pei o le mafuaaga lea o le fai atu o se manatu i avanoa faapea e faafaigaluega ai a tatou tupe nei. O lea foi ua aumai i le lisi o polokalame a le Afioga i le Minisita o Tupe e pei ona aumai i lana saunoaga, o le a amata faamamaluina le siitaga o le pasene o saofaga a le NPF, o lona uiga o lea o le a sii le tulaga i saofaga a tagata faigaluega.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le faatinoga o lea tulaga o le a toe maua ai foi isi tupe faaopoopo a le NPF ae o lea o lo o lelei lona tulaga o lona tamaoaiga tulaga tau tupe. Atonu sa i ai foi nai isi inivesi ma nisi polokalame ma nisi atinae sa faafaigaluega ai tupe a le NPF i ni tausaga ua tea e le i tulaga mai i se tulaga lelei, ia ae le afaina lena. O le mea e sili ona taua o lea e maua tupe faasili. E maua tupe faasili mai lea tausaga mai lea tausaga.

Lau Afioga i le Minisita o Tupe po o le Minisita foi o le NPF, e taua tele lea poloketi i lou talitonuga. Ae e i ai lava le manatu o lo o faapena foi ona avanoa tutusa ma Kamupani o le Private Sector, o Kamupani Tumaoti, i avanoa faapea i tatou seleni o i le NPF. O lea e maua avanoa a le Malo, e faatupe ai ana poloketi, a ia faapea foi ona maua le avanoa tutusa ma Kamupani Tumaoti. Aua o lo o i ai foi nai poloketi a nai Kamupani Tumaoti o lo o fia faagaoioi ma faatupe. E maua la le return e manuia ai le au faisaofoaga. Ma le isi, lau Afioga i le Minisita o le NPF, o le a sii foi i luga le %... atonu o i foi o le a sii ai i luga le pasene o le entitlement a nai tagata fai saofaga. O le tele o tausaga ia ua tuana'i atu, o tausaga taitasi e maua a latou 7%, 8%. O le tausaga na se i mavae atu nei, e pei lava e 10% lea ou te manatua. Afai e toe ausia le 10% i le aso muamau o Iulai i le masina fou, pe sili atu foi, maua ai sina 12%, ua e faatuina foi se isi matatia fou i ou taimi ua e tulai mai ai. Malo faafetai i le tulaga lea, ae o le a ou le tautala tele i le saofaga i le siitaga lea, ona o lea ou te iloa e mulimuli mai le Tulafono e faatulafonoina ai le siitaga lea o le saofaga. Ae o lo o maua le faaaliga e faapea o le tatou fale fogafale lima lea o le a fausiaina i le mea lea o lo o i ai le tatou flea maketi. Ua ou maua foi se faasalalauga, o le a sii le flea maketi i Sogi. O fuafuaga lelei uma, afai o le tulaga lea, ia o se tulaga lelei. O lea foi e matau atu, atonu e gafatia ona faatupe e le Faalapotopotoga a le SLC, e ana le flea maketi, ia lenei poloketi. Aua o lea ou te faitau atu i le latou lipoti faaletausaga e maua foi a latou tupe faasili. E momoli atu ai le faamalo ma le faafetai i le Afioga i le Minisita faapea le Pulega aemaise le Komiti faatonu i la latou foi galuega o lo o galulue ai, o lea e maua tupe faasili a tatou faalapotopotoga lea.

E pau lava o lea, se i silasila i le nofoaga lea i Sogi po o talafeagai, po o se faaiuga tumau po o se faaiuga le tumau mo lenei taimi. Aua e i ai foi nisi o lenei itumalo o lo o fai a latou flea maketi e i ai la latou mau, e pei ua fai sina mamao ese mai le main road. Ae se i silasila ane ma tagai ane i lea tulaga, aua o lea foi e aumai a latou mau, i isi foi maketi sa fausiaina e le tatou Malo, e pei e tu mamao ese ma le main road, o i o lo o feoai ai le tele o taavale, o i latou ia o le au faatau. Aemaise la i i Savalalo o lo o i ai le toaiga o pasi o taxis, ia faapea foi tagata o le atunuu o lo o femalagaai. Ae i ai foi latou ia o lo o o mai i meli laupasese, e pei e faigofie le agai mai i i. Aua o lea foi e matau, o i i Sogi e le o po se lilo e fai foi si vaapiapi o auala ma tulaga faapena. Ae se i silasila ane i le faaleleia o lena vaega pe afai o le a fausiaina le tatou flea maketi i Sogi. Ina ia faalautele a tatou auala, ia faafaigofie ai ona uia e pasi ma taavale ma tulaga faapena.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Minisita, e pei o se manatu lea e tau tilotilo atu i tatou atinae ia. O se tupe tele foi, e talitonu o le a faaaogaina e fau ai le tatou flea maketi i Sogi. O se atinae lelei foi lea mo le tatou economy aua foi Kamupani ma le au galulue, o le a galulue ai i i e faatino lea poloketi. Ae momoli atu ai le faamalo ma le faafetai. Ona ua ou taua mea ia o maketi, sei silasila ane lau Afioga, po o le a se fuafuaga a lo tatou Faalapotopotoga a le SLC, aua o lea e maua tupe faasili, ae se i fai sina suiga po o nai renovations po o ni improvements i le tatou maketi i Salelologa. Ua ou matauina e pei lava o lea e alofia e le tele o pasi ma taavale ae tatau ona i ai se isi suiga fou, pe fai nisi design fou, aemaise le itu i sisifo o le maketi, o lena e i ai fale e pei ua leai ni pisinisi o toe faia ai, fale ia e tutu ese taitasi. O le a se finagalo ae tala ese uma na fale, ae fai ai se isi faiga fou ina ia tosina ai le Aufaipisinisi laiti, aemaise lava le Aufaipisinisi laiti, e o atu e faatu ai a latou pisinisi i ina ma toe fai faalelei ia auala. E faapena foi le isi itu mai i le itu i sasae i le mea o lo o i ai le maketi ia. E tatau foi ona silasila po o le a se isi fetuunaiga. O manatu lava ia ina ia i ai se suiga fou ma se suiga lelei ina ia faatupulaia ai ia tupe maua a lo tatou faalapotopotoga.

Lau Afioga i le Fofoga Fetalai, e fai afai se tala puupuu i le tatou vaalele le Samoa Airways. Aua e toatele foi sui mamalu e le i saunoa i le lelei foi o lea atinae. E faataua tele e lou sui usufono le atinae lenei, o le tatou vaalele. Aua a lelei ona fai, e tele le manuia o lo tatou atunuu e maua mai ai. Ae le i agai tele sau tala i le tatou vaalele, e momoli atu le faafetai i le Afioga i le Minisita o le malae vaalele, ona o auala foi ia e fesootai ai le fale o pasese ma le vaalele ia po o aerobridges e pei foi ona taua ma sausaunoa i ai nisi o sui mamalu. O le matou taunuu mai i le matou faigamalaga ae ua faaaoga atu a tatou aerobridges o se agaga fiafia ma le agaga faafetai, i le vaai atu i nai tina matutua ma nai tama matutua sa o matou malaga faatasi mai, ua le o i fafo. E taunuu mai lo matou vaa o la e timu le malae vaalele i Faleolo. O se agaga fiafia lea ma se agaga faafetai, ua mafai lava ona agai sao mai i le vaalele i totonu o o tatou fale, i Faleolo i le malae vaalele, e pei o le tulaga lea ua alofia le tulaga o le timu ma le susu, ona o lenei foi faaopoopoga fou. Ua siitia ai le tulaga o le tatou malae vaalele Faava-o-Malo. E momoli atu ai le faafetai.

O le tatou vaalele o le Samoa Airways, faafetai i lau Afioga i le Minisita ma le Pulega ma le Komiti Faatonu. O lea ua maua le lipoti, ua tatou fesootai i le GVS System, o le system lea e mafai ona faia bookings mai so o se atunuu o le lalolagi, ona mafai lea ona book sao lava, a taunuu mai po o Niu Sila, Ausetalia ona faaaoga mai lea o le tatou vaalele, e le taugofie lea system, aua o lea e matau atu pei e US\$300,000, ae o lea ua mafai ona tatou fesootai. Faafetai i lea connection, i lea system fou ma nei tekonoosi ua mafai ai ona tatou fesootai faapea i tulaga e faaleleia ai le auauna ma siitia ai le tulaga o le tatou Kamupani.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lo o matauina o lo o manaomia tupe, i le tatou vaalele, o lo o manaomia tupe e faatino ai ma faataunuu ai a latou fuafuaga o lo o faatino, po o fuafuaga o lo o manao e faataunuu. A o le tulaga lea, silasila ane lau Afioga i le Minisita o Tupe faapea foi lau Afioga i le Minisita o le Kamupani ma le Malo, pe i ai foi nai isi atinae e toe fetuunai, ae faavagavaga nai isi tupe aua le tatou atinae lea o le vaalele. Aua o lea e matau atu o le taimi nei e le o tele se tupe a le Malo o faaaluina ai, o lea lava e faaaoga mai tupe a si Kamupani, nai vaalele laiti lea e feoai i Tutuila. O tupe ia e maua mai i le tatou operation lea e agai i Tutuila, o lo o faapena ona taumafai ai le tatou Kamupani vaalele i le vaa lapoa lea. Aua o le valu tausaga lea ua tuanai atu, o lo o maua lava tupe faasili a lo tatou vaalele laiti lea e agai atu i Tutuila. O lea foi ou te vaai atu i le latou lipoti faaletausaga, e le itiiti ifo i le \$3milionia i le tausaga a latou tupe faasili e maua. O le mea lea e momoli atu ai le faamalo ma le faafetai i le Pulega ma le Komiti faatonu ma le Afioga i le Minisita. E pei o seleni ia faatasi ai ma nai nonogatupe mai le UTOS, ia o lo o faatino ai le tatou vaalele lenei ma lana auuanaga. Faamalo faafetai.

E matauina ona o le tele o nei tupe o lea e faasee mai i i e tau fai ai le tatou vaalele. Faafetai mo le tatou vaalele lea ua lisiina nei, o le Molinda mai le atunuu o Meleisia, e talitonu e lei faigofie. E momoli atu lava le faamalo i le CEO ma le Pulega, e lei faigofie ona saili mai le vaalele lenei i le taimi puupuu. O le taimi puupuu lava ina ua taofia vaalele ia sa fuafua e aumai vaalele fou o le Max. ae o lea sa o e saili mai se vaalele e sui ai vaalele ia, ae le i faigofie. E le gata e faigata ma lavelave le tele o tulaga i le taumafaiga o lisi, ae faapea foi sa maua lava seleni e deposit ai le tatou ski lift, e auina mai ai vaalele pe US\$1.2milionia, faapea foi le lisi, i le negotiate ina o tatou lisi o le vaa masalo, e pei o lea ou te vaai atu e tusa ma le US\$1.4milionia i le masina. Faamalo faafetai mo ia galuega lelei ma o lo o taumafai pea. Ae o le mea o lo o matauina, e manaomia lava nisi tupe faaopoopo. E na ona ou fesili atu ai la i le Minisita o le Kamupani ma le Minisita o Tupe, pe le ua talafegai ia nei taimi ona privatize tatou vaalele, lau kamupani vaalele lea. E tatala nisi sea e faatau e tagata lautele private sector, aemaise o ekalesia. Aua o la foi e tele a latou seleni ae taofi e le Malo nisi sea, pe majority shareholder pea le Malo. E na o ni manatu e lafo atu i luma, o ni auala e tau saili ai ni tatou seleni faaopoopo, e faagaioi ai la tatou Kamupani vaalele lea. Aua e pei lava ona ou fai atu, o lou lava sui usufono e matua lagolagoina lava le Kamupani Vaalele lenei. Aua a lelei lava a tatou Kamupani ua faapena foi ona manuia ia faletalimalo, manuia faleaiga manuia faleoloa, manuia le Au fai taxi, mauia le Au fai pasi, manuia le au fai car rental ma tagata uma o lo tatou atunuu, siitia foi le tulaga o lo tatou tamaoaiga.

19 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E pei o le vaega lea e ala ai ona naunau atu foi lou sui usufono i le tulaga lea. Lau Afioga i le Minisita o le tatou Kamupani, e maua atu o lea lava o lo o i ai le taimi. O se taimi taunuu mai lo tatou vaalele lea sa faapea e fuafua e aumai i le vaalele fou o le Max. Aua o lea e matau atu ua uma ona totogi le tatou ski lift deposit, ua uma ona totogi le tupe e train ai pilots, ia faapea cabin crew ma Inisinia. Ae po o ua mua se aso, a o se masina e taunuu mai ai lo tatou vaa lea, aua foi le silafia e lo tatou atunuu, i fuafuaga e pei ona i ai. Lau Afioga i le Minisita o Tupe, malo faafetai, o le atinae mulimuli po o le poloketi mulimuli, lea ou te vaai atu i ai i lau saunoaga, e na ona fia pai i ai o se faamatalaga puupuu. O le poloketi mo pepa o faamaumauga mo tagatanuu uma, National ID System. Malo faafetai, atonu o lenei foi poloketi ua leva ona taulagi mai, a o lea o le a faataunuuina i le tausaga faaletupe fou. E taua tele le poloketi lea, ma e taua foi i le fesootai ma le tatou ofisa foi lea e faamaumau ai le soifua mai ma tagata maliliu. Ae taua foi le fesootai mai i le tatou ofisa lea o Faiga Palota. Aua tagata o lo tatou atunuu, ua agavaa e faatino palota. Aua o lenei lava tulaga, e i ai matou e galulue i Private Sector o le faigata ia. E tapa atu le ID e faamaonia ai le sainia o pepa ma tulaga faapena. E leai se tusi folau, leai se laisene avetaavale, aua e le tofu laisene avetaavale uma tagata. O isi foi tagata e le malaga i fafo e leai ni tusi folau. A o le faiga lea se i taofi ai foi le isi au tau faasese lea e feofeoi, e o saina pepelo ia pepa, aua e leai ni ID e faamaonia ai. E pei o tulaga ia e momoli atu ai le faafetai, i lea foi poloketi ua fuafuaina e lo tatou itumalo

Lau Afioga i le Fofoga Fetalai, e muli sa matou tala, faamalo lava i le uso le sui usufono, le Fetalai ia Namulauulu, i le tulai mai foi i tofi o lona itumalo. Amuia Namulauulu, amuia lau tofa o lea ua e tulai mai, o oe o le sui usufono ua muamua ona faatautoina i le Maota Fono fou lenei, ma o le a faamauina foi i le tala faasolopito o lenei Palemene, malo faafetai o ou mama na. Sagai ane ai o le tai, manuia lou tulai mai. E i ai lou talitonuga e umi lava sou taimi i le Maota lenei. Malo, ona ua leva foi ona ta masani, ma sa ta galulue faatasi foi i se tasi o vaitaimi. Malo faafetai i lou tulai mai, faamanuia le Atua i lou tofi.

Lau Afioga i le Fofoga Fetalai, agalelei le Atua i lou soifua maua pea le malosi i le tino faasilisili le agaga. Alofagia e le Atua le afioga i le Palemia ma Afioga i Minisita o le Kapeneta ma Minisita Lagolago ma le la itu o le Maota, ia faapea foi i lenei itu o le Malu. Ia faamanuia le Atua i afioga i sui mamalu uma, faapea foi le tapuaiga a Ofisa Sili o Pulega i Matagaluega. Tapuaiga a Samoa ia folau i lagima. Tapuaiga a Samoa o lo o faafofoga mai i Maota ma laoa i lenei itula o le afiafi, ia manuia foi malologa o le afiafi ma lenei po. O la matou faamatalaga lea, manuia foi lo tatou itumalo o lo o tapuai mai, e toe fai foi ni a tatou tala aua tatou te fetau lava i aso uma. O lena lava tou te silasila mai o le matou malosi lava o lo outou sui usufono. Aua le popole e faapena, e toe oso foi le la.

Lau Afioga i le Fofoga Fetalai, seu ia i fanua lo matou sa ae sili lau foe, manuia toega o totoe o le tatou Fono i lenei afiafi.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo faafetai saunoa i lau Afioga i le sui usufono mamalu. Ia, ma o lo o tulai mai le sui usufono mo Faleata Sasae mo lau saunoaga. Tulai mai le sui usufono e saunoa.

**Afioga SALAUSA JOHN AH CHING (Faleata Sasae):** Ou te tulai lava i le ava ma le faaaloalo tele e faatalofa atu foi i lau Afioga i le Fofoga Fetalai, faafetai tele mo le avanoa ua tuuina mai. E faatalofa atu foi i le Susuga i le Palemia ma le Kapeneta, Minisita Lagolago faapea foi le la Itu o le Maota. E faatalofa atu foi i Ofisa Sili o Pulega ma le aufaigaluega a le Malo, ae tainane le faafofoga mai o Samoa.

E faatalofa faapitoa i si ou itumalo o Faleata i Sasae, Vaimoso, Lepea, Vailoa, o outou paia o le a taoto aua o paia ma mamalu ua popo a o se alao, a o le a faasaoina le taimi ina ia fai so tatou sao aua le Tala o le Tupe o lenei tausaga.

O le agaga o lou tulai atu, na ona momoli o le faafetai ma le faamalo ma avatu se faamalosiaua ona o le paketi lenei o le paketi a le Itu lenei ua uma ona matou saunia le paketi ua uma foi ona faataamilo ma ua faaiu atu i ina i le Komiti o Tupe ina ia silasila totoa i ai pe ua talafeagai. O le mea lea, o le lauga i lenei po, o le lauga faalauaitetele i le aotetelega o le paketi. Sau se taimi ona tatou talanoa lea i mea taitasi, o le taimi lena e faali ai foi nisi manatu i le faatinoga, a o le taimi lenei, ia o le aotelega. Aua o le fesili e tulai ma ii le tapuaiga a e matutua i nuu ma alalafaga i tua, o a mai le tamaoaiga o le tatou Malo? Na pau lava lea o le mea e fia silafia e le aumatutua, o a mai le tamaoaiga o le tatou Malo? O tusi o paketi ma isi uma mau mea e le faigata ia latou ona malamalama ai, na pau lea o le mea e fia faafofoga mai a ii le sui usufono, o le a le tulaga o i ai le tamaoaiga o le tatou Malo. Ia e sau se taimi ona saunoa lea o le Taitaifono o le Komiti o Tupe i le tulaga lea, ae tau ia ina ou faailo i le matou itumalo.

I lau faafofoga lou itumalo o Faleata Sasae, i le tilotilo atu i le Tala o le Tupe, o lo o saogalemu le tamaoaiga o Samoa, o lo o soifua maloloina le tamaoaiga o Samoa. O le mea lea, aua ne i faapopleina lo tatou itumalo, ae tainane foi le faafofoga a le atunuu aua e tele le mau tala feaveai mai i ma o o fesootaiga mai fafo o lo o fesiligia le tulaga o lo o i ai tupe a le Malo.

A ou mafaufau atu i le taimi na faatoa amata ai ona ou faigaluega i le falemai i le 1976, o le vaitaimi foi lea na amata ai foi ona ota tilotilo i le mea lea na tupu o le leai o se tupe a le atunuu, sa faasolo ai le laina a le mamalu o le atunuu mo le faatauina mai o ni taga suka po o le falaoamata aua foi sa tau faasoasoa le tupe. O le taimi foi lea sa i ai le tulaga lea i wholesales a faleoloa, e faatulaga le tupe mo le fia masina. Sa fai le ratio o mea ia, ona o le tau faasoasoina o le tupe, le lava le tamaoaiga e faatau mai ai tatou oloa mai fafo.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le tulaga la lena sa ou maitauina mai le taimi lena, ua oo mai nei i le vaitaimi lenei i le amataga o le tatou Paeaiga i le 2016, sa le faia lava se lauga foi po o se manatu a lenei sui usufono i mea faapenei, ona sa matau, sa nofonofu lava ma matau po o fea o agai i ai le tulaga o le tupe. O le mea la lea ua ou manatu ua alagataatau ona ou faaali le mea lenei i le matou itumalo ma le faafofogaaga ina ia faanofofilemu ai, aveese ai ma le popole i le tulaga lenei. O le tulaga lea ua i ai nei, o lea ua i ai tupe faasili, ua uma ona totogi a tatou aitalafu, uma na fai uma ma isi mea ma tupe e alu i atinae, ae o lo o i ai le faapolopolo a le Malo. O le isi pine o lea mea, o le tupe lea na faaaogaina nei i se taimi puupuu lava na manaomia ai le \$600,000 pe a mo sikolasipi a tatou fanau ina ua faaletonu mai fafo. A leai se faapolopolo, e faapefea ona tupu lea mea? O lea foi o lo o i ai le tatou faapolopolo i nuu mamao. Sa matauina lava i le amata mai o lenei Paeaiga, sa ou tilotilo i le mea lea o le foreign reserve e tolu masina faasolosolo mai ai lava ua agai i le fa masina, o le mea lea ua ou tilotilo atu nei i ai, o lea ua 6.3masina o le tatou foreign reserve o le tatou faapolopolo lea o lo o i fafo. O lona uiga, o lo o agai lava i luga le lelei o le faatinoga ma le puleaina o tupe a le tatou atunuu. O isi la mea ia tatou te talanoa mulimuli i ai i le auiliiliga, o le faatinoga o mea ia. Ae na faapefea ona tupu lea mea? E faapefea ona lelei le tatou sailigatupe lenei ma le faafoefoeina? E tele e sa galulue i le mea lenei, ma e ao la ona avatu i ai se faafetai a lenei sui usufono e fai ma sui o le itumalo lenei.

Muamua, faafetai i le Atua, faafetai i le Atua i lau tausiga ia Samoa, mai lava ua tele mea ua tatou molimauina ai le alofa o le Atua ma lana faasoa ia i tatou. O le mea lea faafetai le Atua i lau faasoa, ai ona o lea e faavae le atunuu lenei i lau Afio. O le mea lea, ia saga tausii mai pea le Atua i lo tatou atunuu.

O le a amata atu le faafetai i le itu lea. E momoli atu le faafetai i Ofisa Sili o Pulega o Matagaluega a le Malo, faapea foi Ofisa Sili o Faalapotopotoga Tumaoti a le Malo. E muliai aumai le Tala o le Tupe ma faamaopoopo e le Ofisa o le Tupe, a o galuega uma ia o lea ua tuufaatasi uma i i, e i ai Matagaluega e saili ai tupe a le Malo, e i ai Matagaluega e faaalua ai tupe a le Malo, a o Matagaluega foi ia, faafetai i la outou faasoa ua faaoga tatau tupe, e le o faaaogaina... aua ana faaoga faaletonu le tupe, masalo e leai se tupe e totoe. A o le mea lea, faafetai tele atu ia te outou. O upu lava ia sa masani ona fofoga foi i totonu o le Maota lenei, o lupe faia mai le fuifui, ma o outou ou te fia avatu i ai le upu lea. O outou na faia mai le fuifui o le toatele o alo ma fanau a le atunuu, na faalele foi lupe ia i fafo, ma o lea ua foi mai ma le atamai faapitua, o outou o consultants o atamai faapitua e tua atu i ai le Maota lenei. Ma ia outou onosai foi, o a ni faaaliga a sui o le atunuu i le Maota lenei, e leai o le faafetauagai lava lea e tatau ona fai ina ia lelei le pulega ma le faaaogaina o a tatou tupe. Ma o le maota foi lenei i lo outou silafia, o alii ma faipule foi nei o le atunuu. Ma o lo o taua pe tatou te taua foi o le Palemene o Samoa, a o lau foi faaupuga i ai o le Fono Sili Aoa o Samoa, o alii ma faipule o Samoa e i ai le Maota lenei.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Faasolo mai le faafetai ia te outou le aufaigaluega a le Malo, ma o mea uma nei e leai se tatou tupe e maua ma se tupe faasao pe a le faigaluega lelei le tatou aufaigaluega. O le mea lea e avatu ai le faafetai, o lea ua matou lufilufia le vaegatupe nei na aumai, ae aumai fea? O fua ia o a outou galuega lea ua matou lufilufia i le Fono lenei, ma Fono faapenei o tausaga taitasi. Ave le faamalosiua i a outou Afioga ina ia tumau i le faamaoni, tumau i le toaga, ua leai nisi mea tatou te maua ai ni mea lelei. A tatou le faamaoni ma tatou toaaga e tatou te le maua se mea lelei. O le feau foi lea e avatu i lalo o le tatou aufaigaluega e tau lava i lalo, toaga ma faamaoni.

Faafetai i le Palemene mo la outou galuega lea sa ou taua o lo o faatauagai ai e saili le mea lelei aua le agai i luma o le tatou atunuu. E momoli atu foi le faafetai i le Afioga i le Palemia ma le Kapeneta ona o le fuafuaina o le tatou paketi.

Faafetai faapitoa i lau Susuga i le Minisita o Tupe mo le fuafuaina o lenei paketi aua le agai i luma. O mea ia o lo o tapuai mai ai le tatou atunuu i a tatou galuega fai. Faafetai atu foi i le private sector aua o isi ia vaega o lo o taumafai e saili le tamaoiga o le tatou atunuu. Faafetai faamalo le galulue, faafetai i le Aufaifaatoaga, faafetai i e uma o lo o i nuu ma alaafaga o lo o fai atinae aua le tamaoiga o le tatou atunuu.

O le isi foi mea aua e tele lava foi mea e talosaga ai faipule ma tatou uma, ia e tele lava foi le manao, ae tatau foi ona fai fuafua i a tatou tupe maua. O le mea lea na o se tuualalo, tatou faia le mea lea o lo o sau i le tatalo a le Alii, foai mai e tatau ma aso taitasi, tatou talia foi ina ia tatau ma aso taitasi. Faamalo faafetai.

O le isi fautuaga mo le tatou aufaigaluega, e i ai le manatu faapea, ia tatou taumafai e faaleleia atili mea o lo o i ai, ae taofiofi ni mea fou, se i vagana se mea fou ua tatau ma talafeagai ona fai lea ma faatino. Aua o le tele o nisi mea, e toe omai lava nisi mea fou o la lava e faaletonu mea tuai, a o mea ia, o mea tuai o la e lelei ai ma faatino ia toe faaleleia a tatou mea tuai o lo o i ai ona fai ai lea o nisi mea fou.

Ou te le lauga foi agai i Minisita, leai. O le manatu foi o lo o i ai, o le mea foi lea e tatau ona malamalama ai le tatou itumalo, leaga o matou nei o Minisita Lagolago, o lea e i le itu a le Malo, e faigata foi ona matou lauga i mea faapenei. Ma e ui lava ina ou le lauga i mea nei o le faasaoina o le taimi, ae ou te tautino atu i le tatou itumalo, e le o malolo vae o le tou faipule, o lo o fealuai i aso uma, taimi uma, fetamoeai e saili mea e maua ai se faamamaavega ma maua ai se fesoasoani mo i tatou. O le mea lea, lava papale mai ma onosai mai.

Ia, o le tulaga lena, ua uma foi le lauga lau Afioga i le Fofoga Fetalai. Ona pau lava lea o le mea sa fia faaleo, e fia faaleo le manatu o lenei itumalo i mea ua oo i ai le tatou Tala o le Tupe.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E faauma atu ai se faamatalaga aua ua taua soo lava le uafu lea i Asau, leaga sa ou faigaluega i o i le itu Asau, e lua tausaga o ou faigaluega ai, ma le mafuaaga na ala ai ona faaletonu le le mafai ona eli i luga le papa lea e alu atu ai i totonu le alavaa, ina ua avatu masini ia, masini i le tausaga lea masalo po o le 1977 po o le 1979, masini la ia e eli o le mea o le pakete ma le filifili e eli mai ai i luga le... ua alu atu la le pakete ua mau i lalo le pakete ua le mafai ona toe sau i luga. Ona fai atu loa lea o le palagi lea i le aufaigaluega, you two boys go down then see whats happening. Ia ona moulu loa lea o le toalua lea Samoa i lalo e vaai, e o atu ua motu ese mai le filifili mai le pakete. Ia ona omai loa lea i luga fai atu le isi alii lea, tago oe e fai le lipoti i o i le palagi. Fai mai le palagi, whats wrong boys? Fai mai ia lena fai atu loa oe, ae fai mai le isi alii, se nanu oe e lelei lau nanu. Ia fai mai loa lau tama lea, oh boss, is no good no good, the bucket and the filfil mokus. Ioe. The bucket and the filfil mokus. Lea la e faaletonu mai ai lava le ava lea e i Asau e oo mai ai i le taimi lenei. Faafetai pe a maua se isi avanoa e toe faaleleia ai le uafu lenei i Asau. Faamanuia le Atua i lau Afioga, faamanuia le Atua i le Afioga i le Palemia ma le Kapeneta, faamanuia le Atua i Minisita Lagolago, faamanuia le Atua i lena itu o le Maota, faamanuia le Atua i le alii Ofisa Sili ma le Ofisa o le Faamasinoga, faamanuia le Atua i le aufaigaluega a le Malo ma i latou o lo o taitaia. Ia manuia le tatou Fono.

**Tofa Hon Lopao Natanielu Mua:** Lau Afioga i le Fofoga Fetalai, ina ne i te i ua faapea ai o ni tamaiti i Asau, o tamaiti lava na o atu ma le Sui Minisita lea e ona le nanu lea. Ma le faaaloalo.

**FOFOGA FETALAI:** Malo faafetai. Ua faafofoga foi i le saunoaga matagofie a le Afioga i le Sui Minisita. Ia ou te tapa ma le faaaloalo lau Afioga i le sui usufono mo Faasaleleaga Nu.4 sosoo ai ma le sui usufono mo Palauli Sasae. Tulai mai le sui usufono mo Faasaleleaga Nu.4.

**Afioga PESETA VAIFOU TEVAGAENA (Faasaleleaga Nu.4):** E muamua ona ou faatulou atu i le paia maualuga o le Maota i lenei itula o le afiafi. E muamua foi ona faafetai i le Atua ua maua le laolao o lenei itumalo e taumafai atu ai foi se sao i lenei foi Tala o le Tupe 2018/2019. Lau Afioga i le Fofoga Fetalai, faafetai i le Atua o lea lava e maua lou malosi, matou te tatalo i le Atua ia saga foai pea le malosi i lau Afioga.

Ou te faatalofa atu foi i le paia maualuga o le Maota, i le afio o lau Afioga i le Palemia faapea foi le mamalu o le Aiga Kapeneta, o le mamalu foi o sui usufono uma o le Palemene faapea foi le tapuaiga a Ofisa Sili o Pulega o Matagaluga a le tatou Malo.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E faatalofa atu foi i le tapuaiga a si o tatou atunuu faapea foi ... ou te fia oo atu foi i si ou itumalo pele o Faasaleleaga Nu.4. Lou itumalo, afai o outou faafogafoga mai i lenei itula o le po, ia onosai ma outou lavapapale mai pea ma faafogafoga mai pea i lo outou sui sa outou filifilia, o a lava ni mea o le a ou taumafaia, ia o le tatou sao lena.

Lau Afioga i le Fofoga Fetalai, e avatu le faamalo ma le faafetai i le Tala o le Tupe. Faamalo faafetai i lau Afioga i le Minisita. E manatua ina ua e tulai mai i le amataga o lenei Paeaiga na filifilia ai lau Afioga e avea ma Minisita o Tupe. Sa le taumate i lou lagona, ma ou te talitonu ua leva ona galue lau Afioga i lenei foi Matagaluega, ua lava le tomai lava le tofa i lau Afioga. O le tomai foi ma le meaaloa a le Atua ma le taleni ua foai i lau Afioga faapea foi le Susuga i le Ofisa Sili ma le mamalu o le Matagaluega, o le ala foi lea ua manatu ai lenei itumalo, i le matagofie o le Tala o le Tupe ua faigofie ua manino ma malamalama ua atagia ai i i le alu i luma o le tatou tamaoiga, aemaise le tele o a tatou atinae.

E momoli foi le faafetai i lau Afioga i le Minisita mo Tupe Maua, ou te faafetai ona o le Tulafono lea e le i mamao atu, e uiga i a tatou lafoga, lea ua matau atu ua tele lava ina usitaia, e nisi o le atunuu nei, mamalu foi i faafeagaiga. Ma e ou te le fefe e tau atu le mea lea, o Tulafono o nuu, e eseese ma Tulafono o isi nuu, o Tulafono a Ekalesia, e ese foi ma Tulafono a isi Ekalesia, a o Tulafono a le Malo, a o Tulafono e ao ona usitai e tagata uma, o Tulafono ia. E faavae lava sou manatu, o le usitai, o le usitai.

**Afioga Hon Tialavea Fea Leniu Tionisio Hunt (Minisita mo Tupe Maua):** Lau Afioga i le Fofoga Fetalai e le fia faalavelave i le saunoaga matagofie a le sui usufono po o le Afioga foi i le Minisita Lagolago, tau ina fai atu i le mataupu lea i faafeagaiga o le a fai le faamasinoga i le Aso Gafua o le vaiaso lea, e mafai ona faataatiaese le mataupu lea, o le a fai le faamasinoga i le Aso 1 o Iulai.

**FOFOGA FETALAI:** O le a le mataupu lea na saunoa i ai le sui usufono?

**Afioga Hon Tialavea Fea Leniu Tionisio Hunt:** O le mataupu lea i lafoga a faafeagaiga.

**FOFOGA FETALAI:** Oi, tulai mai le sui usufono e faaleo maua atu e le Fofoga Fetalai.

**Afioga PESETA VAIFOU TEVAGAENA:** Lau Afioga i le Fofoga Fetalai, masalo e le o maua tele mai e le Afioga i le Minisita ia le agaga o le lauga, leaga o le upu lea ou te avatua, o le usitai, e le o sau upu o le upu a le Atua.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

A faitau lelei i le Tusi lea a Samuelu 15:22, ae o le upu lena na faatonu ai e le Atua ia Samuelu, sau e alu e fai ia Saulo, fai mea ia, faaumatia uma le nuu lea o Amaleka, fasioti ma le tupu o Akako. O mamoe ma povi pepeti ma mamoe pepeti, faaumatia uma, ae o le a le me na tupu? E le i usitai Saulo, fai mai le Atua ia Saulo, o a,í leaí manu ia lea ou te faalogo atu ai? Ae fai mai Saulo, mamoe pepeti ma manu e a, e osi ai le taulaga, ae o le a le upu a le Atua?, E le o le taulaga, a o le usitai. O le agaga lea lau Afioga i le Fofoga Fetalai, e tau avatu ai se manatu o lenei itumalo, leaga o Tulafono na faavae i totonu o le Maota lenei, e tatau ona usitai i ai tagata uma.

O lea ua tatou vaavaai ma molimauina, i le tele o faamanuiaga, o lea ua taumafai lo tatou Malo, e tuuina atu i le toatele o le tatou atunuu, o le penisione, o lea ua sii ia tatou penisione, e pei o nai vaega ia lau Afioga Fofoga Fetalai, o lea ou te taumafai e avatu ai le manatu, ina ia manino ai vaega ia, ona o a tatou Tulafono, e ao ina mulimulitai i ai tagata uma i Tulafono, e faavae i totonu o le Maota lenei. E pei o le vaega lea lau Afioga i le Fofoga Fetalai, leai e le o se Tulafono a lau Afioga i le Minisita, o le Tulafono a lo tatou Malo, faamalulu atu i lau Afioga. O le Tulafono lava na faavae e lo tatou Malo lea ua avatu i le Matagaluega ma lau Afioga ma le maualuga o le Matagaluega e faatino, o lona uiga, e au lava i tagata uma o le atunuu lenei, ona usitai uma i le Tulafono.

Lau Afioga lea sa ou faalogo ma le totoa, i le uafu lea i Vaiusu, o le a le oo lava sau faamatalaga lea ua uma ona saunoa i ai le tele o sui usufono mamalu, ia na o se tuualalo atu lava i lau Afioga i le Minisita, ona e i ai se tasi o kamupani na oo mai i Samoa na ou vaai ai i lana ripoti, faapea mai e i ai le afaina o le uafu pe a faatuina ai i Vaiusu, ona e feagai tonu lava le ava lea, ma Vaiusu i le mea lea e fuafua i ai le uafu, ona o le mea tonu lava lea o lea e tupu i le uafu i Matautu, o le tui pea vaa, tui pea vaa, ona e latalata le ava i le mea lea e i ai le uafu. Ia na o se tuualalo i lau Afioga i le Minisita, ae vaavaai atu i le lipoti a le Inisinia lea, e taua le faatino i Vaitele, ona o le itu i Sisifo, e fai sina malu o le vaega lea. Ia na o se tuualalo, ae o lena e i ina le tofa ma le uta.

**FOFOGA FETALAI:** Malo, ia masalo, faamanatu atu o lau Afioga o le Sui Minisita, faamanatu atu i lau Afioga e le umi foi se saunoaga i lau Afioga na ona faamatogi lava o le mea o i ai lou finagalo.

**Afioga PESETA VAIFOU TEVAGAENA:** Ia, e tele lava mea sa ou fia oo i ai, ia e usitai tele i le nofoa, e tatau foi ona e manatu mai o le sui usufono o Puleono lea e tulai atu lau Afioga. Ui i lea, e usitai lava, leaga o lea na ou avatua i lau lauga, o le usitai. Afai la ou te usitai i lau Afioga, ia malie lau Afioga, talia foi se mea ou te talosaga atu ai.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Minisita mo Aoga, e momoli atu le faafetai a lenei itumalo. Faafetai mo le faleaoga o si ou nuu ua leva. Ua tele foi nai sui usufono sa nofoia le nofoa lenei, e talosagaina lava lenei faleaoga, ae momoli le faafetai i lau Afioga, ua fai tonu lava le faleaoga lea ua lata i le pal ota. Faafetai, masalo pe toe tasi le masina umusa. E momoli foi le faafetai tele i le Malo tele le Malo o Amerika, o lo o latou faatupeina ia lenei galuega. E pei o le agaga fiafia lea ma le agaga faafetai lea o si ou nuu i Asaga, ona ua lea ua lata ina maea lea galuega. O lea e momoli atu ai le agaga ma le faamalo ma le faafetai i lau Afioga.

Lau Afioga i le Minisita mo le Soifua Maloloina, masalo o le tele o sui usufono mamalu, e aumai o latou finagalo i le utiuti o fomai, ia na o sou manatu lava ae le fai ai, ae ia tofa malie foi lau Afioga, i sou manatu sa ou nofo ma au, tau lava ina tuu atu i ina. Ua tele taimi ou te feiloai ai i le tele o Fomai, e agai atu e fia vaai i Minisita. Ia silasila foi lau Afioga i le Minisita, e utiuti lava nai a tatou fomai i Motootua, e afa au, ae toe foi le Ofisa o le Minisita i uta i le falemai, ina ia aveese ai le mamao lea e tau oo mai ai ia le tele o Fomai e fia vaai i lau Afioga, ona o le tele o nai a tatou mai, ma faalavelave faafuasei, e omai i uta i le falemai, tele lava ina le avanoa nai Fomai, ona o le tele foi lea e tau omai i le Ofisa, o le mamao lea ou te tau avatua, aua ou te manatua o le tele o tausaga ua mavae, lea sa i ai lava le Ofisa o le Minisita i uta, ona o le tulaga i le vavalalata. O le a se mea e tulai mai i le falemai, ia ae o lea e next door lava le Ofisa o lau Afioga i le Minisita, ia na nai fomai foi o lo o fia oo mai e vaai lau Afioga.

Lau Afioga i le Minisita mo Galuega, ia ou te avatua soo lava le talosaga i le tulaga foi lea o lo o tulai mai i le vai sima foi lea o si ou nuu i Lano. Ia lea foi e le o po se lilo pei foi o faalavelave na tulai mai ai, ia na o se talosaga, na o se talosaga, se i toe silasila ane lava, pe le tataua ona avatu i ai ia nai auuala laupapa foi ia lea e toote i Vaitele, Building bridge foi nei, ina ia mafai ai ona.. po o a taimi e pa mai ai le vai lea, a o lo o mafai ona savalia e alo ma fanau o si ou itumalo ia le aoga ma le faleaoga, ona o le faigata o le vai lea, a oo ina pa, e le toe aoga alo ma fanau o le nuu nei. E oo foi i le mamalu o le atunuu e fegasoloai, agai i Sisifo ma Sasae, e faigata tele le vai lea o le ala foi lea na ala ai ona tulai mai ai faalavelave i le taimi ua sola, na tafea ai le pasi lea ma maliliu ai nisi, ona o le vai sima lea i Lano lau Afioga, ia e na o se talosaga e tuu atu.

Lau Afioga i le Minisita mo Vaalele Savili, o le agaga fiafia i lou nei sui usufono, manaia nai a tatou pasese, ou te faafetai foi i pasese ia e faalogo atu ai o business classes, lea ua matau atu lea ua tele lava ina pau i lalo, i le fua atu i ai i tagata femalagaai, e sili ai le nofoia o nofoa ia e moi e taugata laititi, a o le mafai ona aumai ia latou faatau foi nei e ala ai ona o atu i la atunuu, o le mafai ona aumai e lo tatou vaalele.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua**

Ma o le mea moni lava, o le tele o nei faatau, e le mafai ona aumai e le Air NZ, faapea foi i le Virgin Blue i lena vaitaimi. Ae o le agaga faafetai i lou nei sui usufono, o lea ua mafai ona aumai faatau nei i luga o le vaalele i le cargo, o mea lava e tua i ai ia nai pisinisi ia ma le mamalu o le atunuu, i mea e moomia, ae pei e momoli ai le agaga fiafia ona o avanoa, o le avanoa faafetai lea, ona o le mafai ona aumaia o nei mea, i se taimi vave.

Ia lau Afioga i le Fofoga Fetalai, sa tele lava mea sa manatu ai lou nei sui usufono ae ou te usitai, usitai lava lou sui usufono i lau Afioga, ia na ou manatu lea, lou itumalo e, ia faamalo le fai o le faiva faamalo le tapuai, e le o toe umi foi toe tasi foi le tausaga, tatou aulia foi le isi faigapalota. Ia ae tapuai mai pea se isi foi taimi foi tatou feiloai, faamanuia le Fonousu a le atunuu. Soifua ma ia manuia lau Afioga, i le Fofoga Fetalai.

**FOFOGA FETALAI:** Malo, faafetai saunoa i lau Afioga i le sui usufono mamalu mo Faasaleleaga Nu.4. Ia ma ua oo mai le faasologa i lau Afioga i le sui usufono mamalu o Palauli i Sasae. Tulai maia lau Afioga e saunoa.

**Afioga TUIFAASISINA MISA LISATI LELEISIUAO PALEMENE (Palauli Sasae):** Lau Afioga i le Fofoga Fetalai o le Maota, faapea sui usufono mamalu uma aemaise le Fonousu a Samoa. Tulai atu e fai se sao o Palauli i Sasae, i lau Tala o le Tupe 2019/2020. O le tofa molimoli foi lea aua Faasisina ma Salilomaiava, ma le Levaleva ia Sa Faleletau , ma Palauli na potopoto, ma o oe o le pule. Ia lou itumalo e, tapuai maia se i fai so tatou sao i le Tala Faatatau o le Tupe.

Lau Afioga i le Fofoga Fetalai, o sa ma faiga o lenei Maota, o Samoa faafogafoga mai, tapuai mai, o le a taoto lava, ae ua i ai le manatu, o lea ua maea ona samalalanu, i saunoaga a sui usufono mamalu, i lenei aso.

Lau Afioga i le Minisita o Tupe, Ofisa Sili o Tupe aemaise le Matagaluega o Tupe, e momoli atu le faafetai a lenei itumalo i le tuufaatasiga o le Tala o le Tupe aua le lufilufiina o tupe maua ma tupe faaalua a le tatou Malo. Lau Afioga i le Taitaifono aemaise le Sui Taitaifono o le Komiti o Tupe, faamalo mo le galuega taua, faamalo mo le galuega maeaea aua le taumafaiga po o le siakiina o lenei Tala o le Tupe. Ma e lagolagoina e lenei itumalo faiga faavae aemaise o le Tala o le Tupe o lenei tausaga 2019/2020.

Ona ou oo mai lea i lou itumalo, aveia ia lenei taimi e faaleo atu ai moomooga alofa aemaise le lagolagosua a lou itumalo i atinae tetele sa feagai ai i tausaga ua mavae, aemaise le afivai mo le atinae tele i le malosi faafouina. Lou itumalo, faafetai galulue, faafetai mo le lagolagosua i le tatou Malo. E fia faafetaia foi isi galuega tetele e i ai le galuega o le tatou vai taumafa e amata mai i Palauli e tau i Puapua.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le sao lea o le itumalo o Palauli Sasae aua le faigamalo o lo o tulai mai nei. O le isi tatou atinae e fia faamauina o le atinae o turisi, e momoli atu ai lau faafetai i lau Afioga i le Minisita aemaise le Ofisa Sili o le Turisi, aua le toe faafouina o le tatou atinae tau turisi ua molimauina ua maea i le taimi nei.

E fia faamauina foi le faafetai i lau Afioga i le Minisita o Tupe e auala atu i le Minisita mo le Soifua Maloloina, o lea ua maea le tatou galuega o le falemai faaitumalo i Satupaitea, Palauli Sasae faapea Palauli Le Falefa. O le fautuaga i lau Afioga i le Tamaitai Minisita, o lea ua maea le vaega lona lua o le tatou galuega tele ma e faamoemoe i se taimi o lumanai tatou feiloai i fanua aua le toe faapaiaina ma lau atu foi le fesoasoani a le tatou Matagaluega aua le siitiaina o le tatou auaunaga.

Ona ou oo mai lea i le Matagaluega o Aoga, Taaloga ma Aganuu, e fia faamauina i lau Afioga i le Minisita le tatou polokalame foi lea o le school net. O le taimi nei e le i ola lava le school net a le tatou aoga lea faaitumalo, po o le a se finagalo se i fesoasoani ifo i ai, ona ou faapea foi lea e soso atu i le Minisita mo Fesootaiga, e faale maua e matou siuleo ia e i le Digicel i le matou itumalo, pe mafai ona e fesoasoani atu ona o lea ua omai foi taaloga o le Pasefika, e fia moomia foi mo le reception foi lea o le TV ma le tulaga o i ai.

I le Minisita mo Faatoaga, ou te talitonu ua uma ona ta talanoa i tua, o lou itumalo ua tutu malosi aua le popo ma le koko, le toe faaleleia ma le lagolagosua i faiga alualu mamao aemaise o le tatou polokalame o le toe totoina o le koko ma le popo. O le suiga o le tau, e i ai le talitonuga o lenei itumalo, tasi lenei itumalo e tele tele le aafiaga i le suiga o le tau, ona o le matou itumalo o i o lo o sau ai le vaitaumafa lea e service uma ai le itu lea e amata mai Palauli e tau i Puapua. O le talitonuga vaivai o le matou itumalo, e moomia le fesoasoani a le polokalame lea i lalo o le district development programme, aua le puipuiga o apovai i nofoaga o lo o i ai, ona o i o lo o faatamaia e manupapalagi faapea meaituaolo. O le taimi nei ou te fautuaina ai le mamalu o le Matagaluega a Tina ma Tamaitai e auala atu ai se polokalame e fesoasoani ai i lea foi faafitauli.

Ia o nai atinae ia o lo o faia e fesoasoani mai aua le matou itumalo. Ia, se i oo se tala i le matou itumalo, o lea lava e malosi le tatou sui usufono, o lea e faamoemoe le tou sui usufono o lea o le a fai le tatou faleaoga fou, ae tapuai mai, sau se taimi o i luma tatou feiloai ae tapuai mai se i maea le tatou Fonousu ona tatou feiloai lea i le vaiaso a sau. Ia alofagia e le Atua lau Afioga i le Fofoga Fetalai, faapea foi le Afioga i le Palemia ma le mamalu o le Kapeneta, i lenei foi Itu o le Maota i Taitaifono ma le mamalu o Komiti, ia agalelei le Atua i lenei itu o le malu.

I lea itu aemaise Ofisa Sili o Pulega o Matagaluega, ia maua le malosi e tautua ai i le Malo. Lau Afioga i le Fofoga Fetalai, ia maua lou malosi aua le tautuaina o le tatou galuega. Ia manuia le Fonousu a Samoa.



*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Faafetai. Malo saunoa i lau Afioga i le sui usufono mamalu. Ia, ua manatu ua... o lea ua faamau oulua o lea ua uma ona outou fetuunai ma taialalo le ia a Sa Saumani. Ia, ua lelei mo le avanoa ma le aiatatau. Tulai mai le sui usufono mamalu mo Aiga i le Tai e saunoa, e le umi foi se saunoaga aua o lau Afioga o le Minisita Lagolago.

**Susuga MULIPOLA LEIATAUA LAKI (Aiga i le Tai):** Lau Afioga i le Fofoga Fetalai faapea le pau o le Maota nei, ou te manatu o se laolao lelei foi lenei o lenei itumalo se i togi foi se maa, se i lafo le upega ma se i faitau ai o lapega, aua e le faigofie le Fonousu a le atunuu, o le Fono e vevete ai upu o Samoa aemaise le auga o le tamaoiga o le tatou atunuu. Ma o lo o fia faafogafoga Samoa aemaise lenei itumalo po o faapei le sa folau o le tatou atunuu. E tapisa lava le atunuu, ia le toatele foi o e taufaasese, peitai, ia o se pola a e motu i tua. Faafetai i lau Afioga mo le avanoa. E manatu o lea ua maea paepaeulufanua lo tatou aso i paia ma mamalu o Samoa aua o paia lava ua maea ona paniniu ma mamanu faatiti e le au tulatoa. Ona manatu lea e le toe oo i ai se faamatalaga a le itumalo. Olomaaui ia i le toa le paia i le naa, taoto foi mauūloa o Samoa i ona tului paetapu ma ona tului paesa, faæope pea foi fulu o le manuula i ona tapulolou i aliiseu, alii siliaga ma aliiala aua ao faasao o Savea, aua o Samoa lele ua maea ona faaee i lumamaota ona feaoga aua le paia o le aufaigaluega totofi a le Atua. Nuunuu atu ia, a o le tulai o le sui usufono mo Aiga i le Tai, e manatu lava e le umi se tautalaga, ae fai foi o le puniloa a o le punimatatogo aua le fita faafogafoga mai a le itumalo, ae manatu lava o lea ua taatia i paga tia o le tautiaga. E tasi lava le lauga faataupou ua atoa lio ai i i manaoga o le itumalo, ae tau lava ina toe faamatogi. O upu lava a le tusi, e tupu le faatuatua i le taulogologo, o le taulogologo foi e mai afioga a le Atua ia.

Ona faapea lea o se lagona vaivai o le tootoo o Aiga i le Tai, na o ni vaega laiti lau Afioga i le Minisita o Galuega, ia o le tele foi o taimi ua faasoa ma lau Afioga, ua tautino foi le solo a le tamaloa. E leai e talitonu lava le tootoo, a o upu lava a le atunuu, o si ota uso lava masalo, ta te toe masalosalo a ita ia ita. E ese foi ona tautino ae nonofo a, e maniti a tino. Peitai, ua teu fatu lava teu loto le saunoaga a lau Afioga, i nisi o vaega pei ona faasoa ua uma foi ona faapepa tulaga i le uafu o si ou nuu o Manono, ua talitaliga foi e faafogafoga, o mea e lelei i Upolu e lelei foi i Savaii, e manatu ua sili ona lelei mo Manono, o si motu laititi lapotopoto. O se tasi o motu e ui ina itiiti, a o motu faitaulia o motu e fa o le tatou atunuu. E tatalo atu lava i lau Afioga na o se faamanatu, se i alofa ane i lau CEO ua ta alu faafia foi i ai ae faapea mai lava o lau Afioga ae ou te iloa ua uma ona e saunoa i ai, leaga o lo o fememeai foi le nuu ua leva ona matou minoi, ia ua toe tali mai nai isi foi fesoasoani mai fafo, e le o nofonofo lava le nuu. Peitai, o le autu lea o lau Afioga. Na ona toe famanatu atu, o lena e i ina le uta a le faimea i lau Afioga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le tulaga o le auala o si ou Kolisi i Aana, lau Afioga ua maea foi ona faaoo atu le tusi talosaga i le aoga ma le Komiti, ia, o lo o talia lava lau Afioga, a oo ina louloua le tau ma timuga, o le mea moni e uiui i autafa fanau aoga, e le i faataina lava lenei auala talu ona faavae mai. Masalo foi pau lenei o le kolisi maualuga i le atunuu e le i oo i ai se ta i le taimi nei. Na ona faaoololomaau atu i lau Afioga, se i alofa ane, e le i oo atu lava se asiasiga i lea foi auala. Ia, faatasi ai ma auala galue o le itumalo, ua uma foi ona faaoo atu. E le i mamao atu galuega foi a le afioaga, faatino ina ua otegia foi e Patele tofi pulenuu po o sui o nuu ona o le leaga o auala. Ua uma ona fai le galuega a le nuu, tanutanu i maa tulou ma lau mai le pala i le matafaga e tau faalaugatasi ai e talitali ai foi le taimi e oo atu ai le faasoa. E pei lava foi ona faaoo atu, o le taulogologo lava e tupu ai le faatuatua. Na o se fautuaga laititi lau Afioga, malo faafetai mo galuega lelei, e matauina le tulata ina faaleleia atoa le tatou auala i le agai atu i Saina i le tatou malae vaalele i Faleolo. Peitai o auala nei o lo o uia i taimi uma, taeao ma le afiafi, na ona faaoololomaau atu po o le a se silasila a lau Afioga i tulaga i a tatou auala ia, ua lelei ma matagofie nisi o vaega pei ona molimauina i Afega ma Malua, peitai, e le iloa pe faatino ni tulaga i ni pa apa i autafa tulou, po o ni pupuni o alavai sima ona ua matauina ua fai si loloto o alavai i autafa pei ua fai si le saogalemu, e le gata ua leai se mea e savavali ai seiloga e ui ui mamao i tua tagata, ae na ona masepu lava o le uili o le taavale tulou, tito loa i lalo i le alavai, pe i ai ni sima foi nei e pupuni ai luga ona ua matauina ua fai tulaga foi ia o auala e ui agai i tua i aiga, a o lo o vavatelele vaega ia, e fai lava si tulaga faaletonu, aemaise foi o Malua, na ona sese lava o le paʻu o le taavale i le pito i tai, tofi i lalo o le autu toe fetoi ma le taligalu, malo galulue ua lelei ma matagofie mea uma, a o nai fautuaga, toe matimati ai ia vaega aua le saogalemu.

Lau Afioga i le Minisita mo Tagata Maimoa Mai Fafu, malo. Na pau lea o le Minisita e asiasi lava i aso uma o le vaiaso, o le Minisita mataala, e le tuufauina galuega ma e vaai lava i si ou itumalo. Ia po o le sao lea o Minisita e le galo le feagaiga, o isi foi taimi ua taulagi le feagaiga ae tau le faatino foi nai galuega e faailoa ai lo outou fai feagaiga.

Lau Afioga i le Minisita, o le aoga ia o nai malaga foi ia e agai i fafo pei ona saunoa foi le Afioga i le Palemia, o tatou foi e o ma matau nai mea ia e kopi mai o mea lelei e tau matimati ai foi lo tatou sa folau. Sa matou malaga i Fiti ma le Afioga i le Minisita ma nisi o Ofisa Sinia, o le atunuu lenei o Fiti, e te oso atu loa i lalo ma le vaalele, e amata Bula atu lava i ina e toetiti soo vaega o Fiti o Bula, Bula, Vinaka. Ou fai atu i le Afioga i le Minisita, se ua Bula faasoloatoa le mea alii i faiga a le au Fiti lenei. E faafuafua foi le loto i le gagana o lo o gagana ai, a o le uluai faitotoa lea o lo o faailoa e Fiti i a latou foi taligamalo. O le mea moni, ua Bula Bula mai ua le Bula atu, ia Talofa, Talofa.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

A o le lagona vaivai o le sui usufono lau Afioga i le Minisita, e leai sina aoaoga se i toe fai se i toe tau aotauina uma ai o tatou tagata faigaluega i le malae vaalele, faapea foi le uafu i Matautu. E i ai le upu lea Talofa, ioe, ulufale mai Talofa, a o tatou, o le atunuu talimalo. A o le tele o taimi, e foi lava le tagata i i le faauu, ioe, e foi lava le tagata i le faauu. Na ou taunuu mai le Aso Sa, ou te tu atu i luma o le faletupe foi lea e tala lau tupe o matou ma nai toelaiina o le matou nuu sa alu le matou malaga, ia ua ou vaai atu lava i nai toelaiina, ua tolu, fa, clients a le isi faletupe e i matou autafa, a o lea lava matou te tutu a. Ou fai atu i si teine, ia, alofa e faavavevave ane lau gaoioi ua fia o toelaiina. Fai mai le tala a le tamaitai lea ia te au, e toe avatu lau tupe e te alu i o i le faletupe lea? Ia, ua ta alofa lava i si toeaina e ana le auunaga, ou fai atu, a iloa oe e le tamaloa e tuli a nei oe i lou nofo ma tutuli clients. Pei o le uiga lea o le lagona foi lea e tausolomua a i tagata lea e i faitotoa e muamua tulaueleele ai a tatou Malo, a o lea lava tatou te alalaga lava o le numera tasi lea ua ave i ai le tau maketiina o le tatou atunuu, peitai ae le o aliali i foliga ma le gagana a tagata faigaluega. E leai o le tatou mea faifaatasi. Fai mai le tala a le isi toeaina, o le mea lea o le talimalo, e alu alu lava ua e le fia li tulou, ae taumafai pea e li.

Lau Afioga i le Minisita, pei na o se fautuaga lea.

**FOFOGA FETALAI:** Malie le sui usufono se i tulai atu le Afioga i le Minisita o Tagata Tafafao Maimoa Mai Fafu.

**Afioga Hon Sala Fata Lisati Pinati:** Lau Afioga i le Fofoga Fetalai, ou te faafetai atu i le sui usufono. Ou te faasaoa le saunoaga i lenei afiafi, o le vaivaiga lea o tatou tagata, o le fautuaga foi lea ou te ave i tagata e ona faletalimalo lea e fail mai ia latou pisinisi.

E pei o le agaga moni lava ia o le first impression. O i ina e fau ai manatu aua foi a e sau e te vaai atu e lelei ona tali mai tagata ma fiafia mai, e te alu foi ma le fiafia e lagona e tagata. Ou te faasaoa la le manatu lea, e ala ona faaletonu a outou pisinisi o le tou faaletonu. O ai se tagata e alu atu e lagolago lau pisinisi pe afai e te faauu? Fai atu tagata faigaluega e le lelei amio a tagata faigaluega e leai se mata ataata. O le laufofoga fiafia e tali ai malo. Faafetai. O le agaga tonu a lea e i ai Samoa. A mea o le mea lea e moomia ai lo tatou galulue? A i ai ni mea faaletonu i totonu o le malae vaalele po o fea lava le auunaga o lo o le lelei ona faatino, e ao ona tatou faasaoa ma faapea mai, lipoti, faaletonu lipoti, vaai le pule. A faaletonu foi le pule, e le tatau ona pule, aua e le nofo nofo oo i luga.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

E ala ona oo le tagata i luga, ua i ai le talitonuga o oe lea e agavaa i le tofi lea e te faia, e te alu e fai le auaunaga ia atoatoa, auaunaga mo Samoa. Fai mea silisili. O lea o le a taumafai le Ofisa ae toe faafoi lava tatou i le mea sa i ai o le pese, fai pesega malie. Aua sa i ai le faitau foi lele fai mai, e tele tupe e alu i tagata. O le mau a le faipisinisi, e alu le tupe e sue le tupe. E le mafai ona sau le tupe ia tatou pe a tatou le o e saili, faaalu le tupe e sue le tupe. Ma le faaaloalo lava. Ia manuia le afiafi.

**FOFOGA FETALAI:** Malo faafetai. Ia, tulai mai le sui usufono mo Aiga i le Tai, ua maea lou taimi. Se i vaai pe moni lea faaaliga na e saunoa ai.

**Susuga MULIPOLA LEIATAUA LAKI:** Faafetai i lau Afioga, lea toetiiti lava maea atu. Ia, o le Maota foi leni e le o se Maota e soona taele pispisi ai se isi.

Lau Afioga i le Fofoga Fetalai, faafetai le tali faaaloalo i le Afioga i le Minisita. E leai, e asuasua atu vaimalu i puega ina ne i a Ulu tafega selefutia Vaisigano. Leai e matauina lava foi le tele o tatou tagata faigaluega laufofoga fiafia ma tausaaafia, ae peitai, e avea lava le lagomate e tasi e faaleagaina ai le suauu. Peitai, a le fofu alamea, e ono tupu tele ma ono afaina ai le tatou tamaoaiga, ae ona o latou foi e le mataala i lea taimi ma lea taimi, o le agaga lea o le tatalo.

Peitai lau Afioga, ia o le Minisita o Tina ma Tamaitai, na o se faaoololomaau i lau Afioga, sa ou faaoololomaau foi i le Minisita muamua, peitai e pisi lava. Peitai, o le tatalo a leni nuu o Manono, ia e le toe tau faailoaina le tulaga o le afioaga i le nuu m vae mai le amataga i le motu, peitai o le taimi nei, ua faaluaina le faitauaofai o i latou o lo o nofoia le motu nai lo matou o lo o nonofo uta i Upolu. O nuu uma i tai i le motu o lo o ua i uta foi, a o le tulaga o lo o i ai tulaga i Sui foi nei o le Malo e avatu i nuu, o uta atoa i nuu ia e fa e leai ni pulenuu, o pulenuu o lo o saofafai uma i tai i le motu. Peitai, na o le Sui o le Malo o lo o avatu ai. O le tatalo pei ona faatauina lau Afioga, pe le mafai ma se Sui Tamaitai o le Malo e faalua ai, aua a fua foi i le tatou gender equality, pei ua le paleni foi lea vaega i le faatauina o se Sui Tamaitai, ona ua fai si toatele o le faitauaofai o le nuu i uta. A silasila i ai i le tatou tusigaigoa pe le i mamao tele atu, ia o lo o maua i faamaumauga le faatupulaia o le faitauaofai o le nuu i uta, peitai, e tasi lava le sui o lo o feagai. E tele foi faafitauli. E molimauiina e le Ofisa nisi o polokalame sa faatino i uta, ia e pei lava au o le sui o le nuu aua e le gafatia e le toatasi, e faasolo le sui lea i nuu ia e fa i uta, afai lava e oo i le isi pitonuu, ua nofonofo ai lava seiloga e oo atu fuafuaga ma polokalame a le Malo i le latou foi pitonuu.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Peitai, o le isi galuega tauave lea o lo o fai e le tofi o le itumalo, ua galue foi faasui o le nuu i le tele o taimi ina ia tau faamaopoopo vaega ia aua le talileleia o a tatou Malo i polokalame a le tatou Malo faapea foi Ofisa tumaoti. E tatalo atu ai se i alofa ane i lea vaega aua lava le faaleleia o le auaunaga i tua i nuu ma afioaga.

Ia, lau Afioga i le Minisita o Galuega, toe tasi lava si vaega faamolemole pei ona faapepa atu foi i a matou talosaga tulaga o taligalu i se tasi o nuu o lou itumalo le afioaga o Lalovi. O le nuu lea, e alu atu lava le taligalu gata. A ou fua i le va o le aualatele ma le matafaga se i tulou, pe a ma le 10 mita le mamao, a o le matafaga lea, e matua level lelei lava le matafaga ma le aualatele. A oo la ina tai oooo e matua taataa atu lava le sami i le auala tulou foi le gagana. E tele taimi ua taumafai foi e asa le vaega lea ina ia fai i ai se faiga, pei o lea e tuuaia faapea o lalo o le MNRE ae a fua i ai, ou te le iloa po o a mamao faatulagaina e mafai ai ona tagofia e le LTA. Peitai, o lea sa faatino e le LTA le galuega, ia ae taatia ai si vaega lea pe a ma se 50mita le va lea, e le mafai ona maua se saogalemu, ae feololo lava nai aiga o lo o i autafa o latou maota ua afaina lava i taimi e tai oooo ai ona o le le mafai ona tagofia o le vaega lea o le auala. Ia, ona faaiua lea o se faamatalaga lau Afioga i le Fofoga Fetalai e tusa ai ma le tamaoiaiga o le tatou atunuu e pei ona i ai lenei itula afiafi, e momoli le faamalo ma le faafetai i Ofisa Sili uma i le lagolago i le tatou Tala o le Tupe, aemaise foi lau Afioga i le Minisita, e le faigofie lava ou faiva alofilima. E molimauina foi i le tele o nisi fonotaga, ia faapea foi ita i ina vaitaimi ai ia na ona o mai lava o atunuu ia lafoai mai tupe iinei. Ia ae leai, ia masalo ailoga e i ai se Minisita e le i aisi i lona olaga atoa tulou.

Ia e oo i lau Afioga i le Minisita o Tupe, ia ua matua lelei lava le aisi latou, ia aua e taufono ma le tau faaoleole foi i nai atunuu, ia ae o le mea e lelei ai, o le aisi a le tagata poto, ia ua tele foi ia le tatou aisi i mea foi ia o tupe faameaalofa. Ioe, a ua faaitiiti i mea foi ia e tapisa ai isi vaega ae leai o aga lava na a lo tatou atunuu, ia e tele lava foi le manao, e sao ai le tala a le isi toeaina, o le manao e leai se siusiu, leai se ulu.

Ia ona faapea lea, ia manuia tele toe taualaumaga o le Fonousu a le tatou atunuu i lenei aso, manuia lau Afioga i le Fofoga Fetalai, ia o lo matou tatalo, alofagia e le Atua ia foai ni fonotaga te fonotaga talatala ai, ia aua foi le agai i luma o le tatou Malo ma le faafofoga i lo tatou atunuu, ia manuia si ou itumalo aua le faafofoga mai o Aiga e Lua ma Alo o Malietoa ma Ati ma Lautolo, ia Sau foi ma Sauma ia oe na Faletolu i ai Manono ia faapea foi le paia o si ou nuu le Toafa o Alii ma le Toalua o Tulafale, Lutatutu ma le Alo o Malietoa, ia manuia tele lenei afiafi.

*19 IUNI 2019*

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &  
Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo, faafetai le saunoa i lau Afioga i le Feagaiga, sui usufono mo Aiga i le Tai. Ia ma o lea ua tatou toai taunuu i le taimi foi e manava ai ia le tatou galuega, e faamuta ai le tatou galuega, ia ae tatou te le i tolopo, ma o lea ua matauina tele sui usufono lea ua mafuli ua maea ona saunoa le tele o sui usufono masalo pe toe toatasi pe toe toalua ni sui usufono e saunoa, ia tali loa lea o le Taitaifono o le Komiti o Tupe, ia ma lafo loa i le Malo e saunoa ai mo le aso a taeao.

Ia ae i ai le manatu e tapa ma le faaaloalo lau Afioga i le Sui o Aiga i le Tai e faaiu mai le tatou Fonotaga i se tatalo.

*Na tolopo Taualumaga a le Fono Aoao Faitulafono i le itula e 11:03 i le afiafi seia aulia le itula e 9:00 i le taeao o le Aso Tofi, 20 Iuni 2019.*